

欽定唐書

卷九十七之一百六



土岐文庫

文庫17

W202

19

九



文庫 17
W202
19

010185193697

昭和六十年二月一日
土岐孝吉唐氏寄贈

唐書卷九十七

宋 端 明 殿 學 士 宋 祁 撰

列傳第二十二

魏徵

魏徵字玄成魏州曲城人少孤落魄棄貲產不營有大志通貫書術隋亂詭為道士武陽郡丞元寶藏舉兵應李密以徵典書檄密得寶藏書輒稱善既聞徵所為促召之徵進十策說密不能用王世充攻洛口徵見長史鄭頰曰魏公雖驟勝而驕將銳士死傷略盡又府無見財戰勝不賞此二者不可以戰若浚池峭壘曠日持久賊糧盡且去我追擊之取勝之道也頰曰老儒常語耳徵不謝去後從密來京師久之未知名自請安輯山東乃擢祕書丞馳驛至黎陽時李勣尚為密守徵與書曰始魏公起叛徒振臂大呼眾數十萬威之所被半天下然而一敗不振卒歸唐者固知天命有所歸也今君處必爭之地不早自圖則大事去矣勣得書遂定計歸而大發粟饋淮安王之軍會竇建德陷黎陽獲徵偽拜起居舍人建德敗與裴矩走入關隱太子引為洗馬徵見秦王功高陰勸太子早為計太子敗王責謂曰爾聞吾兄弟奈何答曰太子蚤從徵言不死今日之禍王器其直無恨意即位拜諫議大夫封鉅鹿縣男當是時河北州縣素

乾隆四年校刊 唐書卷九十七列傳



事隱巢者不自安往往曹伏思亂徵白太宗曰不示至公禍不可解帝曰爾行安喻河北道遇太子千牛李志安齊王護軍李思行傳送京師徵與其副謀曰屬有詔宮府舊人普原之今復執送志安等誰不自疑者吾屬雖往人信卽貸而後聞使還帝悅日益親或引至臥內訪天下事徵亦自以不世遇乃展盡底蘊無所隱凡二百餘奏無不剴切當帝心者由是拜尚書右丞兼諫議大夫左右有毀徵阿黨親戚者帝使溫彥博按訊非是彥博曰徵爲人臣不能著形迹遠嫌疑而被飛謗是宜責也帝謂彥博行讓徵徵見帝謝曰臣聞君臣同心是謂一體豈有置至公事形迹若上下共由茲路邦之興喪未可知也帝矍然曰吾悟之矣徵頓首曰願陛下俾臣爲良臣毋俾臣爲忠臣帝曰忠良異乎曰良臣稷契咎陶也忠臣龍逢比干也良臣身荷美名君都顯號子孫傳承流祚無疆忠臣已嬰禍誅君陷昏惡喪國夷家祗取空名此其異也帝曰善因問爲君者何道而明何失而暗徵曰君所以明兼聽也所以暗偏信也堯舜氏闢四門明四目達四聰雖有共敝不能塞也靖言庸違不能感也秦二世隱藏其身以信趙高天下潰叛而不得聞梁武帝信朱异侯景向關而不得聞隋煬帝信虞世基賊徧天下而不得聞故曰君能兼聽則姦人不得壅蔽而下情通矣鄭仁基息女美而才皇后建請爲充華典冊具或言許聘矣徵諫曰陛下處臺榭則欲民有棟宇食膏粱則欲民有飽適顧嬪御則欲民有室家今鄭已約昏陛下取之豈爲人父母意帝

痛自咎卽詔停冊貞觀三年以祕書監參豫朝政高昌王麴文泰將入朝西域諸國欲因文泰悉遣使者奉獻帝詔文泰使人厭怛紇干迎之徵曰異時文泰入朝所過供擬不能具今又加諸國焉則瀕塞州縣以乏致罪者衆彼以商賈來則邊人爲之利若賓客之中國蕭然耗矣漢建武時西域請置都護送侍子光武不許不以蠻夷敝中國也帝曰善追止其詔於是帝卽位四年歲斷死二十九幾至刑措米斗三錢先是帝嘗歎曰今大亂之後其難治乎徵曰大亂之易治譬饑人之易食也帝曰古不云善人爲邦百年然後勝殘去殺邪答曰此不爲聖哲論也聖哲之治其應如響葶月而可蓋不其難封德彝曰不然三代之後澆詭日滋秦任法律漢雜霸道皆欲治不能非能治不欲徵書生好虛論徒亂國家不可聽徵曰五帝三王不易民以教行帝道而帝行王道而王顧所行何如爾黃帝逐蚩尤七十戰而勝其亂出致無爲九黎害德顛頊征之已克而治桀爲亂湯放之紂無道武王伐之湯武身及太平若人漸澆詭不復返朴今當爲鬼爲魅尙安得而化哉德彝不能對然心以爲不可帝納之不疑至是天下大治蠻夷君長襲衣冠帶刀宿衛東薄海南踰嶺戶闔不閉行旅不齎糧取給於道帝謂羣臣曰此徵勸我行仁義旣効矣惜不令封德彝見之俄檢校侍中進爵郡公帝幸九成宮宮御舍漳川宮下僕射李靖侍中王珪繼至更改館宮御以舍靖珪帝聞怒曰威福由是等邪何輕我宮人詔并按之徵曰靖珪皆陛下腹心大臣宮人止

後宮掃除隸耳方大臣出官吏諂朝廷法式歸來陛下問人間疾苦夫官舍固靖等見官吏之所吏不可不謁也至宮人則不然供饋之餘無所參承以此按吏且駭天下耳目帝悟寢不問後宴丹霄樓酒中謂長孫無忌曰魏徵王珪事隱太子巢刺王時誠可惡我能棄怨用才無羞古人然徵每諫我不從我發言輒不卽應何哉徵曰臣以事有不可故諫若不從輒應恐遂行之帝曰第卽應須別陳論顧不得徵曰昔舜戒羣臣爾無面從退有後言若面從可方別陳論此乃後言非稷高所以事堯舜也帝大笑曰人言徵舉動疏慢我但見其嫵媚耳徵再拜曰陛下導臣使言所以敢然若不受臣敢數批逆鱗哉十年爲侍中尙書省滯訟不決者詔徵平治徵不素習法但存大體處事以情人人悅服進左光祿大夫鄭國公多病辭職帝曰公獨不見金在鐵何足貴耶善治鍛而爲器人皆寶之朕方自比於金以卿爲良匠而加礪焉卿雖疾未及衰庸得便爾徵懇請數却愈牢乃拜特進知門下省事詔朝章國典參議得失祿賜國官防閔並同職事文德皇后既葬帝卽苑中作層觀以望昭陵引徵同升徵熟視曰臣眊昏不能見帝指示之徵曰此昭陵邪帝曰然徵曰臣以爲陛下望獻陵若昭陵臣固見之帝泣爲毀觀尋以定五禮當封一子縣男徵請封孤兄子叔慈帝愴然曰此可以勵俗卽許之後幸洛陽次昭仁宮多所譴責徵曰隋惟責不獻食或供奉不精爲此無限而至於亡故天命陛下代之正當兢懼戒約奈何令人悔爲不吝若以爲足

今不啻足矣以爲不足萬此寧有足邪帝驚曰非公不聞此言退又上疏曰書稱明德慎罰惟刑之卹禮曰爲上易事爲下易知則刑不煩上多疑則百姓惑下難知則君長勞夫上易事下易知君長不勞百姓不惑故君有一德臣無二心夫刑賞之本在乎勸善而懲惡帝王所與天下畫一不以親疎貴賤而輕重者也今之刑賞或由喜怒或出好惡喜則矜刑於法中怒則求罪於律外好則鑽皮出羽惡則洗垢索瘢蓋刑濫則小人道長賞謬則君子道消小人之惡不懲君子之善不勸而望治安刑措非所聞也且暇豫而言皆敦尙孔老至於威怒則專法申韓故道德之旨未弘而饒薄之風先搖昔州犁上下其手而楚法以敝張湯輕重其心而漢刑以謬況人主而自高下手頃者罰人或以供張不贖或不能從欲皆非致治之急也夫貴不與驕期而驕自至富不與奢期而奢自至非徒語也且我之所代實在有隋以隋府藏況今之資儲以隋甲兵況今之士馬以隋戶口況今之百姓絜長度大曾何等級焉然隋以富彊而喪動之也我以貧寡而安靜之也靜之則安動之則亂人皆知之非隱而難見微而難察也不蹈平易之塗而遵覆車之轍何哉安不思危治不念亂存不慮亡也方隋未亂自謂必無亂未亡自謂必不亡所以甲兵亟動徭役不息以至戮辱而不悟滅亡之所由也豈不哀哉夫監形之美惡必就止水監政之安危必取亡國詩曰殷鑒不遠在夏后之世臣願當今之動靜以隋爲鑒則存亡治亂可得而知思所以危則安矣思

所以亂則治矣思所以亡則存矣存亡之所在在節嗜欲省游畋息靡麗罷不急慎偏聽近忠厚遠便佞而已夫守之則易得之實難今既得其所難豈不能保其所易保之不固驕奢淫泆有以動之也帝宴羣臣積翠池酣樂賦詩徵賦西漢其卒章曰終籍叔孫禮方知皇帝尊帝曰徵言未嘗不約我以禮它日從容問曰比政治若何徵見久承平帝意有所忽因對曰陛下貞觀之初導人使諫三年以後見諫者悅而從之比一二年勉彊受諫而終不平也帝驚曰公何物驗之對曰陛下初即位論元律師死孫伏伽諫以爲法不當死陛下賜以蘭陵公主園直百萬或曰賞太厚答曰朕即位未有諫者所以賞之此導人使諫也後柳雄妄訴隋資有司得劾其僞將論死戴胄奏罪當徙執之四五然後赦謂胄曰第守法如此不畏濫罰此悅而從諫也近皇甫德參上書言修洛陽宮勞人也收地租厚斂也俗尚高髻宮中所化也陛下患曰是子使國家不役一人不收一租宮人無髮乃稱其意臣奏人臣上書不激切不能起人主意激切卽近訕謗于時陛下雖從臣言賞帛罷之意終不平此難於受諫也帝悟曰非公無能道此者人苦不自覺耳先是帝作飛仙宮徵上疏曰隋有天下三十餘年風行萬里威懾殊俗一旦舉而棄之彼煬帝者豈惡治安喜滅亡哉恃其富彊不虞後患也驅天下役萬物以自奉養子女玉帛是求宮宇臺榭是飾徭役無時干戈不休外示威重內行險忌讒邪者進忠正者退上下相蒙人不堪命以致殞匹夫之手爲天下

笑聖哲乘機拯其危溺今宮觀臺榭盡居之矣奇珍異物盡收之矣姬姜淑媛盡侍於側矣四海九州盡爲臣妾矣若能鑒彼所以亡念我所以得焚寶衣毀廣殿安處卑宮德之上也若成不廢卽仍其舊除其不急德之次也不惟王業之艱難謂天命可恃因基增舊甘心侈靡使人不見德而勞役是聞斯爲下矣以暴易暴與亂同道夫作事不法後無以觀人怨神怒則災害生災害生則禍亂作禍亂作而能以身名令終者鮮矣是歲大雨穀洛溢毀宮寺十九漂居人六百家徵陳事曰臣聞爲國基於德禮保於誠信誠信立則下無二情德禮形則遠者來格故德禮誠信國之大綱不可斯須廢也傳曰君使臣以禮臣事君以忠自古皆有死人無信不立又曰同言而信信在言前同令而行誠在令外然則言而不行言不信也令而不從令無誠也不信之言不誠之令君子弗爲也自王道休明絲十餘載倉廩愈積土地益廣然而道德不日博仁義不日厚何哉由待下之情未盡誠信雖有善始之勤而無克終之美故便佞之徒得肆其巧謂同心爲朋黨告訐爲至公彊直爲擅權忠讜爲誹謗謂之朋黨雖忠信可疑謂之至公雖矯僞無咎彊直者畏擅權而不得盡忠讜者慮誹謗而不敢與之爭榮惑視聽鬱於大道妨化損德無斯甚者今將致治則委之君子得失或訪諸小人是譽毀常在小人而督責常加君子也夫中智之人豈無小惠然慮不及遠雖使竭九誠猶未免傾敗况內懷姦利承顏順旨乎故孔子曰君子而不仁者有矣未有小

人而仁者然則君子不能無小惡惡不積無害於正小人時有小善善不積不足以忠今謂之善人矣復慮其不信何異立直木而疑其景之曲乎故上不信則無以使下下不信則無以事上信之爲義大矣昔齊桓公問管仲曰吾欲使酒腐於爵肉腐於俎得無害霸乎管仲曰此固非其善者然無害霸也公曰何如而害霸曰不能知人害霸也知而不能用害霸也用而不能任害霸也任而不能信害霸也既信而又使小人參之害霸也晉中行穆伯攻鼓經年而不能下餽問倫曰鼓之裔夫問倫知之請無疲士大夫而鼓可得穆伯不應左右曰不折一戟不傷一卒而鼓可得君奚不爲穆伯曰問倫之爲人也佞而不仁若使問倫下之吾不可以不賞若賞之是賞佞人也佞人得志是使晉國捨仁而爲佞雖得鼓安用之夫穆伯列國大夫管仲霸者之佐猶能慎於信任遠避佞人況陛下之上聖乎若欲令君子小人是非不雜必懷之以德待之以信厲之以義節之以禮然後善善而惡惡審罰而明賞無爲之化何遠之有善善而不能進惡惡而不能去罰不及有罪賞不加有功則危亡之期或未可保帝手詔嘉答於是廢明德宮玄圃院賜遭水者七日宴羣臣帝曰貞觀以前從我定天下開闢草昧玄齡功也貞觀之後納忠諫正朕違爲國家長利微而已雖古名臣亦何以加親解佩刀以賜二人帝嘗問羣臣微與諸葛亮孰賢岑文本曰亮才兼將相非微可比帝曰微蹈履仁義以弼朕躬欲致之堯舜雖亮無以抗時上封者衆或不切事帝厭

一 號第七 七 七

之欲加譙黜微曰古者立謗木欲聞己過封事其謗木之遺乎陛下思聞得失當恣其所陳言而是乎爲朝廷之益非乎無損於政帝悅皆勞遣之十三年阿史那結社率作亂雲陽石然自冬至五月不雨徵上疏極言曰臣奉侍幃幄十餘年陛下許臣以仁義之道守而不失儉約朴素終始弗渝德音在耳不敢忘也頃年以來寢不克終謹用條陳裨萬分之一陛下在貞觀初清淨寡欲化被荒外今萬里遣使市索駿馬并訪怪珍昔漢文帝却千里馬晉武帝焚雉頭裘陛下居常論議遠希堯舜今所爲更欲處漢文晉武下乎此不克終一漸也子貢問治人孔子曰懷乎若朽索之馭六馬子貢曰何畏哉對曰不以道導之則吾備也若何不畏陛下在貞觀初護民之勞煦之如子不輕營爲頃既奢肆思用人力乃曰百姓無事則易驕勞役則易使自古未有百姓逸樂而致傾敗者何有逆畏其驕而爲勞役哉此不克終二漸也陛下在貞觀初役己以利物比來縱欲以勞人雖憂人之言不絕於口而樂身之事實切諸心無慮營構輒曰弗爲此不便我身推之人情誰敢復爭此不克終三漸也在貞觀初親君子斥小人比來輕襲小人禮重君子重君子也恭而遠之輕小人也狎而近之近之莫見其非遠之莫見其是莫見其是則不待問而疏莫見其非則有時而昵昵小人疏君子而欲致治非所聞也此不克終四漸也在貞觀初不貴異物不作無益而今難得之貨雜然並進玩好之作無時而息上奢靡而望下朴素力役廣而冀農業興不可得已此

不克終五漸也貞觀之初求士於渴賢者所舉卽信而任之取其所長常恐不及比來由心好惡以寵賢舉而用以一人毀而棄雖積年任而信或一朝疑而斥夫行有素履事有成迹一人之毀未可必信積年之行不應頓虧陛下不察其原以爲臧否使讒佞得行守道疏間此不克終六漸也在貞觀初高居深拱無田獵畢弋之好數年之後志不克固鷹犬之貢遠及四夷晨出夕返馳騁爲樂變起不測其及救乎此不克終七漸也在貞觀初遇下有禮羣情上達今外官奏事顏色不接間因所短詰其細過雖有忠款而不得申此不克終八漸也在貞觀初孜孜治道常若不足比恃功業之大負聖智之明長傲縱欲無事與兵問罪遠裔親狎者阿旨不肯諫疎遠者畏威不敢言積而不已所損非細此不克終九漸也貞觀初頻年霜旱畿內戶口並就關外攜老扶幼來往數年卒無一戶亡去此由陛下矜育撫寧故死不攜貳也比者疲於徭役關中之人勞敝尤甚雜匠當下顧而不遣正兵番上復別驅任市物繼屬於塵遞子背望於道脫有一穀不收百姓之心恐不能如前日之帖泰此不克終十漸也夫禍福無門惟人之召人無罽焉妖不妄作今旱熯之災遠被郡國凶醜之孽起於畿下此上天示戒乃陛下恐懼憂勤之日也干載休期時難再得明主可爲而不爲臣所以鬱結長歎者也疏奏帝曰朕今聞過矣願改之以終善道有違此言當何施顏面與公相見哉方以所上疏列爲屏障庶朝夕見之兼錄付史官使萬世知君臣之義因賜黃

金十斤馬二匹高昌平帝宴兩儀殿歎曰高昌若不失德豈至於亡然朕亦當自戒不以小人之言而譏君子庶幾獲安也徵曰昔齊桓公與管仲鮑叔牙甯戚四人者飲桓公請叔牙曰盍起爲寡人壽叔牙奉觴而起曰願公無忘在莒時使管仲無忘束縛於魯時使甯戚無忘飯牛車下時桓公避席而謝曰寡人與二大夫能無忘夫子之言則社稷不危矣帝曰朕不敢忘布衣時公不得忘叔牙之爲人也帝遣使者至西域立葉護可汗未還又遣使齎金帛諸國市馬徵曰今立可汗未定卽詣諸國市馬彼必以爲意在馬不在立可汗可汗得立必不懷恩諸蕃聞之以中國薄義重利未必得馬而先失義矣魏文帝欲求市西域大珠蘇則以爲惠及四海則不求自至求而得之不足貴也陛下可不畏蘇則言乎帝遂止是後右僕射缺欲用徵徵讓得不拜皇太子承乾與魏王泰交惡帝曰當今忠蹇貴重無踰徵我遣傅皇太子一天下之望羽翼固矣卽拜太子太師徵以疾辭詔答曰漢太子以四皓爲助我賴公其義也公雖臥可擁全之十七年疾甚徵家初無正寢帝令輟小殿材爲營構五日畢并賜素褥布被以從其尙令中郎將宿其第動靜輒以聞藥膳賜遺無算中使者綴道帝親問疾屏左右語終日乃還後復與太子至徵第徵加朝服拖帶悲澘拊之流涕問所欲對曰葵不恤緯而憂宗周之亡帝將以衡山公主降其子叔玉時主亦從帝曰公疆視新婦徵不能謝是夕帝夢徵若平生及旦薨帝臨哭爲之慟罷朝五日太子舉哀西華堂

詔內外百官朝集使皆赴喪贈司空相州都督諡曰文貞給羽葆鼓吹班劍四十人陪葬昭陵將葬其妻裴辭曰微素儉約今假一品禮儀物褻大非微志見許乃用素車白布幃帷無塗車芻靈帝登苑西樓望哭盡哀晉王奉詔致祭帝作文于碑遂書之又賜家封戶九百帝後臨朝歎曰以銅爲鑑可正衣冠以古爲鑑可知興替以人爲鑑可明得失朕嘗保此三鑑內防己過今魏徵逝一鑑亡矣朕比使人至其家得書一紙始半彙其可識者曰天下之事有善有惡任善人則國安用惡人則國弊公卿之內情有愛憎憎者惟見其惡愛者止見其善愛憎之間所宜詳慎若愛而知其惡憎而知其善去邪勿疑任賢勿猜可以興矣其大略如此朕顧思之恐不免斯過公卿侍臣可書之於笏知而必諫也徵狀貌不逾中人有志膽每犯顏進諫雖逢帝甚怒神色不徙而天子亦爲霽威議者謂責育不能過嘗上冢還奏曰向聞陛下有關南之行旣辨而止何也帝曰畏卿遂停耳始喪亂後典章湮散徵奏引諸儒校集祕書國家圖籍粲然完整嘗以小戴禮綜彙不倫更作類禮二十篇數年而成帝美其書錄實內府帝本以兵定天下雖已治不忘經略四夷也故徵侍宴奏破陣武德舞則俯首不顧至慶善樂則諦玩無厭舉有所諷切如此徵亡帝思不已登凌煙閣觀畫像賦詩悼痛聞者媚之毀短百爲徵嘗薦杜正倫侯君集才任宰相及正倫以罪黜君集坐逆誅讎人遂指爲阿黨又言徵嘗錄前後諫爭語示史官褚遂良帝滋不悅乃停叔玉昏而

仆所爲碑顧其家衰矣遼東之役高麗躡犯陣李勣等力戰破之軍還悵然曰魏徵若在吾有此行邪卽召其家到行在賜勞妻子以少牢祠其墓復立碑恩禮加焉四子叔玉叔琬叔瑜叔玉襲爵爲光祿少卿神龍初以其子膺紹封叔璘禮部侍郎武后時爲酷吏所殺叔瑜豫州刺史善草隸以筆意傳其子華及甥薛稷世稱善書者前有虞褚後有薛魏華爲檢校太子左庶子武陽縣男開元中寢堂火子孫哭三日詔百官赴弔徵五世孫睿

睿字申之擢進士第同州刺史楊汝士辟爲長春宮巡官文宗讀貞觀政要思徵賢詔訪其後汝士薦爲右拾遺睿姿字魁秀帝異之嘗管經略使董昌齡誣殺參軍衡方厚貶溲州司戶俄徙峽州刺史睿諫曰王者赦有罪唯赦無赦比昌齡專殺不辜事跡暴章家人銜冤萬里投訴獄窮罪得特被矜貸中外以爲屈法今又授刺史復使治人憲憲章乖至法不見其可有詔改洪州別駕御史中丞李孝本宗室子坐李訓事誅死其二女沒入宮睿上言陛下卽位不悅聲色于今十年未始採擇數月以來稍意聲伎教坊闔選百十未已莊宅收市疊疊有聞今又取孝本女內之後宮宗姓不育寵幸爲累傷治道之本速應穢之嫌諺曰止寒莫若重裘止謗莫若自修惟陛下崇千載之盛德去一旦之玩好帝卽出孝本女詔曰乃祖在貞觀時指事直言無所避每覽國史朕與嘉之睿爲拾遺屢有獻納夫備瀛埽於內非曰聲妓恤宗女

之幼不爲漁取然疑似之間不可戶曉睿辭深切其惜我之失不亦至于睿雖居位日淺朕何愛一官增直臣之氣其以睿爲右補闕先是帝謂宰相曰太宗得徵參禪闕朕今得睿又能極諫朕不敢仰希貞觀庶幾處無過之地教坊有工善爲新聲者詔授揚州司馬議者頗言司馬品高郎官刺史迭處不可以授賤工帝意右之宰相諭諫官勿復言睿獨固諫不可工降潤州司馬荆南監軍呂令琛縱廉卒辱江陵令觀察使韋長避不發移內樞密使言狀睿劾長任察廉知監軍侵屈官司不以上聞私自近臣亂法度請明其罰不報俄爲起居舍人帝問卿家書詔頗有存者乎睿對惟故笏在詔令上送鄭覃曰在人不在笏帝曰覃不識朕意此笏乃今甘棠帝因敕睿曰事有不當毋嫌論奏睿對臣頃爲諫臣故得有所陳今則記言動不敢侵官帝曰兩省屬皆可議朝廷事而毋辭也帝索起居注睿奏古置左右史書得失以存鑒戒陛下所爲善無畏不書不善天下之人亦有以記之帝曰不然我既嘗觀之睿曰向者取觀史氏爲失職陛下所爲善無畏不書不善天下之人亦有以記之帝曰不然我既嘗觀之睿曰向者取觀史氏爲賀蘭進興及黨與治軍中反狀且帝自臨問詔命斬囚以徇御史中丞高元裕建言獄當與衆共之刑部大理法官也決大獄不與知律令謂何請歸有司未報睿上言事繫軍卽推軍中如齊民宜付府縣今獄不在有司法有輕重何從而知帝停決詔神策軍以官兵留仗內餘付御史臺臺憚士賈不敢異卒皆誅

死擢諫議大夫兼起居舍人弘文館直學士睿固讓不見可乃拜始睿之進李珣楊嗣復實推引之武宗立睿坐二人黨出爲汾州刺史俄貶信州長史宣宗嗣位移郢商二州刺史召授給事中遷御史中丞發駙馬都尉杜中立姦贓權戚縮氣俄兼戶部侍郎事睿奏中丞紀綱所寄不宜雜領錢穀乞專治戶部詔可頃之進同中書門下平章事建言今天下蠲治惟東宮未立不早以正人傳導之非所以存副貳之重且泣下帝爲感動自敬宗後惡言儲嫡事故公卿無敢開陳者時帝春秋高嫡嗣未便睿輔政白發其端朝議歸重會詹毗國獻象睿以爲非土性不可畜請還其獻詔可河東節度使李業殺降虜邊部震擾業內恃憑藉人無敢言者睿奏徙滑州遷中書侍郎大理卿馬曙有犀鎧數十首懼而瘞之奴王慶以怨告曙藏甲有異謀按之無它狀投曙嶺外慶免議者謂奴訴主法不聽睿引律固爭卒論慶死累遷門下侍郎兼戶部尚書大中十年以平章事領劍南西川節度使上疾求代召拜吏部尚書因久疾檢校尚書右僕射太子少保卒年六十六贈司徒睿爲宰相議事天子前宅相或委抑規諷惟睿謙切無所回畏宣宗嘗曰睿名臣孫有祖風朕心憚之然卒以剛正爲令狐綯所忌讒罷之

贊曰君臣之際顧不難哉以徵之忠而太宗之睿身歿未幾猜譖遽行始徵之諫累數十餘萬言至君子小人未嘗不反復爲帝言之以佞邪之亂忠也久猶不免故曰皓皓者易汙曉曉者難全自古所嘆云唐

柳芳稱徵死不知莫不恨惜以為三代遺直諒哉蒼之論議挺挺有祖風烈詩所謂是以似之者歟

唐書卷九十七

唐書卷九十七考證

魏徵傳叔瑜豫州刺史○舊書至潞州刺史

徵五世孫蒼大中十年以平章事領劍南西川節度使○臣德潛按舊書本紀在十一年綱目十一年十

二月魏蒼罷為西川節度使傳中十年誤

唐書卷九十七考證

唐書卷九十八

宋 端 明 殿 學 士 宋 祁 撰

列傳第二十三

王薛馬韋

王珪字叔玠祖僧辯梁太尉尚書令父顯北齊樂陵郡太守世居郿性沈澹志量隱正恬於所遇交不苟合隋開皇十三年召入秘書內省讎定羣書為太常治禮郎季父頗通儒有鑒裁尤所器許頗坐漢王諒反誅珪亡命南山十餘年高祖入關李綱薦署世子府諮議參軍事建成為皇太子授中舍人遷中允禮遇良厚太子與秦王有隙帝責珪不能輔導流焉州太子已誅太宗召為諫議大夫帝嘗曰正主御邪臣不可以致治正臣事邪主亦不可以致治唯君臣同德則海內安朕雖不明幸諸公數相諫正庶致天下於平珪進曰古者天子有爭臣七人諫不用則相繼以死今陛下開聖德收采芻言臣願竭狂瞽佐萬分之一帝可乃詔諫官隨中書門下及三品官入閣珪推誠納善每存規益帝益任之封永寧縣男黃門侍郎遷侍中它日進見有美人侍帝側本廬江王瑗姬也帝指之曰廬江不道賊其夫而納其室何有不亡乎珪避席曰陛下以廬江為是邪非邪帝曰殺人而取妻乃問朕是非何也對曰臣聞齊桓公之郭問父老

曰郭何故亡曰以其善善而惡惡也公曰若子之言乃賢君也何至於亡父老曰不然郭君善善不能用惡惡不能去所以亡今陛下知廬江之亡其姬尚在竊謂陛下以爲是審知其非所謂知惡而不去也帝嗟美其言帝使太常少卿祖孝孫以樂律授宮中音家伎不進數被讓珪與溫彥博同進曰孝孫修謹士陛下使教女樂又責譙之天下其以士爲輕乎帝怒曰卿皆我腹心乃附下罔上爲人游說邪彥博懼謝罪珪不謝曰臣本事前宮罪當死陛下矜其性命引置樞密責以忠效今疑臣以私是陛下負臣不負陛下帝默然慙遂罷明日語房玄齡曰昔武王不用夷齊宣王殺杜伯自古帝王納諫固難矣朕夙夜庶幾乎前聖昨責珪等痛自悔公等勿懲是不進諫也時珪與玄齡李靖溫彥博戴胄魏徵同輔政帝以珪善人物且知言因謂曰卿標鑒通晤爲朕言玄齡等材且自謂孰與諸子賢對曰孜孜奉國知無不爲臣不如玄齡兼資文武出將入相臣不如靖敷奏詳明出納惟允臣不如彥博濟繁治劇衆務必舉臣不如胄以諫諍爲心恥君不及堯舜臣不如徵至激濁揚清疾惡好善臣於數子有一日之長帝稱善而玄齡等亦以爲盡己所長謂之確論進封郡公坐漏禁近語左除同州刺史帝念名臣俄召拜禮部尚書兼魏王泰師王見之爲先拜珪亦以師自居王問珪何以爲忠孝珪曰陛下王之君事思盡忠陛下王之父事思盡孝忠孝可以立身可以成名王曰忠孝既聞命矣願聞所習珪曰漢東平王蒼稱爲善最樂願王志

之帝聞喜曰兒可以無過矣子敬直尚南平公主是時諸主下嫁以帝女貴未嘗行見舅姑禮珪曰主上循法度吾當受公主謁見豈爲身榮將以成國家之美於是與夫人坐堂上主執筭盥饋乃退其後公主降有舅姑者備婦禮本於珪十三年病帝遣公主就第省視復遣民部尚書唐儉增損藥膳卒年六十九帝素服哭別次詔魏王率百官臨哭贈吏部尚書諡曰懿珪少孤且貧乏或饋遺初無讓及貴厚報之雖已亡必酬贖其家性不苟察臨官務舉綱維去甚不可者至僕妾亦不見喜愠奉寡嫂家事咨而後行教撫孤姪雖其子不過也宗族匱乏周卹之薄於自奉獨不作家廟四時祭于寢爲有司所劾帝爲立廟媿之不罪也世以珪儉不中禮少之始隱居時與房玄齡杜如晦善母李嘗曰而必貴然未知所與游者何如人而試與偕來會玄齡等過其家李闕大驚敕具酒食歡盡日喜曰二客公輔才汝貴不疑敬直封南城縣男後坐交皇太子承乾徙嶺外珪孫燾性至孝爲徐州司馬母有疾彌年不廢帶視絮湯劑數從高醫游遂窮其術因以所學作書號外臺祕要討釋精明世寶焉歷給事中鄴郡太守治聞於時旭見酷吏傳

薛收字伯襄蒲州汾陰人隋內史侍郎道衡子也出繼從父孺年十二能屬文以父不得死於隋不肯仕郡舉秀才不應聞高祖興遁入首陽山將應義舉通守堯君素覺之迎置其母城中收不得去及君素東

連王世克遂挺身歸國房玄齡亟言之秦王王召見問方略所對合旨授府主簿判陝東大行臺金部郎中是時方討世克軍事繁綜收爲書檄露布或馬上占辭該敏如素構初不竄定竄建德來援諸將爭言斂軍以觀賊形勢收獨曰不然世克據東都府庫盈衍其兵皆江淮選卒正苦乏食爾是以求戰不得爲我所持今建德身總衆以來必飛轂轉糧更相資哺兩賊連固則伊洛間勝負未可歲月定也不若勒諸將嚴兵締壘浚其溝防戒毋出兵大王親督精銳據成臯厲兵按甲邀建德路彼以疲老當吾堂堂之鋒一戰必舉不旬日二賊可縛致麾下矣王曰善遂禽建德降世克王入觀隋宮室且嘆煬帝無道殫人力以事奢侈收進曰峻宇彫牆殷辛以亡土階茅茨唐堯以昌始皇興阿房而秦禍速文帝罷露臺而漢祚承後主曾不是察奢虐是矜死一夫之手爲後世笑何此之能保哉王重其言俄受天策府記室參軍從平劉黑闥封汾陰縣男嘗上書諫王止畋獵王答曰覽所陳知成我者卿也明珠兼乘未若一言今賜黃金四十錠武德七年寢疾王遣使臨問相望於道命輿疾至府親舉袂撫之論敘生平感激涕泗卒年三十三王哭之慟與其從兄子元敬書曰吾與伯襲共軍旅間何嘗不驅馳經略款曲襟抱豈期一朝成千古也且家素貧而子幼善撫安之以慰吾懷因遣使弔祭贈帛三百段其後國學士像歎其早死不得與既卽位語房玄齡曰收若在朕當以中書令處之又嘗夢收如平生賜其家粟帛貞觀七年贈定州刺史

二一 魏七十九 世

承徽中又贈太常卿陪葬昭陵子元超九歲襲爵及長好學善屬文尚巢王女和靜縣主累授太子舍人高宗卽位遷給事中數上書陳當世得失帝嘉納轉中書舍人弘文館學士省中有盤石道衡爲侍郎時常據以草制元超每見輒泣然流涕以母喪解奪服授黃門侍郎檢校太子左庶子所薦豪俊士若任希古高智周郭正一王義方孟利貞鄭玄挺崔融等皆以才自名於時累拜東臺侍郎李義府流瀋州舊制流人不得乘馬元超爲請坐貶簡州刺史歲餘又坐與上官儀文章款密流嶺州上元初赦還拜正諫大夫三年遷中書侍郎同中書門下三品帝校獵溫泉諸蕃酋長得持弓矢從元超奏夷狄野心而使挾兵在圍中非所宜帝納可嘗宴諸王召元超與從容謂曰任卿中書監藉多人哉俄拜中書令兼左庶子帝幸東都留輔太子監國手敕曰朕留卿若失一臂顧太子未習庶務關中事卿悉專之時太子射獵詔得入禁禦故太子稍怠政事元超諫曰內苑之地繚叢薄昌翳蒼絕磴險塗殿下載輕禽逐狡兔銜櫛之變詎無可虞又戶奴多反逆餘族或夷狄遺醜使兇謀竊發將何以禦哉夫爲人子者不登高不臨深謂其近危辱也天皇所賜書戒丁寔惟殿下罷馳射之勞留情墳典豈不美歟帝知之遣使厚賜慰其意召太子還東都帝疾劇政出武后因陽暗乞骸骨加金紫光祿大夫卒年六十二贈光祿大夫秦州都督陪葬乾陵子曜聖祿中附會張易之官正諫大夫元敬隋選部郎邁之子與收及族兄德音齊名世稱

河東三鳳收爲長雛德音爲鸞元敬年最少爲雛雛武德中爲祕書郎天策府參軍直記室文學館學士是時收與房杜處心腹之寄更相結附元敬謹畏未嘗申款曲如晦嘆曰小記室不可得而親不可得而疏秦王爲皇太子除舍人於是軍國之務總於東宮而元敬掌文翰號稱職卒于官

穆字嗣通衡曾孫擢進士第累遷禮部郎中中書舍人與從祖兄曜更踐兩省俱以辭章自名景龍末爲諫議大夫昭文館學士初貞觀永徽間虞世南褚遂良以書顯家後莫能繼穆外祖魏徵家多藏虞褚書故銳精臨倣結體適麗遂以書名天下畫又絕品睿宗在藩喜之以其子伯陽尚仙源公主及踐阼遷太常少卿封晉國公實封三百戶會鍾紹京爲中書令穆諷使讓因入言於帝曰紹京本胥史無素才望今特以勳進師長百僚恐非朝廷具瞻之美帝然之遂許紹京讓改戶部尚書翌日遷穆黃門侍郎參知機務與崔日用數爭事帝前罷爲左散騎常侍歷太子少保禮部尚書帝以翊贊功每召入宮中與決事恩絕羣臣竇懷貞誅穆以知本謀賜死萬年獄年六十五伯陽爲駙馬都尉安邑郡公別食實封四百戶穆死坐貶晉州員外別駕又流嶺表自殺伯陽子談尚玄宗恆山公主拜駙馬都尉光祿員外卿

馬周字賓王博州茌平人少孤家窶狹嗜學善詩春秋資曠邁鄉人以無細謹薄之武德中補州助教不治事刺史達奚恕數咎讓周乃去客密州趙仁本高其才厚以裝使入關留客汴爲浚儀令崔實所辱遂

感激而西舍新豐逆旅主人不之顧周命酒一斗八升悠然獨酌衆異之至長安舍中郎將常何家貞觀五年詔百官言得失何武人不涉學周爲條二十餘事皆當世所切太宗怪問何何曰此非臣所能家客馬周教臣言之客忠孝人也帝卽召之間未至道使者四輩敦趣及謁見與語帝大悅詔直門下省明年拜監察御史奉使稱職帝以何得人賜帛三百匹周上疏曰臣每讀前史見賢者忠孝事未嘗不廢卷長想思履其迹臣不幸早失父母犬馬之養已無所施顧來事可爲者惟忠義而已是以徒步二千里歸于陛下陛下不以臣愚擢臣不次竊自惟念無以論報輒竭區區惟陛下所擇臣伏見大安宮在宮城右牆宇門闕方紫極爲卑小東宮皇太子居之而在內大安至尊居之反在外太上皇雖志清儉愛惜人力陛下不敢違而蕃夷朝見四方觀聽有不足焉臣願營雉堞門觀務從高顯以稱萬方之望則大孝昭矣臣伏讀明詔以二月幸九成宮竊惟太上皇春秋高陛下宜朝夕視膳今所幸宮去京三百里而遠非能旦發暮至也萬一有太上皇思感欲卽見陛下何以速之今茲本爲避暑行也太上皇留熱處而陛下走涼處溫清之道臣所未安然詔書既下業不中止願示還期以開衆惑臣伏見詔宗室功臣悉就藩國遂貽子孫世守其政竊惟陛下之意誠愛之重之欲其裔緒承守與國無疆也臣謂必如詔書者陛下宜思所以安存之富貴之何必使世官也且堯舜之父有朱均之子若令有不肖子襲封嗣職兆庶被殃國家蒙

愚正欲絕之則子文之治猶在也正欲存之則樂厲之惡已暴也必曰與其毒害於見存之人寧割恩於已亡之臣則向所謂愛之重之者適所以傷之也臣謂宜賦以茅土疇以戶邑必有材行隨器而授雖幹翮非彊亦可以免累漢光武不任功臣以吏事所以終全其世者良得其術也願陛下深思其事使得奉大恩而子孫終其福祿也臣聞聖人之化天下莫不以孝爲本故曰孝莫大於嚴父嚴父莫大於配天國之大事在祀與戎孔子亦言吾不與祭如不祭是聖人之重祭祀也自陛下踐祚宗廟之享未嘗親事竊惟聖情以乘輿一出所費無執故忍孝思以便百姓而一代史官不書皇帝入廟將何以貽厥孫謀示來葉邪臣知大孝誠不在俎豆之間然聖人訓人必以己先之示不忘本也臣聞致化之道在求賢審官孔子曰惟名與器不可以假人是言慎舉之爲重也臣伏見王長通白明達本樂工與卓雜類韋榮提斛斯正無他材獨解調馬雖術踰等夷可厚賜金帛以富其家今超授高爵與外廷朝會駟豎倡子鳴玉曳履臣竊恥之若朝命不可追改尙宜不使在列與士大夫爲伍帝善其言除侍御史又言臣歷觀夏商周漢之有天下傳祚相繼多者八百餘年少者猶四五百年皆積德累業恩結於人豈無儼王賴先哲以免自魏晉逮周隋多者五六十年少者三二十年而亡良由創業之君不務仁化當時僅能自守後無遺德可思故傳嗣之主其政少衰一夫大呼天下土崩矣今陛下雖以大功定天下而積德日淺固當隆禹湯文

武之道使恩有餘地爲子孫立萬世之基豈特持當年而已然自古明王聖主雖因人設教而大要節儉於身恩加於人故其下愛之如父母仰之如日月畏之如雷霆卜祚遐長而禍亂不作也今百姓承喪亂之後比於隋時纔十分一而徭役相望兄去弟還往來遠者五六千里春秋冬夏略無休時陛下雖詔減省而有司不得廢作徒行文役之如故四五年來百姓頗嗟怨以爲陛下不存養之堯之茅茨土階禹之惡衣菲食臣知不可復行於今漢文帝惜百金之費而罷露臺集上書囊以爲殿帷所幸慎夫人衣不曳地景帝亦以錦繡纂組妨害女工特詔除之所以百姓安樂至孝武帝雖窮奢極侈承文景遺德故人心不搖向使高祖之後卽值武帝天下必不能全此時代差近事迹可見今京師及益州諸處營造供奉器物并諸王妃主服飾皆過靡麗臣聞昧且丕顯後世猶怠作法於治其弊猶亂陛下少處人間知百姓辛苦前代成敗目所親見尙猶如此而皇太子生長深宮不更外事卽萬歲後聖慮之所當憂也臣竊尋自古黎庶怨叛聚爲盜賊其國無不卽滅人主雖悔未有重能安全者凡修政教當修之於可修之時若事變一起而後悔之無益也故人主每見前代之亡則知其政教之所由喪而不知其身之失故紂笑桀之亡而幽厲笑紂之亡隋煬帝又笑齊魏之失國也今之視煬帝猶煬帝之視齊魏也往貞觀初率土荒儉一匹絹纔易斗米而天下帖然者百姓知陛下憂憐之故人人自安無謗讟也五六年來頻歲豐稔一匹

絹易粟十餘斛而百姓咸怨以爲陛下不憂憐之何則今營爲者多不急之務故也自古以來國之興亡不由積畜多少在百姓苦樂也且以近事驗之隋貯洛口倉而李密因之積布帛東都而王世充據之西京府庫亦爲國家之用向使洛口東都無粟帛王世充李密未能必聚大眾但貯積者固有國之常要當人有餘力而後收之豈人勞而強斂之以資寇邪夫儉以息人貞觀初陛下已躬爲之今行之不難也爲之一日則天下知之式歌且舞矣若人旣勞而周之不息萬一中國水旱而邊方有風塵之警狂狡竊發非徒旰食晏寢而已古語云動人以行不以言應天以實不以文以陛下之明誠欲厲精爲政不煩遠采上古但及貞觀初則天下幸甚昔賈誼謂漢文帝云可痛哭及長歎息者言當韓信王楚彭越王梁英布王淮南之時使文帝卽天子位必不能安又言賴諸王年少傅相制之長大之後必生禍亂後世皆以誼言爲是臣竊觀今諸將功臣陛下所與定天下無威略振主如韓彭者而諸王年並幼少縱其長大陛下之日必無他心然則萬代之後不可不慮漢晉以來亂天下者何嘗不在諸王皆由樹置失宜不豫爲節制以至滅亡人主豈不知其然溺於私愛爾故前車旣覆而後車不改轍也今天下百姓尙少而諸王已多其寵遇過厚者臣愚慮之非特恃恩驕矜也昔魏武帝寵陳思王文帝卽位防守禁閉同獄囚爲何則先帝加恩太多故嗣主疑而畏之也此武帝寵陳思王適所以苦之也且帝子身食大國何患不富而歲

別優賜曾無限極里語曰貧不學儉富不學奢言自然也今大聖創業豈唯慮置見子弟而已當制長久之法使萬代奉行臣聞天下者以人爲本必也使百姓安樂在刺史縣令爾縣令旣衆不能皆賢但州得良刺史可矣天下刺史得人陛下端拱殿廊之上夫復何爲古者都守縣令皆選賢德欲有所用必先試以臨人或由二千石高第入爲宰相今獨重內官縣令刺史頗輕其選又刺史多武夫勳人或京官不稱職始出補外折衝果毅身力彊者入爲中郎將其次乃補邊州而以德行才術擢者十不能一所以百姓未安殆在于此疏奏帝稱善擢拜給事中轉中書舍人周善敷奏機辯明銳動中事會裁處周密時譽歸之帝每曰我豈不見周卽思之岑文本謂所親曰馬君論事會文切理無一言可損益聽之纒纒令人忘倦蘇張終賈正應此耳然鸞肩火色騰上必速恐不能久俄遷治書侍御史兼知諫議大夫檢校晉王府長史王爲皇太子拜中書侍郎兼太子右庶子十八年遷中書令猶兼庶子時置太子司議郎帝高其除周嘆曰限吾資品妄高不得歷此官帝征遼留輔太子定州及還攝吏部尙書進銀青光祿大夫帝嘗以飛帛書賜周曰鸞鳳冲霄必假羽翼股肱之寄要在忠力周病消渴連年帝幸翠微宮求勝地爲構第每詔尙書食具膳上醫使者視護躬爲調藥太子問疾疾甚周取所上章奏悉焚之曰管晏暴君之過取身後名吾不爲也二十二年卒年四十八贈幽州都督陪葬昭陵初帝遇周厚周頗自負爲御史時遣人以

圖購宅衆以其興書生素無賞皆竊笑它日自有佳宅直二百萬周遽以聞詔有司給直并賜奴婢什物由是人乃悟周每行郡縣食必進雞小吏訟之帝曰我禁御史食肉恐州縣廣費食雞尙何與榜吏斥之及領選猶廢浚儀令先是京師晨暮傳呼以警衆後置鼓代之俗曰鼙鼙鼓品官舊服止黃紫於是三品服紫四品五品朱六品七品綠八品九品青城門入由左出由右飛驛以達警急納居人地租宿衛大小番直截驛馬尾城門衛舍守捉士月散配諸縣各取一以防其過皆周建白自周亡帝思之甚將假方士術求見其儀形高宗卽位追贈尙書右僕射高唐縣公垂拱中配享高宗廟廷子載咸亨中爲司列少常伯與裴行儉分掌選事言吏部者稱裴馬焉終雍州長史

贊曰周之遇太宗顧不異哉由一介草茅言天下事若素宦于朝明習憲章者非王佐才疇以及茲其自視與築巖釣渭亦何以異迹夫帝銳于立事而周所建皆切一時以明佐聖故君宰間不膠漆而固恨相得晚宜矣然周才不逮傳說呂望使後世未有迹焉惜乎

韋挺京兆萬年人父冲仕隋爲民部尙書挺少與隱太子善高祖平京師署隴西公府祭酒累遷太子左衛驃騎檢校左衛率太子遇之厚宮臣無與比武德七年帝避暑仁智宮或言太子與宮臣謀逆又慶州刺史楊文幹坐大逆誅連東宮帝專責宮臣由是挺與杜淹王珪等皆流越巂未幾召拜主爵郎中貞

觀初王珪數薦之遷尙書右丞歷吏部黃門侍郎拜御史大夫扶陽縣男太宗謂挺曰卿之任大夫獨朕意左右無爲卿地者挺曰臣驚下不足以辱高位且非勳非舊而在藩邸故僚上願後臣以勳立功者不聽是時承隋大亂風俗薄惡人不知教挺上疏曰父母之恩昊天罔極創巨之痛終身何已今衣冠上族辰日不哭謂爲重喪親賓來弔輒不臨舉又閭里細人每有重喪不卽發問先造邑社待營辦具乃始發哀至假車乘履棺槨以榮送葬旣葬隣伍會集相與酣醉名曰出孝夫婦之道王化所基故有三日不息燭不舉樂之感今昏嫁之初雜奏絲竹以窮宴歡官司習俗弗爲條禁望一切懲革申明禮憲俄復爲黃門侍郎兼魏王泰府事時泰有寵太子多過失帝密欲廢立語杜正倫正倫以漏言貶帝謂挺曰不忍復置卿于法改太常卿初挺爲大夫時馬周爲監察御史挺不甚禮及周爲中書令帝欲渝拭用之周言挺恨于自用非宰相器遂止帝將討遼東擇主餉運者周言挺才仕羸使帝謂然挺父故爲營州總管嘗經略高麗故札藏家挺上之帝悅曰自幽距遼二千里無州縣吾軍靡所仰食卿爲朕圖之苟吾軍用不乏是公之功其自擇文武官四品十人爲子使取幽易平三州銳士若馬各三百以從卽詔河北列州皆取挺節度許以便宜帝親解貂裘及中廐馬賜之挺遣燕州司馬王安德行渠作漕艦轉糧自桑乾水抵盧思臺行八百里渠塞不可通挺以方苦寒未可進遂下米臺側廕之待凍泮乃運以爲解卽上言度王師

至食且足帝不悅曰兵竄拙速無工遲我明年師出挺乃度它歲運何哉卽詔繁時令韋懷質馳按懷質還劾挺在幽州日置酒弗愛職不前視渠長利卽造船行粟綿八百里乃悟非是欲進則不得還且水涸六師所須恐不如陛下之素帝怒遣將少監李道裕代之敕治書侍御史唐臨馳傳械挺赴洛陽廢爲民使白衣從帝破蓋牟城詔挺將兵鎮守示復用城與賊新城接日夜轉鬪無休時挺以失職內不平作書謝所善公孫常善數者也以他事繫投纆死索案中得挺書言所屯危感意怨望貶象州刺史歲餘卒年五十八子待價萬石

待價初爲左千牛備身永徽中江夏王道宗得罪待價以壻貶盧龍府果毅時將軍辛文陵招慰高麗次吐護真水爲虜所襲待價與中郎將薛仁貴率所部兵殺之文陵亦苦戰遂免待價重創矢著左足隱不言卒以疾免起爲蘭州刺史吐蕃盜邊高宗以沛王賢爲涼州大都督而待價爲司馬俄遷肅州刺史以功召拜右武衛將軍儀鳳三年吐蕃復入寇以待價檢校涼州都督兼知鎮守兵馬事召還封扶陽侯武后臨朝攝司空護營乾陵改天官尙書同鳳閣鸞臺三品待價起武力典選無銓總才故朝野共貴薄之俄爲燕然道行軍大總管禦突厥踰年還拜文昌右相同鳳閣鸞臺三品不自安累表辭職不聽且請盡力行陣許之於是拜安息道行軍大總管督三十六總管以討吐蕃進爵公軍至寅識迦河與吐蕃台戰

勝負略相當會其副閻温古逗留又天大寒待價不善撫御師人多死餽道乏乃旋師頓高昌后大怒斬温古流待價繡州卒曾孫武

武少孤年十一廢補右千牛累遷長安丞德宗幸梁州委妻子奔行在除殿中侍御史戶部侍郎元琇爲水陸轉運使表武以倉部員外郎充判官謀不用杜門數月而琇敗轉刑部員外郎是時帝以反正告郊廟大兵後典章苟完執事者時時咨武武酌宜約用得禮之衷羣司奉焉後爲絳州刺史鑿汾水灌田萬三千餘頃墾書勞勉憲宗時入爲京兆尹護治豐陵未成卒贈吏部尙書

萬石頗涉學善音律上元中遷累太常少卿當時郊廟燕會樂曲皆萬石與太史令姚元辯增損之號任職始萬石奏太樂博士弟子遭喪者先無它業請以卒哭追集侍御史劉思立劾奏萬石曰移風易俗莫善於樂睦親化人莫善於孝所以三年之禮天下通喪今遣音聲人釋服爲樂帶經治音豈以小人不能執禮遂欲約爲非法萬石官太常首紊風化請付吏論罪高宗方委任萬石罷其奏後知吏部選事卒于

官

贊曰王者用人非難盡其才之爲難觀太宗之責任也謀斯從言斯聽才斯奮洞然不疑故人臣未始遺力天子高拱操成功致太平矣始皆奮亡命布衣嬪然列置上衰薛收雖番天帝本以中書令待之御臣

之方顧不善哉擬晚節流落蓋有致而然

唐書卷九十八

唐書卷九十九

宋 端 明 殿 學 士 宋 祁 撰

列傳第二十四

二李戴劉崔

李綱字文紀觀州蓨人少慷慨尚風節始名瑗慕張綱為人改焉仕周爲齊王憲參軍事宣帝將殺憲召僚屬誣左其罪綱矢死無撓辭及憲誅露車載尸故吏犇匿綱撫棺號慟爲瘞訖乃去事隋爲太子洗馬太子勇宴宮臣左庶子唐令則奏琵琶又歌武媚娘曲綱曰令則官調護乃自比倡優進淫聲惑視聽誠使上聞之豈不爲殿下累乎臣請正其罪勇曰置之我欲爲樂耳後勇廢文帝切讓官屬無敢對綱獨曰陛下不素教故太子至此太子資中人得賢者輔而善得不肖導而惡奈何歌舞鷹犬纖兒使日侍側何特太子罪邪帝曰以汝爲洗馬何不擇人綱曰臣非東宮得言者帝曰朕過矣擢尚書右丞時楊素蘇威用事綱据正不諛迎隨素等多憾會大將軍劉方討林邑素言林邑多珍寶非綱不可任遂署行軍司馬方揣素指數危辱之幾殆軍還不得調稍除齊王府司馬復詔出南海應接林邑久不召乃身入奏威劾綱擅去所部以屬吏會赦免屏居鄠大業末賊帥何潘仁劫爲長史高祖平京師綱上謁授丞相府司錄

參軍封新昌縣公領選舉受禪拜禮部尚書兼太子詹事齊王元吉爲并州總管縱左右攘奪民愁苦宇文欲諫不聽騰狀顯言王坐免俄而復留下危懼劉武周入太原元吉懼棄軍奔京師并州陷帝怒謂綱曰王年少不習事故以欲及寶誕佐之太原興王地兵十萬粟支十年奈何一旦棄去欲建此計我當斬于軍綱曰王過惡誕養成之欲事王淺有闕必諍今賴欲計使陛下不失愛子且有功又可加罪乎翼曰帝悟引綱升御榻勞曰卿不言我幾濫罰於是釋欲然猶貸誕也帝以舞工安叱奴爲散騎常侍綱諫曰周家均工樂胥不得預士伍雖復妙如師襄才如子野皆繼世不易業故魏武使禰衡擊鼓衡先解朝衣曰不敢以先王法服爲伶人衣齊高緯封曹妙達爲王以安馬駒開府有國家者可爲鑒戒今新造天下開太平之基功臣賞未及偏高才猶伏草茅而先令舞胡鳴玉曳組位五品趨丹地殆非創業垂統貽子孫之道也帝不納綱在東宮太子建成尤加禮嘗游溫湯綱疾不從有進魚者太子使膾之唐儉趙元楷自言其能太子曰操刀膾鯉和鼎味公等善之若弼諧審諭固屬綱矣遣使賜絹二百匹後太子寢狎亡賴猜問朝廷綱頓諫不見聽遂乞骸骨帝罵曰卿爲潘仁長史而羞朕尚書邪綱頓首曰潘仁賊也志殘殺然每諫輒止爲其長史故無愧陛下功成厚自伐臣言如持水內石敢久爲尚書乎且臣事東宮東宮又與臣忤是以上印綬帝謝曰知公直士幸卒輔吾兒乃拜太子少保尚書詹事如故綱上書太子曰綱

老矣幸未就木備位保傅冀得効愚鄙曰殿下飲酒過量非養生之道凡爲人子務孝謹以慰上心不宜聽受邪說與朝廷生忌問太子覽書不懌所爲益縱綱悒悒不自賴因請老優詔解尚書帝以綱隋名臣手敕未嘗名貞觀四年復爲少師以足疾賜步輿聽乘至閤問以政事詣東宮太子承乾爲拜每聽政必詔綱與房玄齡王珪侍坐嘗言曰託六尺之孤寄百里之命古人爲難綱以爲易故發言陳事毅然不可奪及疾帝遣玄齡至家存問明年卒年八十五贈開府儀同三司諡曰貞太子爲立碑初齊王憲女薨居綱厚卹之及卒女被髮號哭如喪其親然綱在隋宦不進筮之得鼎筮人曰君當爲卿輔然待易姓乃如志仕不知退折足爲敗故綱雖顯於唐數稱疾辭位云孫安仁安靜安仁永徽中爲太子左庶子太子忠廢還邸寮屬奔散獨安仁泣拜而去終桓州刺史安靜天授中爲右衛將軍武氏革命羣臣皆勸進安靜獨無所請及收繫獄來俊臣問狀安靜曰正以我唐舊臣殺之可也若詰其狀吾誰欺俊臣誣殺之會昌中錄忠臣後訪子孫已絕乃贈安靜太子少師自綱五世同居安仁安靜復以義烈聞世稱李氏不衰李大亮京兆涇陽人祖瑒爲魏度支尚書大亮有文武才略隋末署龐玉行軍兵曹李密寇東都玉戰敗大亮被擒賊將張弼異之就執百餘餘皆死獨釋大亮引與語遂定交高祖入關大亮自歸授土門令方歲饑境多盜賊大亮招亡散撫貧瘠賣所乘馬稍稍資業之勸墾田歲大熟間出擊盜所至輒平秦王行

北境下書獎勞賜馬五乘帛五十段頃之胡賊大至大亮度不能拒乃單馬詣營說豪帥為分別禍福賊衆感服遂相率降大亮殺所乘馬與之食至步而返帝聞之悅擢金州總管府司馬王弘烈據襄陽詔大亮安撫樊鄧因圖之進擊下十餘城遷安州刺史復使徇廣州至九江會輔公祐反以計禽其將張善安公祐方圍猷州刺史左難當固守大亮率兵擊走之遷越州都督貞觀初徙交州封武陽縣男召授太府卿復出涼州都督嘗有臺使見名鷹諷大亮獻之大亮密表曰陛下絕畋獵久矣而使者求鷹信陛下意邪乃乖昔旨如其擅求是使非其才太宗報書曰有臣如此朕何憂古人以一言之重訂千金今賜胡瓶一雖亡千鎰乃朕所自御又賜荀悅漢紀曰悅論議深博極為政之體公宜繹味之時突厥亡帝遂欲懷四夷諸部降者人賜袍一領帛五匹首領拜將軍中郎將列五品者贏百員又置降胡河南詔大亮為西北道安撫大使使以綏大度設拓泥熟特勒及七姓種落之未附者峙糧積口賑其饑大亮上言臣聞欲綏遠者必自近中國天下本根四夷猶枝葉也殘本根厚枝葉而曰求安未之有也屬者突厥傾國入朝陛下不即俘江淮變其俗而加賜物帛悉官之引處內地豈久安計哉今伊吾雖臣遠在荒鹵臣以為諸稱藩請附者宜羈縻受之使吾塞外畏威懷德永為藩臣謂之荒服者故臣而不內所謂行虛惠收實福河西積困夷狄州縣蕭條加因陷亂殘耗已甚臣愚願停招慰省勞役使邊人得就農晦此中國利也

帝納其計八年為劍南道巡省大使會討吐谷渾為河東道行軍總管與李靖俱出北道涉青海觀河源與虜遇蜀渾山大戰破之俘其名王獲雜畜數萬進爵為公拜右衛大將軍晉王為皇太子詔大亮兼右衛率又兼工部尚書身三職宿衛兩宮每番直常假寐帝勞曰公在我得酣臥十八年幸洛陽詔副房玄齡居守玄齡稱有王陵周勃節可倚大事俄寢疾帝親和藥驛賜之臨終表請罷遼東役又言京師宗廟所在願以關中為意就橐欵曰吾聞男子不死婦人手命屏左右言終卒年五十九將斂家無珠玉為舍惟貯米五斛布三十端帝哭為慟贈兵部尚書秦州都督諡曰懿陪葬昭陵大亮性忠謹外若不能言而內剛烈不可干非其義對天子爭是非無回撓至妻子未始見愠容事兄嫂以禮聞位通顯居陋狹甚在越州寫書數百卷及去留都督署初破公祐以功賜奴婢百口謂曰而曹皆衣冠子女不幸破亡吾何忍錄而為隸乎縱遣之高祖聞咨美更賜僮婢二十後破吐谷渾復賜奴婢百五十口悉以遺親戚葬宗族無後者三十餘柩贊襚加焉嘗以張弼脫其死及貴念有以報之時弼為將作丞匿不見大亮求之不能得一日識諸涂持弼泣悉推家財與之弼拒不受乃言於帝曰臣及事陛下張弼力也願悉臣官爵授之帝為遷弼中郎將代州都督世皆賢大亮能報而多弼不自伐也歿後所育孤姓為大亮行服如所親者十餘人兄子道裕貞觀末為將作匠有告張亮反者詔百官議皆言亮當誅獨道裕謂反形未具帝怒不

暇省斬之歲餘刑部侍郎缺宰相屢進名不可帝曰朕得之矣是嘗議張亮者朕時雖不從今尚悔之遂命道裕終大理卿大亮族孫迴秀

迴秀字茂之及進士第又中英才傑出科調相州參軍事累轉考功員外郎武后愛其材遷鳳閣舍人大足初檢校夏官侍郎仍領選銓沈文武號稱職進同鳳閣鸞臺平章事張易之兄弟貴驕因撓意諧媚士論頓減俄坐賊貶廬州刺史易之誅貶衡州長史中宗卽位召授將作少監累遷鴻臚卿修文館學士出朔方道行軍大總管還拜兵部尚書卒年五十贈侍中迴秀少聰悟多通賓客喜飲酒雖多不亂當時稱其風流母少賤妻嘗冒媵婢母聞不樂迴秀卽出其妻或問之答曰娶婦要欲事姑苟違顏色何可留武后嘗遣內人候其母或迎置宮中後所居堂產芝草犬乳鄰猫中宗以爲孝感旌大門閭子齊損開元中以謀逆誅

戴胄字玄膺相州安陽人姓堅正幹局明彊善簿最隋末爲門下錄事納言蘇威黃門侍郎裴矩厚禮之爲越王侗給事郎王世充謀篡胄說曰君臣大分均父子休戚同之公當社稷之任與存與亡正在今日願尊輔王室擬伊周以幸天下世充跪曰善俄脅九錫胄又切諫不納出爲鄭州長史使與王行本守武牢秦王攻拔之引爲府士曹參軍封武昌縣男大理少卿缺太宗曰大理人命所繫胄清直其人哉卽日

二號八批

命胄長孫無忌被召不解佩刀入東上閣尚書右僕射封德彝論監門校尉不覺罪當死無忌贖胄曰校尉與無忌罪均臣子於尊極不稱誤法著御湯劑飲食舟舩雖誤皆死陛下錄無忌功原之可也若罰無忌殺校尉不可謂刑帝曰法爲天下公朕安可阿親戚詔復議德彝固執帝將可胄曰不然校尉緣無忌以致罪法當輕若皆誤不得獨死繇是與校尉皆免時選者盛集有詭資蔭冒牒取調者詔許自首不首罪當死俄有詐得者獄具胄以法當流帝曰朕詔不首者死而今常流是示天下不以信卿竇獄邪胄曰陛下登殺之非臣所及旣屬臣敢虧法乎帝曰卿自守法而使我失信奈何胄曰法者布大信於人言乃一時喜怒所發陛下以一朝忿將殺之旣知不可而實於法此忍小忿存大信也若阿忿違信臣爲陛下惜之帝大感寤從其言胄犯顏據正數查參處法意至析秋豪隨類指隨言若泉涌帝益重之遷尚書左丞矜其貧特詔賜錢十萬會僕射蕭瑀免封德彝卒帝謂胄曰尚書總國綱維失一事天下有受其弊者今以令僕委卿宜副朕舉胄明敏長于操決無宿疑議者美其振職謂武德以來殆無其輩復拜諫議大夫與魏徵更日供奉進民部尚書杜如晦遺言請以選舉委胄由是檢校吏部尚書然好抑文雅獎法吏時以寡學爲訾貞觀四年以本官參豫朝政進爵郡公帝將修復洛陽宮胄上疏諫曰比關中河外置軍團疆夫富室悉爲兵九成之役又興司農將作見丁無幾大亂之後戶口單破一人就役舉室捐業籍軍

者督戎仗課役者責糧糶竭貲經紀猶不能濟七月以來霖潦未止濱河南北田正淹下年之有亡未可知壯者盡行賦調不給則帑藏虛矣今宮殿足庇風雨容羽衛數年後成猶不謂晚何憚而遽自生勞擾邪帝覽奏罷役宵所敷內緣政得失咸有可觀奏已卽削稟祕外莫知帝嘗謂左右曰宵於我非肺腑親然事之機切無不聞惟其忠槩所激耳七年卒帝爲舉哀贈尚書右僕射追封道國公諡曰忠以第舍陋不容祭詔有司爲立廟聘其女爲道王妃房玄齡魏徵與宵善每至生平故處輒流涕宵無子以兄子至德爲後

至德乾封中累遷西臺侍郎同東西臺三品閔十數年父子繼爲宰相世詭其榮高祖嘗爲飛白書賜侍臣賜至德曰汎洪源俟舟楫郝處俊曰飛九霄假六翮李敬玄曰資啟沃罄丹誠崔知悌曰仗忠節贊皇猷皆見意於辭云遷尚書右僕射時劉仁軌爲左人有所訴率優容之至德乃詰究本末理直者密爲奏終不顯私恩由是當時多稱仁軌者號仁軌爲解事僕射嘗更日聽訟有嫗詣省至德已收牒嫗乃復取曰初以爲解事僕射今乃非至德笑還之人伏其長者或以問至德答曰慶賞刑罰人主之柄爲臣豈得與人主爭也帝知歎美之儀鳳四年卒詔百官哭其第贈開府儀同三司并州大都督諡曰恭

劉洎字思道荊州江陵人初爲蕭銑黃門侍郎南略地嶺表下五十城未還而銑敗遂以城自歸授南康州都督府長史貞觀七年遷給事中封清苑縣男轉治書侍御史於時尚書省詔敕稽雍按成復下彌年不能決洎言尚書萬機本貞觀初未有合僕職併務繁左丞戴胄右丞魏徵應事彈舉無所回撓百司震肅不敢懈比者勳親在位品非其任功勢相傾雖欲自彊先懼讒謗故郎中嚙奪惟事咨稟尚書依違不得專裁斲轉玩弛綱紀不振今宜精選左右丞兩司郎中使皆得人非惟救曠滯之弊固當矯趨競也未幾拜尚書右丞洎健于職於是尚書復治如徵時累加銀青光祿大夫散騎常侍攝黃門侍郎太宗好持論與公卿言古今事必往復難詰究臧否洎諫曰帝王之與臣庶聖哲之與庸愚等級遠絕勢不倫擬故課愚對聖持卑抗尊雖思自彊不可得已陛下降慈旨假柔顏虛心聽納猶恐羣臣惴縮不敢進況以神機天辯飾辭援古而追其議哉夫天以無言爲尊聖以不言爲德皆弗欲煩也且多記損心多語耗氣心氣內損形神外勞初雖無覺久且爲弊且今之雍平陛下力行所至耳欲求長久匪由辨博但當忘愛憎慎取捨若貞觀初可矣手詔答曰非慮無以臨下非言無以述慮雖然驕人輕物恐由權論致之若形神心氣不爲勞也皇太子初立洎謂宜尊賢重道上書曰太子宗祧是繫善惡之習興亡在焉弗勤于始將悔于末故竊錯上書今通政術賈誼奏計務知禮教今太子孝友仁愛擬自天姿然春秋鼎盛學當有漸以陛下多才多藝尙垂精厲志以博異聞而太子優游坐棄白日陛下每推朝引見羣臣訪以今古咨

以得失而太子處內不接正人不聞正論臣所未諭古者聞安而退以廣敬也異宮而處以遠嫌也聞者太子一入侍逾旬不出師傳察案具員而已非所謂愛之也臣愚以爲授以良書娛以佳賓使耳所未聞睹所未見儲德愈光羣生之福也帝於是敕洎與岑文本馬周遞日直東宮帝嘗怒苑西監穆裕有詔斬朝堂皇太子驟諫帝喜曰朕始得魏徵朝夕進諫徵亡劉洎岑文本馬周褚遂良繼之兒在吾膝前見朕悅諫熟矣故有今日言也誠習以性成哉稍遷侍中帝忽謂羣臣曰朕今欲聞己過卿等爲朕言之長孫無忌李勣楊師道同辭對曰陛下以盛德致太平臣等愚不見其過洎曰然頃上書有不稱旨或面窮詰無不羞汗恐非所以進言者路帝曰卿言善朕能改之及征遼東詔兼太子左庶子檢校民部尙書輔皇太子監國帝曰以卿輔太子社稷安危在焉宜識朕意洎曰願無愛即大臣有罪臣謹按法誅之帝怪其語謬戒曰君不密則失臣臣不密則失身卿性疏而果恐以此敗洎與褚遂良不相中帝還不豫洎與馬周入候出見遂良泣曰上體患癰殊可懼遂良即誣奏洎曰國家不足慮正當輔少主行伊霍事大臣有異者誅之帝愈召洎問狀洎引馬周爲左遂良執不已帝惑之乃賜死方死時索筆牘欲自言有司不敢與帝後知之有司皆得罪顯慶中其子弘業詣闕訴遂良譖死狀李義府右之高宗問近臣給事中樂彥瑋曰辨之是暴先帝過刑事寢文明初詔復官爵彥瑋字德珪長安人麟德元年以西臺侍郎同東西臺

三品數月罷爲大司憲卒贈齊州都督

贊曰劉洎之才之烈易所謂王臣蹇蹇者然性剛疏輔太子欲身任安危以言掩其衆爲媚忌所乘卒陷罪誅嗚呼以太宗之明蔽於所忿洎之忠不能自申於上況其下哉古人以言爲戒可不慎歟

崔仁師定州安喜人武德初擢制舉調管州錄事參軍陳叔達薦仁師才任史官遷右武衛錄事參軍與修梁魏史貞觀初改殿中侍御史時青州有男子謀逆有司捕支黨繫獄詔仁師按覆始至悉去囚械爲具食飲湯滲以情訊之坐止魁惡十餘人它悉原縱大理少卿孫伏伽謂曰原雪者衆誰肯讓死就決而事變奈何仁師曰治獄主仁恕故諺稱殺人則足亦皆有禮豈有知枉不申爲身謀哉使吾以一介易十囚命固吾願也及敕使覆訊諸囚咸叩頭曰崔公仁恕必無枉者舉無異辭由是知名遷度支郎中嘗口陳移用費數千名太宗怪之詔黃門侍郎杜正倫持簿使仁師對唱無一謬帝奇之時校書郎王玄度注尙書毛詩抵孔鄭舊學請遂廢詔諸儒大議博士以下不能請河間王孝恭請與孔鄭並行仁師以玄度不經條不合大義者奏之玄度報罷遷給事中時有司以律反逆者緣坐兄弟沒官爲輕詔八坐議咸言漢魏晉謀反夷三族請改從死仁師曰父子天屬足累其心此而不卹何愛兄弟房玄齡曰祖有蔭孫議則孫祖親重而兄弟屬輕今因重者流而輕者死非用刑意遂不改後密請魏王爲太子失帝旨左

遷鴻臚少卿稍進民部侍郎又征遼東副韋挺知海運又別知河南漕事仁師以漕路回遠恐所輸不時至以便發近海租賦餉軍坐軍卒亡命不以聞除名帝還至中山起爲中書舍人檢校刑部侍郎幸翠微宮上清暑賦以諷帝稱善賜帛五十段二十二年遷中書侍郎參知機務被遇尤渥中書令褚遂良忌之會有伏閣訴者仁師不時上帝大怒流連州永徽初授閩州刺史卒子挹挹子湜

湜字澄瀾少以文詞稱第進士擢累左補闕稍遷考功員外郎時桓彥範等當國長武三思怙構引湜使陰拘其姦中宗稍疏功臣三思日益寵湜反以彥範等計告三思驟遷中書舍人彥範等被徙又說三思速殺之以絕人望三思問誰可使者乃進其外兄周利貞利貞往彥範等皆死擢利貞御使中丞湜附託昭容上官氏數與宣淫於外景龍二年遷兵部侍郎而挹爲禮部侍郎武德以來父子同爲侍郎惟挹湜云俄拜中書侍郎檢校吏部侍郎同中書門下平章事與鄭愔周典選納賂遺銓品無序爲御史李尚隱劾奏貶江州司馬上官與安樂公主從中申護之改襄州刺史未幾入爲尚書左丞韋氏稱制復以吏部侍郎同中書門下三品睿宗立出爲華州刺史俄除太子詹事初湜建言山南可引丹水通漕至商州自商鑛山出石門抵北藍田可通輓道中宗以湜充使開大昌關役徒數萬死者十五禁舊道不得行而新道爲夏潦奔厯數摧壓不通至是論功加銀青光祿大夫景雲中太平公主引爲同中書門下三品進拜

中書令時挹以戶部尚書得謝而性貪數爲人請詔以干湜湜多不從由是父子相失玄宗在禁宮數至其第申款密湜陰附主時人危之爲寒毛門下客獻海鷗賦以諷湜稱善而不自悛帝將誅蕭至忠等召湜示腹心弟澄諫曰上有所問慎無隱湜不從及見對問失旨至忠等誅湜徙嶺外時雍州長史李晉亦坐誅歎曰此本湜謀今我死而湜生何也又宮人元稱嘗與湜謀進醜於帝迨及荊州賜死年四十三初在襄州與譙王數相問遺王敗湜當死賴劉幽求張說護免及爲宰相陷幽求嶺表密諷廣州都督周利貞殺之不克又與太平公主逐張說其猜毒詭險殆天性雖蠶虺不若也與弟液澄從兄洸並以文翰居要官每宴私自比東晉王謝嘗曰吾一門入仕歷官未嘗不爲第一丈夫當先據要路以制人豈能默默受制於人哉故進趣不已至於敗湜執政時年三十八嘗暮出端門緩轡諷詩張說見之歎曰文與位固可致其年不可及也

液字潤甫尤工五言詩湜歎因字呼曰海子我家龜龍也官至殿中侍御史坐湜當流亡命鄂州作幽征賦以見意詞甚典麗遇赦還卒子論有吏幹乾元中爲州刺史以治行稱大厯末遷同州刺史爲驪陽使庾何所按議者不直何故復用爲衢州刺史德宗以舊族青年擢大理卿卒

澄本名滌玄宗改焉帝在藩與同里居出潞州賓友餞者止國門而澄獨從至華及即位寵昵甚湜既誅

帝仍念之用為祕書監開元二年欲贈其父挹吏部尚書宰相持不可遂用四品禮葬贈和州刺史澄侍
左右與諸王不讓席坐性滑稽善辯帝恐漏禁中語以慎密字親署笏端累遷金紫光祿大夫封寧喜縣
子卒贈兗州刺史

唐書卷九十九

唐書卷九十九考證

李大亮傳賜馬五乘○舊書作賜馬一匹

唐書卷九十九考證

唐書卷一百

宋 端 明 殿 學 士 宋 祁 撰

列傳第二十五

陳楊封裴宇文鄭權閻蔣韋姜張

陳叔達字子聰陳宣帝子也少封義陽王歷丹陽尹都官尚書入隋久不試大業中授內史舍人出為絳郡通守高祖西師以郡聽命授丞相府主簿封漢東郡公與溫大雅同筦機祕方禪代時書冊誥詔皆其筆也武德初授黃門侍郎判納言封江國公叔達明辯善為容每占奏摺紳屬目江左士客長安或汨滯多薦諸朝嘗賜食得葡萄不舉帝問之對曰臣母病渴求不能致願歸奉之帝流涕曰卿有母遺乎因賜之又賚物百段貞觀初與蕭瑀爭殿中坐忿諍不恭免官去幾居母喪又有疾太宗憂之遣使禁郤弔者喪除為遂州都督病不拜頃之擢禮部尚書始太子建成等鬪間太宗帝惑之叔達極意救辯至是謂曰武德內難卿有讜言故以此報叔達謝曰豈獨為陛下乃社稷計耳後閻薄汙慢為有司露劾帝以名臣為護掩授散秩歸第卒諡曰繆久之贈戶部尚書更諡曰忠

楊恭仁隋觀王雄子也仁壽中累遷甘州刺史臨事不苟細微人安之文帝謂雄曰匪特朕得人乃卿善

教子矣大業初轉吏部侍郎楊玄感叛詔率兵經略與玄感戰破陵敗之遂與屈突通追獲賊煬帝召見曰比聞與賊戰尤力向但知卿奉法而乃勇決如此朕用自愧蘇威曰仁者必有勇殆謂此邪時威及宇文述裴蘊裴矩參掌選事皆受賕不法恭仁素廉正故惡之出爲河南道大使使捕寇賊至譙郡爲朱粲所敗奔江都宇文化及弑逆署吏部尚書爲化及守魏縣元寶藏執送京師高祖素知之授黃門侍郎封觀國公尋爲涼州總管恭仁久乘邊習種落情僞悉心綏慰由葱嶺以東皆奉貢贊就加納言突厥頡利率衆數萬獵其境恭仁應機設拒張疑屯虛幟示之頡利懼而走瓜州刺史賀拔行威叛朝廷未卽討恭仁募趨邊倍道進賊不虞其來遂克二城縱所俘還之衆感悅遂相與縛行威降召拜吏部尚書兼中書令檢校涼州諸軍事遷左衛大將軍武德末拜雍州牧揚州大都督府長史遷洛州都督太宗勞謂曰洛陽要重朕子弟不爲少恐非所任故以委公恭仁性冲厚以禮自閑衛未嘗與物件時人方漢石慶旣貴不以勢尙人故譽望益重病乞骸骨詔以特進歸第卒贈潭州都督陪葬昭陵諡曰孝子思訓襲爵顯慶中歷右屯衛將軍從高宗幸并州右衛大將軍慕容寶節夜邀思訓與謀亂思訓不敢對寶節懼毒酒以進思訓死妻訴之流寶節嶺表至龍門追斬之乃詔以寘毒人者重其法思訓孫睿交尙長靈公主豫謀張易之賜寶封五百戶神龍中爲祕書監貶絳州別駕

師道字景猷恭仁弟清警有才思客洛陽爲王世充所拘問歸高祖授上儀同爲備身左右尙桂陽公主除吏部侍郎改太常卿封安德郡公貞觀十年拜侍中參預朝政親遇隆渥性周謹未嘗語禁省事嘗曰吾讀孔光傳想其餘風或庶幾云太宗數訪羣臣才行師道雖有所推進而乏甄品久之遷中書令太子承乾得罪詔與長孫無忌等雜治其獄師道妻異姓子趙節與承乾通謀乃微諷帝欲活之帝怒罷爲吏部尙書師道起貴冑四海人物非所練悉至銓署專抑勢貴親黨以遠嫌用人多違其才不爲時所稱帝亦曰師道資性純淑自應無過而實怯懦罕更事緩急不得其力從征高麗攝中書令軍還頗不職改工部尙書復爲太常卿師道善草隸工詩每與有名士燕集歌詠自適帝見其詩爲適諷嗟賞後賜宴帝曰聞公每酣賞捉筆賦詩如宿構者試爲朕爲之師道再拜少選輒成無所竄定一坐嗟伏卒贈吏部尙書并州都督諡曰懿陪葬昭陵詔爲立碑子豫之尙巢王元吉女壽春縣主居母喪與永嘉公主亂爲主壻寶奉節所殺

執柔恭仁從孫歷地官尙書武后母卽恭仁叔父達之女及臨朝武承嗣攸靈相繼用事后曰要欲我家及外氏常一人爲宰相乃以執柔同中書門下三品未幾卒弟執一亦以誅張易之功封河東郡公累官右金吾衛大將軍始雄在隋以同姓貴自武德後恭仁兄弟名位益盛又以武后外家尊寵凡尙主者三

人女爲王妃五人贈皇后一人三品以上者二十餘人

封倫字德彝以字顯觀州蓀人祖隆北齊太子太保倫年方少舅盧思道曰是兒識略過人當自致卿相隋開皇末江南亂內史令楊素討之署倫行軍記室泊海上素召計事倫墜水免易衣以見訖不言久乃素知問故謝曰私事也所不敢白素異其爲以從妹妻之素營仁壽宮表爲土工監規構鴻侈宮成文帝怒曰素殫百姓力爲吾悻怨天下素大懼倫曰毋恐皇后至自當免明日帝果勞素曰公知吾夫婦老無以自悞樂而盛飾此宮邪因大悅素退問何料而知倫曰上節儉故始見必怒然雅聽后言后婦人惟侈麗是好后悅則帝安矣素曰吾不及也素負才勢多所凌籍惟於倫降禮賞接或與論天下事衰衰不勸每撫其牀曰封郎終當據此薦之帝擢內史舍人虞世基得幸煬帝然不悉吏事處可失宜倫陰爲裁畫內以諂承主意百官章奏若忤旨則寢不聞外以峻文繩天下有功當賞輒抑不行由是世基之寵日隆而隋政日壞矣字文化及亂持帝出宮使倫數帝罪帝曰卿士人何至是倫羞縮去化及署爲內史令從至聊城知化及敗乃結士及得出護餉道化及死遂與士及來降高祖知其諧附逆黨方切讓使就舍倫以祕策干帝帝悅更拜內史舍人遷侍郎兼內史令秦王討王世充命倫參謀軍事時兵久不決帝欲班師王遣倫西見帝曰賊地雖多羈縻不相使所用命者洛陽爾計窮力屈死在旦暮今解而西則賊勢磐

結後難以圖帝納之賊平帝謂侍臣曰始議東討時多沮解者唯秦王謂必克倫贊其行雖張華叶策晉武亦何以加於是封平原縣公判天策府司馬初竇建德援洛陽將趣虎牢倫與蕭瑀諫不可至是入賀王笑曰不用公言今日幸而捷豈智者千慮或有失乎倫謝素不及頃之突厥寇太原且遣使和親帝問計羣臣咸請許之可紓戰倫曰不然彼有輕中國心謂我不能戰若乘其怠擊之勢必勝勝而後和威德兩全今雖不戰後必復來臣以爲擊之便詔可尋檢校吏部尚書進封趙國公徙密國太宗立拜尚書右僕射實封六百戶始倫之歸蕭瑀數薦之及是瑀爲左僕射每議事倫初堅定至帝前輒變易由是有隙貞觀元年遭疾臥尚書省帝親臨視命尚輦送還第卒年六十贈司空諡曰明倫資險佞內狹數刺人主意陰導而陽合之外謹順居處衣服陋素而交宮府賄贈狼籍然善矯飾居之自如人莫能探其肺腑隱刺之亂數進忠策太宗以爲誠橫賜累萬又密言於高祖曰秦王恃功頡頏太子下若不蚤立則亟圖之請白太子曰爲四海不顧其親乞養者謂何及高祖議廢立倫固諫止當時語祕無知者卒後事寢聞十七年治書侍御史唐臨追劾姦狀帝下其議百官民部尚書唐儉等議倫寵極生前而罪暴身後所歷官不可盡奪請還贈改諡以懲儉王有詔奪司空削食封改諡爲繆子言道尚淮南長公主官至宋州刺史裴矩字弘大絳州聞喜人父訥之爲齊太子舍人矩在乳而孤及長好學有文藻智數再補高平王文學

齊亡不得調隋高祖爲定州總管召補記室以母憂去職高祖已受禪遷給事郎奏舍人事帝伐陳爲元帥記室江左平詔矩巡撫嶺南未行而高智慧等亂道不通帝難其遣矩請速進許之次南康得兵數千人是時俚帥王仲宣逼廣州遣別將圍東衡州矩與將軍鹿愿赴之賊立九壁屯大庾嶺矩進擊破之賊懼釋東衡州之圍據愿長嶺又擊破之斬其帥自南海趣廣州仲宣懼潰去綏集二十餘州承制署渠帥爲刺史縣令還報帝大悅詔升殿勞苦之拜開府爵開喜縣公賜賚異等遷累內史侍郎時突厥盛都藍與突利構難屢犯塞詔太平公史萬歲爲行軍總管出定襄道以矩爲長史破達頭可汗而萬歲誅矩功不見錄還爲尚書左丞遷吏部侍郎名稱職煬帝時西域諸國悉至張掖交市帝令矩護視矩知帝勤遠略乃訪諸商胡國俗山川險易撰西域圖記三篇合四十四國凡裂三道北道起伊吾徑蒲類鐵勒突厥可汗延亂北流河至拂菻中道起高昌焉耆龜茲疏勒踰葱嶺蘇對沙那康曹何大小安穆諸國至波斯南道起鄯善于闐朱俱波喝槃陀亦度葱嶺涉護密吐火羅挹怛帆延漚國至北婆羅門皆竟西海諸國亦自有空道交通既還奏之帝引內矩問西方事矩盛言胡多環怪名寶俗土著易并吞帝由是甘心四夷委矩經略再遷黃門侍郎參豫朝政大業三年帝有事恆山西方來助祭者十餘國矩遣人說高昌伊吾等唱以厚利使入朝帝西巡燕支山高昌等二十七國謁道左皆使佩金玉服錦罽奏樂歌舞

令士女盛飾縱觀亘數十里示中國疆富後遂破吐谷渾拓地數千里遣兵出戍歲委輸巨億萬計帝謂矩有綏懷略擢銀青光祿大夫帝在東都以蠻夷朝貢踵至諷帝悉召天下奇倡怪伎大陳端門前曳錦戴珥金琲者十餘萬百官都人列繒樓閣夾道被服光麗塵邸皆供帳池酒林藪譯長縱蠻夷與民貿易所在令邀飲食相娛樂蠻夷嗟咨謂中國爲仙晨帝所天子以爲誠謂宇文述牛弘曰矩所建白皆朕之志要未發矩輒先聞非悉心奉國疇能是邪又助城伊吾脇處羅入朝帝益喜賜貂裘西胡珍器從帝巡塞北幸啟民帳時高麗遣使先在突厥啟民引見帝矩因奏言高麗本孤竹國周以封箕子漢分三郡今乃不臣先帝疾之欲討久矣方陛下時安得不事今其使朝突厥及見啟民舉國臣服脇令入朝可致也請面詔其使令歸語王有如旅拒方率突厥誅之帝納焉高麗不聽命征遼自此始王師再臨遼皆從以勞加右光祿大夫時綱紀汨振宇文述虞世基用事官以賄遷雖矩挺節無穢聲世頗稱之矩以始畢可汗衆漸盛建請以宗女嫁叱吉設建爲南面可汗分其勢叱吉不敢受始畢聞之稍怨望矩又言突厥瀟陋易離間但內多羣胡教導之臣聞史蜀胡悉尤有謀幸於始畢請殺之帝曰善矩因詭計召胡受賜斬馬邑下報始畢曰史蜀胡悉背可汗我所共惡今既誅之始畢知狀由是不朝後帝北巡始畢率騎十萬圍帝鴈門詔矩與虞世基宿朝堂待顧問圍解從幸江都宮時盜賊蜂結郡縣上奏不可計矩言于帝

帝怒遣詣京師以疾解俄而高祖入關帝令虞世基問方略矩曰唯願陛下亟西天下定矣矩性勤謹未嘗忤物見天下方亂其待遇士尤厚雖厮役皆得其歡是時衛兵數逃去帝憂之以問矩矩曰今乘輿淹狩已二年諸驍果皆無家人無匹合則不久安臣請皆聽納室帝笑曰公定多智因詔矩盡召江都女子媼家恣將士所欲卽配之人情翕然相悅曰裴公惠也字文化及亂衆劫矩賊皆曰裴黃門無豫也既而衆以秦王子浩爲帝詔矩爲侍內隨而北化及僭位署矩尙書右僕射爲河北道安撫大使又爲竇建德所獲建德以矩陷舊臣遇之厚建德起羣盜非有君臣制度矩爲略制朝儀不閱月憲章擬王者建德尊禮之建德敗來朝擢殿中侍御史爵安邑縣公累遷太子詹事檢校侍中時突厥數盜邊高祖遣使約西突厥連和突厥因請婚帝曰彼勢與我絕緩急不爲用奈何矩曰然北虜方熾歲苦邊若權順許以示外援須我完實更議之帝然其計隱太子敗餘黨保宮城不解秦王遣矩諭之乃聽命遷民部尙書太宗卽位疾貪吏欲痛懲父之乃問遣人遺諸曹一史受饋繚帝怒詔殺之矩曰吏受賕死固宜然陛下以計給之因卽行法所謂罔人以罪非道之以德之誼帝悅爲羣臣言之曰矩遂能廷爭不面從物物若此天下有不治哉年八十精明不忘多識故事見重于時貞觀元年卒贈絳州刺史諡曰敬

宇文士及字仁人京兆長安人父述爲隋右衛大將軍開皇末以述勳封新城縣公文帝引入臥內與語

奇之詔尙煬帝女南陽公主爲尙輩奉御從幸江都以父喪免起爲鴻臚少卿其兄化及謀弒逆以主婿忌之弗告已弒帝乃封蜀王初士及爲奉御而高祖任殿中少監雅自款結及從化及至黎陽帝手書召之士及亦遣家童間道走長安通諄勸且獻金銀帝悅曰我嘗與士及共事今以此獻是將來矣化及兵日感士及勸歸命不從乃與封倫詭求督饗俄而化及敗於是濟北豪傑謀起齊兵擊竇建德以收河北觀形勢士及不納與倫等自歸帝讓之曰汝兄弟率思歸之人爲入關計爾得時我父子尙肯相假乎今欲何地自處士及謝曰臣罪當死但臣往在涿郡嘗與陛下夜論世事頃又奉所獻冀以此贖罪帝笑謂裴寂曰彼與我論天下事逮今六七年公等皆在其後時士及女弟爲昭儀有寵由是見親禮授上儀同從秦王平宋金剛錄功復隋舊封以爲裴寂之遷王府驃騎將軍從討王世充等進爵鄴國公武德八年權檢校侍中兼太子詹事王卽位拜中書令真食益州七百戶以本官檢校涼州都督時突厥數入寇士及欲立威以鎮耀邊鄙每出入盛陳兵衛又痛折節下士或告其反訊無狀召爲殿中監以疾改蒲州刺史政尙寬簡人皆宜之擢右衛大將軍太宗延入閣語或至夜分出遇休沐往往馳召士及益自謹其妻嘗問向遽召何所事士及卒不對帝嘗玩禁中樹曰此嘉木也士及從旁美歎帝正色曰魏徵常勸我遠佞人不識佞人爲誰乃今信然謝曰南衙羣臣面折廷爭陛下不得舉手今臣幸在左右不少有將順

雖貴為天子亦何聊帝意解又嘗割肉以餅拭手帝屢目陽若不省徐唱之其機悟率類此後以雅舊別封一子新城縣公久之復為殿中監卒贈左衛大將軍涼州都督陪葬昭陵士及撫幼弟孤兒子以友睦稱好周卹親戚故人然過自奉養服玩食飲必極豐侈有司諡曰恭黃門侍郎劉洎曰七及居家侈肆不可謂恭乃改曰縱

贊曰封倫裴矩其姦足以亡隋其知反以佐唐何哉惟姦人多才能與時而成敗也妖禽孽狐當盡則伏自如得夜乃為之祥若倫偽行匿情死乃暴聞免兩觀之誅幸矣太宗知士及之佞為游言自解亦不能斥彼中材之主求不惑於佞難哉

鄭善果鄭州滎澤人祖在魏為顯家父誠周大將軍開封縣公討尉遲戰死善果方九歲以死事子襲爵家人為其幼弗告也及受詔號哭不自勝隋開皇初進封武德郡公年十四為沂州刺史累轉魯郡太守善果母崔賢明曉政治嘗坐閤內聽善果處決或當理則悅有不可則引至牀下責媿之故善果所至有績號清吏嘗與武威太守樊子蓋考為天下第一煬帝賜物千段黃金百兩再遷大理卿突厥圍帝鴈門以守禦功拜右光祿大夫從幸江都字文化及弒逆署民部尚書從至遼城淮安王神通攻之善果督戰中流矢神通解俄為竇建德所獲王琮讓之曰公隋大臣自尊夫人亡名稱衰今以忠臣子為逆賊徇

命至傷夷謂何善果慙欲自殺或止之得不死建德不之禮乃歸神通送京師擢太子左庶子更封滎陽郡公數為太子陳得失未幾檢校大理卿兼民部尚書奉法持正風績顯公卿間詔與裴寂等十人每奏事若侍得升殿而從父兄元璿亦與時以為榮坐事免會山東平持節為招撫大使以選舉失實除名後歷刑部尚書貞觀初出為岐州刺史以累去復拜江州刺史卒

元璿字德芳隋沛國公譯之子性察慧愛尚文藝以父功拜儀同襲爵累遷右衛將軍更封莘國公大業末出為文城郡守高祖兵興遣將張綸西略地攻拔其城係致軍門釋之授太常卿與襄武王琛使突厥還為參旗將軍元璿習軍旅事帝令教諸屯軍法劉武周將宋金剛與突厥處羅可汗犄角寇汾晉詔元璿諭罷可汗兵不聽乃進為武周援會暴疾其下意元璿實毒囚之處羅死頡利立留帳中數年帝既許可汗婚元璿始得還帝勞曰卿不辱於虜可輩蘇武張騫矣拜鴻臚卿母喪免會突厥提精騎數十萬身自將攻太原詔即苦次起元璿持節往勞既至虜以不信咎中國元璿隨語折讓無所屈徐乃數其背約突厥愧服因好謂頡利曰突厥得唐地無所用唐得突厥不可臣而使兩不為用而相攻伐何哉今掠財資劫人口皆入所部可汗一不得豈若小旗接好則金玉重幣一歸可汗且唐有天下約可汗為兄弟使驛衝鑿於道今坐受其利不肯乃蔑德貽怨自取勞苦若何頡利當其言引還太宗賜書曰知公口伐可

汗如約遂使邊火息燧朕何惜金石賜於公哉貞觀三年復使突厥還言夷狄以馬羊準盛衰今突厥六畜不蕃人色若菜牙內飯粟化爲血不三年必亡無幾突厥果敗後轉左武侯大將軍坐事免起爲宜州刺史以老致仕卒贈幽州刺史諡曰簡元璿幹敏所至常有譽五聘絕域危不脫終不自爲解然譯事後母不謹隋文帝嘗賜孝經愧最之至元璿亦不以孝聞士醜其行從孫杲知名武后世終天官侍郎權萬紀其先出天水後徙京兆爲萬年人父琢珩隋匡州刺史以愨愿聞萬紀悻直廉約自潮州刺史擢治書侍御史尙書右僕射房玄齡侍中王珪掌內外官考萬紀劾其不平太宗按狀珪不伏魏徵奏言房玄齡等皆大臣所考有私萬紀在考堂無訂正今而彈發非誠心爲國者帝乃置之然以爲不阿貴近繇是獎禮萬紀又建言字文智及受隋恩賊殺其君萬世共棄今其子乃任千牛請斥屏以懲不軌帝從之萬紀與侍御史李仁發旣以言得進頗掉罄自肆衆情懷懷徵奏萬紀等闇大體誣訐彈射皆不實陛下收其一切遂敢附下罔上鈞彊直名迷奪聖明以小謀大羣下離心如玄齡等且不得申況疎賤之臣哉帝寤徙萬紀散騎常侍而免仁發數年復召萬紀爲侍書御史卽奏言宣饒部中可鑿山冶銀歲取數百萬帝讓曰天子所乏嘉謀善政有益於下者公不推賢進善乃以利規我欲方我漢桓靈邪斥使還第久之由御史中丞進尙書左丞出爲西韓州刺史徙吳王長史王畏其直善遇之齊王祐不奉法帝素奇萬

紀能左右吳王者乃徙爲祐長史祐暱比羣小萬紀驟諫不入卽條過失以聞帝遣劉德威按問因召祐入朝祐恐與所嬖燕弘亮謀殺之而萬紀先引道祐遣弘亮馳擊斬首殊支體投園中又殺典軍韋文振文振本以校尉從帝征伐以質謹自將帝使事祐典廐馬切諫不納輒見萬紀道之故祐內嘗忿疾萬紀死文振懼馳去追騎獲之祐平贈萬紀齊州都督武督郡公食二千戶諡曰敢文振左武衛將軍襄陽縣公食千戶萬紀子玄初高宗時兵部侍郎

懷恩萬紀族孫祖弘壽爲隋臨汾司倉書佐高祖平京師擢太僕卿盧國公卒諡曰恭故懷恩以蔭累遷尙乘奉御襲爵馭人安畢羅爲高宗所寵見帝戲慢不恭懷恩奏事適見之退杖四十帝嗟賞曰良吏也擢萬年令賞罰明見惡輒取時語曰盜飲三斗塵無逢權懷恩其姿狀沈毅每盛服妻子不敢仰視更慶萊衛邢宋五州刺史洛州長史所居威名赫然吏重足立嘗過汴州時刺史楊德幹亦以嚴稱與懷恩名相埒汴橋新成立木中途止過車者懷恩適過之示德幹曰民不可止邪焉用此德幹慙服遷益州大都督府長史卒從子楚璧爲左領軍衛兵曹參軍玄宗在東郡楚璧乃與李迥秀子齊損陳倉尉盧玠左屯營長上折衝周履濟等謀反以兄子梁山詐爲襄王子號光帝擁營兵百餘夜入宮城欲劫留守王志愔不克遲明兵斬楚璧等傳首東都籍其家

閻讓字立德以字行京兆萬年人父毗爲隋殿內少監本以工藝進故立德與弟立本皆機巧有思武德初爲秦王府士曹參軍從平東都遷尙衣奉御制袞冕六服腰輿傘扇咸有典法貞觀初歷將作少匠大安縣男護治獻陵拜大匠文德皇后崩攝司空營昭陵坐弛職免起爲博州刺史太宗幸洛陽詔立德按爽塏建離宮清暑乃度地汝州西山控汝水睨廣成澤號襄城宮役凡百餘萬宮成煩燠不可居帝廢之以賜百姓坐免官未幾復爲大匠卽洪州造浮海大航五百艘遂從征遼攝殿中監規築土山破安市城師還至遼澤亘二百里渚不可通立德築道爲橋梁無留行帝悅賜予良厚又營翠微玉華二宮擢工部尙書帝崩復攝司空典陵事以勞進爵大安縣公永徽五年高宗幸萬年宮留守京師領徒四萬治京城卒贈吏部尙書并州都督陪葬昭陵諡曰康

立本顯慶中以將作大匠代立德爲工部尙書總章元年以司平太常伯拜右相博陵縣男初太宗與侍臣泛舟春苑池見異鳥容與波上悅之詔坐者賦詩而召立本侔狀閣外傳呼畫師闔立本是時已爲主爵郎中俯伏池左研吮丹粉望坐者羞悵流汗歸戒其子曰吾少讀書文辭不減儕輩今獨以畫見名與厮役等若曹慎毋習然性所好雖被黜屈亦不能罷也旣輔政但以應務俗材無宰相器時姜恪以戰功擢左相故時人有左相宣威沙漠右相馳譽丹青之嘲咸亨元年官復舊名改中書令卒諡曰文貞立德

孫知微曾孫用之知微聖曆初爲豹韜衛將軍武后時突厥獻請和親后遣知微攝春官尙書持金帛護送武延秀聘其女默啜怒非天子子囚延秀挾知微入寇趙定尊之如可汗以示華人自河以北蕭然朝廷以知微賣國夷其族知微不知逃還武后業已然乃曰惡臣疾子賜百官甘心焉於是骨斷體分非要職者不能得子則先以武三思壻免死玄宗在藩時以善割蒙寵開元中有司奏擬供奉姚元崇以爲則先刑戮家又逆人姻屬不可留京師詔曰朕在外日嘗驅使宜令供奉用之初爲彭州參軍嘗攝錄事一日糾愆謬不法數十事太守以爲材後舉通事舍人累遷右衛郎將知引駕仗金吾將軍李質升殿不解刀呵卻之請按以法左右震悚始有司以三衛執扇登殿用之奏三衛皆趨悍不宜升陛邇御坐請以宦者代遂爲故事天寶中女爲義王玳妃終左金吾將軍

蔣儼常州義興人擢明經第爲左屯衛兵曹參軍太宗將伐高麗募爲使者人皆憚行儼奮曰以天子雄武四夷畏威莫爾國敢圖王人有如不幸固吾死所也遂請行爲莫離支所囚以兵脇之不屈內窺室中高麗平乃得歸帝奇其節授朝散大夫爲幽州司馬劉祥道以巡察使到部表最狀擢會州刺史再遷殿中少監數陳時政病利高宗輒優納進蒲州刺史戶產充夥訴犴積年不平前刺史踵以罪去儼至發隱禁姦號頁二千石永隆二年以老致仕未幾復召爲太僕卿以父諱辭官徙太子右衛副率中宗在東宮

儼數爭過失不見用自以總調護不應諫於是田游巖與處士爲洗馬太子所尊禮儼請書責之曰太子年鼎盛聖道有所未盡足下受調護之寄居責之地唯唯悠悠不出一談向使不隄王粟僕何敢議今祿及親矣尙何酬塞游巖愧不能答儼尋徙右衛大將軍封義興縣子以太子詹事致仕卒年七十八中宗立以舊恩贈禮部尙書

韋弘機京兆萬年人祖元禮隋浙州刺史弘機仕貞觀時爲左千牛曹參軍使西突厥册拜同俄設爲可汗會石國叛道梗三年不得歸裂裾錄所過諸國風俗物產爲西征記北還太宗問外國事卽上其書帝大悅擢朝散大夫累遷殿中監顯慶中爲檀州刺史以邊人陋僻不知文儒貴乃修學宮畫孔子七十二子漢晉名儒像自爲贊敦勸生徒繇是大化契苾何力討高麗次灤水會暴漲師留三日弘機輪結資糧軍無饑高宗善之擢司農少卿主東都營田苑官者犯法杖乃奏帝嗟賞賜絹五十匹曰後有犯治之母奏遷司農卿太子弘薨詔蒲州刺史李冲寂治陵成而玄堂阨不容終具將更爲之役者過期不遣衆怨夜燒營去帝詔弘機嗣作弘機令開隧左右爲四便房摠制禮物裁工程不多改作如期而辦帝嘗言兩都我東西宅然因隋宮室日仆不完朕將更作奈財用何弘機卽言臣任司農十年省惜常費積二十萬緡以治宮室可不勞而成帝大悅詔兼將作少府二官督營繕初作宿羽高山等宮徙洛中橋於長夏

門廢利涉橋人便之天子乃登洛北絕岸延眺良久嘆其美詔卽其地營宮所謂上陽者尙書左僕射劉仁軌謂侍御史狄仁傑曰古天子陂池臺榭皆深宮複禁不欲百姓見之恐傷其心而今列岸謬廊巨王城外豈愛君哉弘機獵曰天下有道百官奉職任輔弼者則思獻替事我乃府藏臣守官而已仁傑非之俄坐家人犯盜劾免官初東都方士朱欽遂爲武后所寵姦賊狼籍弘機白欽遂假中宮驅策依倚形勢虧紊皇明爲禍亂之漸帝遣中使慰諭敕母漏言遂欽遂于邊后恨之永淳中帝幸東都至芳桂宮召弘機使白衣檢校園苑將復任之爲后掎而止終檢校司農少卿事孫岳子景駿景駿別傳岳子武后時爲汝州司馬以辨治稱召授尙舍奉御入見后賞其能曰卿家事朕悉知之因問舊故至家人皆不忘出爲太原令以不習武固辭忤旨下遷宋州長史歷廬海等州刺史皆著風迹恩嚴兩施睿宗立召爲殿中少監恩遇尤異竇懷貞等誅而岳子舊與經過爲姜皎所劾貶渠州別駕起授陝州刺史卒孫皐別有傳姜師度魏州魏人擢明經調丹陵尉龍崗令有清白稱神龍初試爲易州刺史河北道巡察兼支度營田使好興作始厝溝於前門以限奚契丹循魏武帝故迹並海鑿平虜渠以通餉路罷海運省功多遷司農卿出爲陝州刺史太原倉水陸運所湊轉屬諸河師度使依高爲詹而注米于舟以故人不勞拜太子詹事玄宗徙營州治柳城拜營田支度修築使進爲河中尹安邑鹽池涸廢師度大發卒通引其流置鹽屯

公私收利不貲徙同州刺史又派洛灌朝邑河西二縣開河以灌通靈陂收棄地二千頃爲上田置十餘屯帝幸長春宮嘉其功下詔褒美加金紫光祿大夫賜帛三百匹進將作大匠左拾遺劉彤建權天下鹽鐵利內之官免貧民賦詔戶部侍郎強循與師度並假御史中丞會諸道按察使議所以權之之法俄爲議者沮閣不行卒年七十餘師度喜渠漕所至繇役紛紜不能皆便然所就必爲後世利是時太史令傅孝忠以知星顯時爲語曰孝忠知仰天師度知相地嘲所嗜也

強循字季先鳳州人仕累雍州司士參軍華原無泉人畜多渴死循教人渠水以浸田一方利之號強公渠詔書褒予甚厚歷大理少卿太子右庶子爲政辦給不爲威嚴過人盡信不疑然當時恨其少文云張知謩字匪躬幽州方城人徙家岐兄弟五人知玄知晦知泰知默皆明經高第曉吏治清介有守公卿爭爲引重調露時知謩監察御史襄行知默左臺侍御史知謩歷十一州刺史所蒞有威嚴武后降璽書存問萬歲通天中自德州刺史入計后奇其貌詔工圖之稱其兄弟容而才謂之兩絕又門皆列戟白雀巢其廷后數寵賜知泰歷益州長史中臺左丞兵部侍郎封陳留縣公中宗在房州禁察苛嚴知謩與董玄質崔敬嗣繼爲刺史供擬保戴不少帝復位拜知謩左衛將軍加雲麾將軍封范陽郡公知泰御史臺大夫加銀青光祿大夫封漁陽郡公伯仲華首同貴時以爲榮知泰忤武三思故出爲并州刺史天兵

軍使終魏州刺史謫曰定知謩歷東都副留守左右羽林大將軍同華州刺史大理卿致仕年八十開元時卒知謩敏且亮惡請謁求進士或不才冒位視之若讎每敕子孫經不明不得舉家法可稱云武后革命知泰奏置東都諸關十七所譏斂出入百姓驚駭樵米踊貴卒罷不用議者羞薄之知默與監察御史王守慎來俊臣周興學詔獄數陷大臣守慎雖其甥惡鞠引之暴不得去請度爲浮屠后許之而知默卒陷酷吏子孫禁錮爲張氏羞知玄子景昇知泰子景佚開元中皆顯官

唐書卷一百

唐書卷一百考證

章弘機傳孫岳子○舊書機子餘慶餘子岳少一子字

張知壽傳幽州方城人○舊書蒲州河東人

知泰歷益州長史中臺左丞○舊書作右丞

唐書卷一百考證

唐書卷一百一

宋 端 明 殿 學 士 宋 祁 撰

列傳第二十六

蕭瑀

蕭瑀字時文後梁明帝子也九歲封新安王國除以女兄為隋晉王妃故入長安瑀愛經術善屬文性鯁
急鄙遠浮華嘗以劉孝標辯命論詭悖不經乃著論非之以為人稟天地而生而謂之命至吉凶禍福則
繫諸人今一於命非先王所以教人者通儒柳顧言諸葛穎歎曰是足鍼孝標膏盲矣晉王為太子授右
千牛即帝位妃為后而瑀遷親寵類遷尚衣奉御檢校左翊衛鷹揚郎將感末疾不呼醫曰天若假吾餘
年因得為遁階矣后聞責謂曰爾亡國後不安小官而高為怪語罪不測瑀復治疾良已拜內史侍郎數
言事忤旨稍見忌帝至鴈門為突厥所圍瑀謀曰夷俗可賀敦與兵馬事況義成公主以帝女為之若走
一介使鑼喻宜不戰而解又眾商陛下已平突厥方復事遼東故忿不肯戰願下詔赦高麗專討突厥則
人自奮矣帝從之既而主詭辭謂突厥果解圍去然帝素意伐遼又銜瑀以謀搆其機謂羣臣曰突厥何
能為瑀乘未解時乃給恐我遂出瑀為河池郡守部有鈔賊萬人吏不制瑀募勇敢士擊降之悉捐貲畜

賜有功又擊走薛舉眾數萬高祖入京師招之挈郡自歸授光祿大夫封宋國公拜民部尚書秦王領右元帥攻洛陽署瑒府司馬武德元年遷內史令帝委以樞筦內外百務悉關決或引升御榻呼曰蕭郎瑒自力孜孜抑過繩違無所憚上便宜每見納用手詔曰得公言社稷所賴朕既寶之故賜黃金一函公其勿辭是歲州置七職秦王爲雍州牧以瑒爲州都督詔嘗下中書未卽行帝讓其稽瑒曰隋季內史詔敕多違舛百司不知所承今朝廷初基所以安危者繫號令比承一詔必覆審使先後不謬始得下此所以稽留也帝曰若爾朕何憂乎初瑒關內田宅悉賜勳家至是還給之瑒盡以分宗族獨留廟室奉祠王世充平進尚書右僕射七年以熒惑犯右執法避位不許久之遷左僕射貞觀初房玄齡杜如晦新得君事任稍分瑒不能無少望乘罅切詆辭旨疏躁太宗怒廢于家俄拜特進太子少師復爲左僕射實封六百戶帝問瑒朕欲長保社稷奈何瑒曰三代有天下所以能長久者類封建諸侯以爲藩屏秦置守令二世而絕漢分王子弟享國四百年魏晉廢之亡不旋踵此封建之有明效也帝納之始議封建坐與陳叔達忿爭御前不恭免歲餘起爲晉州都督入拜太常卿遷御史大夫參預朝政瑒論議明辯然不能容人短意或偏駁不通而向法深房玄齡魏徵溫彥博頗裁正之其言多黜瑒益不平會玄齡等小過失瑒卽痛劾不報由是自失罷爲太子少傅加特進復爲太常卿拜河南道巡省大使九年復參預政事帝嘗曰武

德季太上皇有廢立議顧朕挾不賞之功於昆弟弗見容瑒於爾時不可以利怵死懼社稷臣也因賜詩曰疾風知勁草放蕩識誠臣又曰公守道耿介古無以過然善惡太明或有時而失瑒頓首謝曰旣蒙教又許以忠亮雖死日猶生年也魏徵曰臣有逆衆持法主恕之以公孤特守節主恕之以介昔聞其言乃今見之使瑒不遇陛下庸能自保邪晉王爲皇太子拜太子太保同中書門下三品帝曰三師以德導太子者也禮不尊則無所取法乃詔師入謁太子出門迎拜師答拜每門讓乃入師坐然後坐書前後署名稱惶恐瑒素貴但中挾每燕見輒言玄齡輩朋黨盜權若膠固然特未反耳帝曰知臣莫若君朕雖不明盍頓懼臧否因爲瑒曉解瑒以帝有所偏信帝積久亦不平瑒好浮屠法間請捨家爲桑門帝許之矣復奏自度不能爲又足疾不入謁帝曰瑒豈不得其所邪乃詔奪爵下除商州刺史未幾復其封加特進卒年七十四遺命斂以單衣無卜日詔贈司空荊州都督陪葬昭陵太常諡曰肅帝以其性忌諛貞褊子銳尚襄城公主爲太常少卿

鈞瑒從子有才譽永徽中累遷諫議大夫弘文館學士左武侯屬盧文操跳堞盜庫財高宗以其職主幹當自盜罪死鈞曰囚罪誠死然恐天下聞謂陛下重貨輕法任喜怒殺人帝曰眞諫議也詔原死太常工爲宮人通訊遺詔殺之且附律鈞言禁當有漸雖附律工不應死帝曰如姬竊符朕以爲戒今不濫工死

然喜得忠言即有工徙遠裔終太子率更令子瓘爲渝州長史居母喪以毀卒鈞兄子嗣業少從煬帝后入突厥貞觀九年歸以其知虜曲折詔領突厥衆擢累鴻臚卿兼單于都護府長史調露中突厥叛嗣業與戰敗績高宗責曰我不殺薛仁貴郭待封故使爾至此然爾門與我家有雅舊故貸死乃流桂州
嵩瓘子貌偉秀美鬚髯始娶會稽賀晦女僚婿陸象先宰相子時爲洛陽尉已有名士爭往交而嵩汨汨未仕人不之異夏榮者善相謂象先曰君後十年貴冠人臣然不若蕭郎位高年艾舉門蕃熾時人不許神龍元年始調洛州參軍事桓彥範爲刺史待以異禮河北黜陟使姜師度表爲判官開元初擢中書舍人時崔琳正巳齊澣皆有名以嵩少術學不以輩行許也獨姚崇稱其遠到歷宋州刺史遷尙書左丞十四年以兵部尙書領朔方節度使既赴軍有詔供帳餞定鼎門外玄宗賦詩勞行會吐蕃大將悉諸邏恭祿及燭龍莽布支陷瓜州執刺史田元獻回紇又殺涼州守將王君奭河隴大震帝擇堪任邊者徙嵩河西節度使判涼州事封蘭陵縣子嵩表裴寬郭虛己牛仙客置幕府以建康軍使張守珪爲瓜州刺史完樹碑塢懷保邊人於時悉諸邏恭祿威懾諸部吐蕃倚其健噬邊嵩乃縱反間示疑端贊普果誅之使悉未明攻瓜州守珪拒甚力虜引卻會鄯州都督張志亮破賊青海西嵩又遣副將杜賓客率彊弩四千與吐蕃戰祁連城下自晨鬪迄晡乃大潰斬一將虜哭震山谷露布至帝大悅授嵩同中書門下三品又官

一子恩顧第十七年進兼中書令自張說罷宰相令缺四年嵩得之然常遙領河西節度在公慎密人莫見其際子衡尙新昌公主嵩妻入謁帝呼爲親家儀物貴甚俄封徐國公初裴光廷與嵩數不協光廷卒帝委嵩擇相嵩推韓休及休同位峭止不相假至校曲直帝前嵩慙乞骸骨帝慰之曰朕未厭卿何庸去乎嵩伏曰臣待罪宰相爵位既極幸陛下未厭得以乞身有如朕臣首領且不保又安得自遂因流涕帝爲改容曰卿言切矣朕未能決第歸夕當有詔俄遣高力士詔嵩曰朕將爾留而君臣誼當有始有卒者乃授尙書右丞相與休皆罷是日荊州進黃甘帝以紫粉包賜之擢子華給事久之進太子太師而幽州節度使張守珪坐賂中人牛仙童得罪李林甫素忌嵩因言嵩嘗以城南墅遺仙童貶青州刺史尋復拜太子太師固請老見許嵩退修時園區優游自怡家饒財而華爲工部侍郎衡以尙主位三品就養年踰八十豔其榮天寶八載卒贈開府儀同三司

華謹重方雅有家法嗣爵天寶末爲兵部侍郎祿山亂陷賊逼守魏州郭子儀攻安慶緒於相州華間道奉表欲舉魏以應爲賊所執會崔光遠得魏州破械出之魏人德華庇免爭來詣光遠乞留有詔卽授刺史史思明反子儀懼復失華乃表崔光遠代之而召置軍中相州兵潰華還朝猶以汗賊降賊祕書少監稍遷尙書右丞擢河中晉絳節度使上元初以中書侍郎同中書門下平章事李輔國用事宰相華拒

之輔國怨會肅宗大漸矯詔罷華爲禮部尙書引元載以代方代宗諒闇載助輔國貶華爲峽州司馬卒
二子恆悟

復字履初衡子生戚里嫺從豪汰以服御輿馬相夸復常衣垢弊居一室學自力非名士夙儒不與游以
清操顯華每歎曰此子當興吾宗推主蔭爲宮門郎廣德中歲大饑家百口不自振議鬻昭應監宰相王
縉欲得之使弟紘說曰以君才宜在左右胡不以墅奉丞相取右職復曰鬻先人墅以濟孀單吾何用美
官使門內餒且寒乎縉憾之由是廢數歲乃厯歙池二州刺史治狀應條遷湖南觀察使改同州刺史歲
歉州有京畿觀察使儲粟復輒發以貸人有司劾治詔削階停刺史或弔之復曰苟利於人胡責之辭久
乃拜兵部侍郎晉王爲襄漢元帥進復戶部尙書統軍長史舊制謂行軍長史德宗以復父諱更之未行
扈狩奉天帝惡庫隘欲西如鳳翔依張鎰復曰鳳翔乃泚舊兵今泚悖亂當有同惡者雖鎰臣畏不免帝
曰朕業行留一日以驗爾言俄而鎰爲李楚琳所害以是拜吏部尙書同中書門下平章事復嘗言艱難
以求始用宦者監軍權望太重是曹正可委宮掖事兵要政機臣使參領帝不聽又言陛下厥初清明自
楊炎盧杞妨命穢盛德播越及茲今阡于危當懲父前敗因述君臣大端卽自言若使臣依阿偷免不敢
當宰相杞對上或諂諛阿匱復厲言杞詞不正帝色貽謂左右曰復慢我因詔復充山南江淮湖南嶺南

等道宣撫安慰使興元初進門下侍郎初淮南陳少游左附李希烈而張鎰判官韋臯殺邠隴叛卒不應
楚琳復還執政建言陛下反正功臣已貴矣唯甄善汰惡爲未明少游位將相首臣賊臯名淺官下獨挺
挺抗忠如以臯代少游則天下瞭然知逆順之理帝許之復出中官馬欽緒揖宰相劉從一附耳語既而
從一密諭復曰有詔與公議向所奏不欲李勉盧翰聞知復曰堯舜有僉曰之言朝廷大事尙當謀及公
卿如勉等非其人當罷去既曰宰相而謀議可獨避之乎今與公行此或可第恐濫以生常政由是徹從
一以聞帝不悅復辭疾上政事許之弟升尙郃國大長公主肅宗女也升早卒主以姦蠱事再得罪廢諸
子悉逐醜地女爲皇太子妃太子請離婚帝銜囊伎故復坐是檢校太子左庶子廢居饒州貞元四年卒
年五十七復望闕高華厲名節不通狎流俗及爲相臨事嚴方數嘆帝意故居位亟解然性孝友既貶晏
然口未嘗言所累復子湛湛子寘咸通中位宰相無顯功史逸其傳

俛字思謙恆子貞元中及進士第又以賢良方正對策異等拜右拾遺元和六年召爲翰林學士凡三年
進知制誥會張仲方以李吉甫數調發疲天下訾其諛憲宗怒逐仲方而俛坐與善奪學士下除太僕少
卿皇甫鏞薦爲御史中丞鏞與令狐楚皆善俛兩人同輔政數稱其善故帝待俛厚襲徐國公穆宗立逐
鏞議所以代者楚薦之授中書侍郎同中書門下平章事進門下侍郎吐蕃寇涇州調兵護邊帝因問兵

法有必勝乎俛曰兵凶器聖人不得已用之故武不可玩玩則無震夫以仁討不仁以義討不義先招懷後掩襲故有不殺厲不禽二毛不犯田稼其救人如免水火此必勝術也若乃以小不忍輕任干戈師曲而敵怨非徒不勝又將自危是以聖王慎於兵帝重其言嘗詔俛撰王承宗先銘俛奏承宗比不臣迷而後復臣不忍稱道其先又辭成當有餉謝拒之則非朝廷撫納意受之臣誼不當取帝善而止令狐楚罷執政西川節度使王播賂權幸宰相俛劾播纖佞不可污台宰帝不許自請罷冀有感寤帝亦不省俄罷爲尙書左僕射用播爲鹽鐵使後宰相俛自謂輔政淺固辭僕射換吏部尙書又避選事徙兵部移病求分司不許授太子少保爲同州刺史復以少保分司東都性簡潔以聲利爲汙疾邪大甚孤特一槩故輕去位無所籍文宗卽位召授少師稱疾力不拜乃還左僕射許致仕莊恪太子時議選舊德保輔東宮復以少師召輒上還制書堅辭卽遷太子太傅優詔褒尙開成幼弟俛爲楚州刺史召見帝曰俛先帝賢宰相筋力未衰可一來爾善道朕意乃以詔書并絹三百因俛致之俛終不起以壽卒母章賢明治家嚴俛雖宰相待左右如褐衣時居喪哀毀既老家於洛歲時賓客請謝以爲煩乃舍濟源墅自放山野優游窮年然其居位頗介謹持法重名器狹於用人每除吏常憂不稱鮮有簡拔穆宗初兩河底定俛與段文昌當國謂四方無虞遂議太平事以爲武不可黷勸帝偃革尙文乃密詔天下鎮兵十之歲限一爲逃死

不補謂之銷兵旣而籍卒遺亡無生業曹聚山林間爲盜賊會朱克融王廷湊亂燕趙一日悉收用之朝廷調兵不克乃召募市人烏合戰輒北遂復失河朔矣

贊曰俛議銷兵寧不野哉當時河朔雖挈地還天子而悍卒頑夫開口仰食者在彼皆不能自返於本業者也又朱克融等客長安餓且死不得一官而俛未有以措置便欲去兵使羣臣失職一日叫呼其從如市幽魏相挺復爲賊淵可謂見豪末而不見輿薪矣宰相非其人禍可旣乎

俛字思道悟子大和中擢進士第除累給事中宣宗力治喜直言嘗以李璣爲嶺南節度使使者已賜節而俛封還詔書帝方作樂不暇命使遣優工趨出追之未及璣所而還後以封敕脫誤法當罰侍講學士孔溫裕曰給事中駁奏爲朝廷論得失與有司奏事不類不應罰詔可令狐綯用李璣經略安南璣以暴沓免俄起爲壽州團練使俛劾奏璣無所回時推其直自集賢學士拜嶺南節度使南方珍賄叢夥不入門家人病取槁梅於廚以和劑俛知趣市還之咸通初爲左散騎常侍懿宗怠政事喜佛道引桑門入禁中爲禱祠事數幸佛廬廣施予俛諫以爲天竺法割愛取滅非帝王所尙募金筆梵言口佛音不若懲謬賞濫罰振殃祈福況佛者可以悟取不可以相求帝雖昏縱猶嘉歎其言後官數遷拜義成軍節度使滑州瀕河累歲水壞西北防俛徙其流遠去樹堤自固人得以安以兵部尙書再判度支進中書侍郎同

中書門下平章事再遷司空蘭陵侯時天下盜起宦人持兵柄倣以鯁直爲權近所忌卒年八十子廩字富侯第進士遷尙書郎倣領南海解官往侍爲人退約少合南海多穀紙倣敕諸子繕補殘書廩諫曰州距京師且萬里書成不可露齋必貯以囊笥貪者伺望得無惹致嫌乎倣曰善吾思不及此乃止廣明初以諫議大夫知制誥請厲止夜行以備賊謀出太倉粟賤估以濟貧民俄遷京兆尹田令孜養子有罪亡擊捕吏繫獄請救踵門廩不納杖殺之內外畏警令孜拒黃巢以廩爲糧料使辭疾貶賀州司戶參軍事會襄王竊據挈族逃河朔鎮冀節度使王鎔厚禮之光化中以給事中召不至卒

遵字得聖寘子咸通中擢進士第辟節度府入朝拜右拾遺與韋保衡聯第而遵姿寓秀偉氣孤峻嘗慕李德裕爲人保衡才下諸儒靳薄之不甚齒獨呼遵太尉保衡憾焉於是保衡已爲相據遵罪繇起居舍人斥播州司馬道三峽方迫畏不瞑若有人謂曰公無恐予爲公呵禦遵悅悟俄謁白帝祠見帝貌類向所睹異之未幾保衡死召爲禮部員外郎乾符中累擢戶部侍郎翰林學士承旨僖宗入蜀以兵部判度支次絳州拜同中書門下平章事始王鐸主貢舉而得遵及是與鐸並位鐸年老嘗入對殿中遵掖起之帝喜曰遵善事長大臣和予之幸也遵曰不止以長乃鐸門生帝笑曰鐸選士朕選宰相卿無負我遵頓首謝從還京師累拜司空封楚國公遵負大節以王佐自任既當國風采峭整天子器之時藩鎮多興

於盜賊橫放莫能制權綱漚弛支詳在徐州引散騎常侍李損子凝吉爲佐會牙將時溥逐詳而取節度溥爲饗幹所毒不死或纒凝吉爲詳報仇者溥怒殺之損時在朝溥卽上言損連謀請并誅田令孜受溥金劾損付御史獄中丞盧渥傳成其罪御史王華嫉惡甚表損不知狀令孜請移神策獄華不奉詔奏言損近臣法當死卽死獨不宜取辱於宦人手遵卽時叩延英爭曰凝吉以寃就屠已不可言損與子音問不接且數替安得謂同謀哉溥恃功壞天子法請案近臣卑侮王室有無將之萌今損可無罪誅禍且及臣輩帝寤止免官當時令孜持禁軍權寵可炙公卿無不附順唯遵未嘗少下後令孜取安邑池鹽給衛軍王重榮固爭乃徙重榮它鎮不受詔令孜以兵討之重榮引沙陀拒王師王師敗逐而西帝驚幸鳳翔諸節度共劾令孜生事離間大臣遵素惡之與裴澈計共召朱玫於邠玫起邠兵五千奉迎與沙陀等連和令孜迫帝幸陳倉夜出百官不及從孜怒令孜并望帝不諒其心謂遵曰上奔播六年中原之人與賊肝髓流野得復宗廟遺老殘民間與馬音流涕相歡上曾不念以諸侯勤王功爲敕使之寵今姦臣爲國產怨我奉命而來返以爲脅君羣臣報國極矣戰力殫矣尙能垂頭塌趨求生於黃門哉喪君有君公其圖之遵曰上無負天下顧爲令孜掣制每言必涕數行下陳倉之行又劫於兵公誠有憂王室意宜還藩奉表請天子復國策無宜此玫曰諸王才可任天下者不乏遵曰人非伊霍欲爲禍首未或利也孜退

曰我擇一王爲帝違者斬尙何事乃立嗣襄王熈而召遵作冊遵苦辭致更委鄭昌圖滋恨遵及遵長安使昌圖相熈罷遵爲太子太保移疾不出方其弟遵爲承樂令往從之帝還宮宰相孔緯與遵雅暱乃劾嘗爲僞臣卽賜死其所寶光啟三年遵見柄任凡五朞行完而材逢世多故召復臣以濟亂身浮僞署不得其死人爲哀之

定字梅巨瑀曾孫以蔭起家陝州參軍事金城丞蒞事清挺選補黜陟使裴遵慶表爲判官還調萬年主簿歷左右司郎中爲元載所惡外遷袁潤等六州刺史大厯中有司差天下刺史治最定與常州蕭復豪州張鎰爲第一而劾桑稼均賦稅業徠游口在鎰復右遷戶部侍郎太常卿朱泚反詭姓名爲張誕匿里中與蔣沈不浼于賊事平擢太子少師卒年七十七贈太子太師

贊曰梁蕭氏興江左實有功在民厥終無大惡以寢微而亡故餘祉及其後裔自瑀逮遵凡八葉宰相名德相望與唐盛衰世家之盛古未有也

唐書卷一百一

唐書卷一百一考證

蕭瑀傳○臣德潛按貞觀十七年瑀與長孫無忌等二十四人並圖形於凌烟閣凡圖凌烟閣者傳中皆載此獨不載似疎

子銳尙襄城公主爲太常少卿○舊書歷太常卿

倣進中書侍郎同中書門下平章事再遷司空蘭陵縣侯卒年八十○臣德潛按舊書罷知政事出爲廣

州刺史嶺南節度使遇亂不至京師而卒是新書薨于位舊書卒于鎮也玩子贖傳中乾符中以父出

鎮南海免官待行則新書明缺罷相文矣當從舊書

遵支詳在徐州引散騎常侍李損子凝吉爲佐○舊書作李凝吉

唐書卷一百一考證

唐書卷一百一

宋 端 明 殿 學 士 宋 祁 撰

列傳第二十七

岑虞李褚姚合狐

岑文本字景仁鄧州棘陽人祖善方後梁吏部尚書更家江陵父之象仕隋為邯鄲令坐為人訟不得申
 文本年十四詣司隸理冤辨對哀暢無所詘眾屬目命作蓮華賦文成合臺嗟賞遂得直性沈敏有姿儀
 善文辭多所貫綜郡舉秀才不應蕭銑僭號召為中書侍郎主文記河間王孝恭平荊州其下欲掠歛文
 本說孝恭曰自隋無道四海救死延頸以望真主蕭氏君臣決策歸命者意欲去危就安大王誠縱兵剽
 係恐江嶺以南向化心沮狼顧屬驚不如厚撫荊州勸未附陳天子厚惠誰非王人孝恭善之遽下令止
 侵略署文本別駕從擊輔公祏典檄符進署行臺考功郎中貞觀元年除祕書郎兼直中書省太宗既藉
 田又元日朝羣臣文本奏藉田三元頌二篇文致華贍李靖復薦于帝擢中書舍人時顏師古為侍郎自
 武德以來詔詰或大事皆所草定及得文本號善職而敏速過之或策令叢遽敕吏六七人泚筆待分口
 占授成無遺意師古以譴罷温彥博為請帝曰師古練時事長於文誥人少逮者幸得復用帝曰朕自舉

一人公毋憂乃授文本侍郎專典機要封江陵縣子是時魏王泰有寵侈第舍冠諸王文本上疏勸崇節儉陳嫡庶分宜有抑損帝善之賜帛三百段踰年爲令從伐遼東事一委倚至糧漕最日甲兵凡要料配差序籌不廢手由是神用頓耗容止不常帝憂曰文本今與我同行恐不與同返矣至幽州暴病帝臨視流涕卒年五十一是夕帝聞夜嚴曰文本死所不忍聞命罷之贈侍中廣州都督諡曰憲陪葬昭陵始文本貴常自以興孤生居處卑室無茵褥幃帟事母以孝顯撫弟姪篤恩義生平故人雖羈賤必鈞禮帝每稱其忠謹吾親之信之晉王爲皇太子大臣多兼宮官帝欲文本兼攝辭曰臣守一職猶懼其盈不願希恩東宮請一心以事陛下帝乃止但詔五日一參東宮每進見太子答拜始爲中書令有憂色母問之答曰非勳非舊責重位高所以憂也有來慶者輒曰今日受弔不受賀或勸其營產業文本歎曰吾漢南一布衣徒步入關所望不過祕書郎縣令耳今無汗馬勞以文墨位宰相奉稍已重尙何殖產業邪故口未嘗言家事既任職久資錫豐饒皆令弟文昭主之文昭任校書郎多交輕薄帝不悅謂文本曰卿弟多過朕將出之文本曰臣少孤母所鍾念者弟也不欲離左右今若外出母必憂無此弟是無老母也泣下嗚咽帝愍其意召文昭讓敕卒無過孫義從子長倩

義字伯華第進士累遷太常博士坐伯父長倩貶郴州司法參軍遷金壇令時弟仲翔爲長洲令仲休爲

溧水令皆有治績宰相宗楚客語本道巡察御史母遣江東三岑乃薦義爲汜水令武后令宰相舉爲員外郎者韋嗣立薦義且言惟長倩爲累久不進后曰義誠材何諉之拘卽拜天官員外郎於是坐親廢者皆得援而進矣俄爲中書舍人中宗時武三思用事敬暉欲上表削諸武封王者衆畏三思不敢爲草獨義爲之詞誼勁切由是下遷祕書少監進吏部侍郎時崔湜鄭愔及大理少卿李元恭分掌選皆以賄聞獨義勤廉爲時議嘉仰帝崩詔擢右散騎常侍同中書門下三品睿宗立罷爲陝州刺史再遷戶部尙書景雲初復召同三品進侍中封南陽郡公初節愍太子之難冉祖雍誣帝及太平公主連謀賴義與蕭至忠保護得免義監修中宗實錄自著其事帝見之賞歎賜物三百段良馬一匹下詔褒美時義兄獻爲國子司業仲翔陝州刺史仲休商州刺史兄弟子姓在清要者數十人義歎曰物極則反可以懼矣然不能抑退坐豫太平公主謀誅籍其家

長倩少孤爲文本鞠愛永淳中累官至兵部侍郎同中書門下平章事垂拱初自夏官尙書遷內史知夏官事俄拜文昌右相封鄧國公武后擅位喜符瑞事羣臣爭言之長倩懼間亦開陳請改皇嗣爲武氏且爲周家儲貳后順許賜實封戶五百加特進輔國大將軍鳳閣舍人張嘉福洛州民王慶之建請以武承嗣爲皇太子長倩謂皇嗣在東宮不宜更立與格輔元不署奏請切責嘉福等和州浮屠上大雲經著革

命事后喜始詔天下立大雲寺長倩爭不可緣是與諸武忤罷為武威道行軍大總管征吐蕃未至召還下獄來俊臣劾長倩與輔元歐陽通數十族謀反斬于市五子同賜死發暴先墓睿宗立追復官爵備禮改葬輔元者汴州俊儀人父處仁仕隋為剡丞與同郡王孝逸繁師玄靖君亮鄭祖咸鄭師善李行簡盧協皆有名號陳留八俊輔元擢明經累遷殿中侍御史歷御史中丞同鳳閣鸞臺平章事既持承嗣不可遂及誅子遵亦舉明經第為太常寺太祝亡命匿中牟十餘年神龍初訴父冤擢累贊善大夫輔元兄希元洛州司法參軍同章表

入子注范曄後漢書者

虞世南

越州人

出繼叔陳中書侍郎寄之後故字伯施性沈靜寡欲與兄世基同受學于吳顧野王

餘十年精思不懈至累旬不盥櫛文章婉孌慕僕射徐陵自以類己由是有名陳天嘉中父荔卒世南毀不勝喪文帝高蒞行知二子皆博學遣使至其家護視召為建安王法曹參軍時寄陷於陳寶應世南雖服除仍衣布飯蔬寄還乃釋布啜肉至德初除西陽王友陳滅與世基入隋世基辭章清勁過世南而贖博不及也俱名重當時故議者方晉二陸煬帝為晉王與秦王俊交辟之大業中累至祕書郎煬帝雖愛其才然疾峭正弗甚用為七品十年不徙世基佞敏得君日貴盛妻妾被服擬王者而世南躬貧約一不改字文化及已弒帝問殺世基而世南抱持號訴請代不能得自是哀毀骨立從至聊城為竇建德所

獲署黃門侍郎秦王滅建德引為府參軍轉記室遷太子中舍人王踐祚拜員外散騎侍郎弘文館學士時世南已衰老屢乞骸骨不聽遷太子右庶子固辭改祕書監封永興縣子世南貌儒謹外若不勝衣而中抗烈論議持正太宗嘗曰朕與世南商略古今有一言失未嘗不悵恨其懇誠乃如此貞觀八年進封縣公會隴右山崩大蛇屢見山東及江淮大水帝憂之以問世南對曰春秋時梁山崩晉侯召伯宗問焉伯宗曰國主山川故山崩川竭君為之不舉降服乘縵徹樂出次祝幣以禮焉梁山晉所主也晉侯從之故得無害漢文帝元年齊楚地二十九山同日崩水大出詔郡國無來貢施惠天下遠近洽穆亦不為災後漢靈帝時青蛇見御坐晉惠帝時大蛇長三百步見齊地經市入廟蛇宜在草野而入市此所以為災耳今蛇見山澤適其所居又山東淫雨江淮大水恐有冤獄枉繫宜省錄彙囚庶幾或當天意帝然之於是遣使賑飢民申挺獄訟多所原赦後星孛虛危歷氏餘百日帝訪羣臣世南曰昔齊景公時彗見公問晏嬰嬰曰公穿池沼畏不深起臺榭畏不高行刑罰畏不重是以天見彗為戒耳景公懼而修德後十六日而滅臣願陛下勿以功高而自矜勿以太平久而自驕慎終于初彗雖見猶未足憂帝曰誠然吾良無景公之過但年十八舉義兵二十四平天下未三十即大位自謂三王以來撥亂之主莫若故負而矜之輕天下士上天見變其為是乎秦始皇剷除六國隋煬帝有四海之富卒以驕敗吾何得不戒邪高祖

崩詔山陵一準漢長陵故事厚送終禮於是程役峻暴人力告弊世南諫曰古帝王所以薄葬者非不欲崇大光顯以榮其親然高墳厚隴寶貝珍物適所以累之也聖人深思遠慮安於菲薄爲長久計昔漢成帝造延昌二陵劉向上書曰孝文居霸陵悽愴悲懷顧謂羣臣曰嗟乎以北山石爲椁用紵絮斷陳漆其間豈可動哉張釋之曰使其中有可欲雖錮南山猶有隙使無可欲雖無石椁又何戚焉夫死者無終極而國家有廢興孝文寤焉遂以薄葬又漢法人君在位三分天下貢賦之一以入山陵武帝歷年長久比葬方中不復容物霍光暗於大體奢侈過度其後赤眉入長安破茂陵取物猶不能盡無故聚斂爲盜之用甚無謂也魏文帝爲壽陵作終制曰堯葬壽陵因山爲體無封樹寢殿園邑棺槨足以藏骨衣衾足以朽肉吾營此不食之地欲使易代之後不知其處無藏金銀銅鐵一以瓦器喪亂以來漢氏諸陵無不發者至乃燒取玉匣金縷骸骨並盡乃不重痛哉若違詔妄有變改吾爲戮屍地下死而重死不忠不孝使魂而有知將不福汝以爲永制藏之宗廟魏文此制可謂達於事矣陛下之德堯舜所不逮而俯與秦漢君同爲奢泰此臣所以尤戚也今爲巨隴如此其中雖不藏珍寶後世豈及信乎臣愚以爲霸陵因山不起墳自然高顯今所卜地勢卽平宜依周制爲三仞之墳明器一不得用金銀銅鐵事訖刻石陵左以明示大小高下之式一藏宗廟爲子孫萬世法豈不美乎書奏未報又上疏曰漢家卽位之初便營陵墓近

者十餘歲違者五十年今以數月之程課數十年之事其於人力不亦勞矣漢家大郡戶至五十萬今人衆不逮往時而功役一之此臣所以致疑也時議者頗言宜奉遺詔於是稍稍裁抑帝常作宮體詩使廣和世南曰聖作誠工然體非雅正上之所好下必有甚者臣恐此詩一傳天下風靡不敢奉詔帝曰朕試卿耳賜帛五十四帝數出畋獵世南以爲言皆蒙嘉納嘗命寫列女傳於屏風於時無本世南暗疏之無一字謬帝每稱其五絕一曰德行二曰忠直三曰博學四曰文詞五曰書翰世南始學書於浮屠智永其法爲世祕愛十二年致仕授銀青光祿大夫弘文館學士如故祿賜防閣視京官職事者卒年八十一詔陪葬昭陵贈禮部尚書諡曰文懿帝手詔魏王泰曰世南於我猶一體拾遺補闕無日忘之蓋當代名臣人倫準的今其云亡石渠東觀中無復人矣後帝爲詩一篇述古興亡既而歎曰鍾子牙不復期死伯鼓琴朕此詩將何所示邪敕起居郎褚遂良卽其靈坐焚之後數歲夢進讜言若平生翌日下制厚卹其家子昶終工部侍郎

李百藥字重規定州安平人隋內史令德林子也幼多病祖母趙以百藥名之七歲能屬文父友陸父等共讀徐陵文有刈琅邪之稻之語嘆不得其事百藥進曰春秋邠子藉稻杜預謂在琅邪客大驚號奇童引蔭補三衛長乃性疏悅喜劇飲開皇初授太子通事舍人兼學士被讒輒謝病去十九年召見仁壽宮

襲父爵安平公僕射楊素吏部尚書牛弘愛其才署禮部員外郎奉詔定五禮律令陰陽書初以疾去會人也煬帝在揚州召不赴銜之及即位奪爵爲桂州司馬官廢還鄉里大業九年戊戌會稽管崇亂城守有功帝顧其名謂虞世基曰是子故在宜斥醜處乃授建安郡丞至烏程江都難作沈法興李子通杜伏威更相滅百藥轉側寇亂中數被僞署危得不死會高祖遣使招伏威百藥勸朝京師既至歷陽中悔欲殺之飲以石灰酒因大瀕死既而宿病皆愈伏威詒書輔公祏使殺之爲王雄誕保護得免公祏反授吏部侍郎或謂帝百藥與同反帝大怒及平得伏威所與公祏書乃解猶貶涇州司戶太宗至涇州召與語悅之貞觀元年拜中書舍人封安平縣男明年除禮部侍郎時議裂土與子弟功臣百藥上封建論理據詳切帝納其言而止四年授太子右庶子太子數戲蝶無度乃作贊道賦以諷它日帝曰朕見卿賦述古儲貳事勸勵甚詳向任卿固所望耳賜綵三百段遷散騎常侍進左庶子宗正卿爵爲子久之因乞致仕帝嘗與偕賦帝京篇歎其工手詔曰卿何身老而才之壯齒宿而意之新乎卒年八十四諡曰康百藥名臣子才行世顯爲天下推重侍父母喪還鄉徒跣數千里服雖除容貌癯瘠者累年好獎薦後進得俸祿與親黨共之翰藻沈鬱詩尤其所長樵野皆能諷之所撰齊史行於時子安期

安期亦七歲屬文父貶桂州遇盜將加以刃安期跪泣請代盜哀釋之貞觀初爲符璽郎累除主客員外

郎高宗卽位遷中書舍人司列少常伯數預決國事帝屢責侍臣以不能進賢衆不敢對安期進曰臣十室且有忠信天下至廣不爲無賢比見公卿有所薦進皆劾爲朋黨滯抑者未申而主薦者已嘗所以人爭噤默以避讒謗若陛下忘其親賢曠然受之惟才是用塞讒毀路其誰敢不竭忠以聞上乎帝納之尋檢校東臺侍郎同東西臺三品出爲荊州大都督府長史卒諡曰烈自德林至安期三世掌制誥孫懿仲又爲中書舍人

褚亮字希明杭州錢塘人曾祖暹父玠皆有名梁陳間亮少警敏博見圖史一經目輒誦于心年十八詣陳僕射徐陵陵與語異之後主召見使賦詩江總諸詞人在席皆服其工累遷爲尚書殿中侍郎入隋爲東宮學士遷太常博士煬帝議改宗廟之制亮請依古七廟而太祖高祖各一殿法周文武二祧與始祖而三餘則分室而祭始祖二祧不從迭毀未及行坐與楊玄感善煬帝矜己嫉才因是亦貶西海司戶時博士潘徽貶威定主簿亮與俱至隴山徽死爲斂瘞人皆義之後爲薛舉黃門侍郎舉滅秦王謂曰寡人受命而來嘉於得賢公久事無道君得無勞乎亮頓首曰舉不知天命抗王師今十萬衆兵加其頸大王釋不誅豈獨亮蒙更生邪王悅賜乘馬帛二百段卽授王府文學高祖獵親格虎亮懇福致諫帝禮納其言王每征伐亮在軍中嘗預祕謀有裨輔之益貞觀中累遷散騎常侍封陽翟縣侯老于家太宗征遼子

遂良從詔亮曰疇日師旅卿未嘗不在中今朕薄伐君已老俛仰歲月且三十載眷言及此我勞如何今以遂良行想君不惜一子於朕耳善居加食亮頓首謝及寢疾帝遣醫中使候問踵相逮本年八十八贈太常卿陪葬昭陵諡曰康遂良自有傳初武德四年太宗爲天策上將軍寇亂稍平乃鄉儒宮城西作文學館收聘賢才於是下教以大行臺司勳郎中杜如晦記室考功郎中房玄齡及于志寧軍諮祭酒蘇世長天策府記室薛收文學褚亮姚思廉太學博士陸德明孔穎達主簿李玄道天策倉曹參軍事李守素王府記室參軍事虞世南參軍事蔡允恭顏相時著作郎攝記室許敬宗薛元敬太學助教蓋文達軍諮典籤蘇勗並以本官爲學士七年收卒復召東虞州錄事參軍劉孝孫補之凡分三番遞宿于閣下悉給珍膳每暇日訪以政事討論墳籍推略前載無常禮之間命闔立本圖象使亮爲之贊題名字爵里號十八學士藏之書府以章禮賢之重方是時在選中者天下所慕向謂之登瀛洲

劉孝孫者荊州人祖貞周石臺太守孝孫少知名大業末爲王世充弟杞王辯行臺郎中辯降衆引去獨孝孫攀援號慟送于郊貞觀六年遷著作佐郎吳王友歷諮議參軍遷太守洗馬未拜卒

李玄道者本隴西人世居鄭州仕隋爲齊王府屬李密據洛口署記室密敗爲王世充所執衆懼不能寐獨玄道曰死生有命憂能了乎寢甚安及見世充辭色不撓釋縛爲著作佐郎東都平爲齊王府主簿貞

觀初累遷給事中姑臧縣男出爲幽州長史佐都督王君廓專持府事君廓不法每以義裁糾之嘗遣玄道婢乃夏家子爲所掠遣去不納由是始隙君廓入朝玄道寓書房玄齡玄齡本甥也君廓發其書不識草字疑以謀己遂反坐是流嶺州未幾擢常州刺史風績清簡下詔褒美賜繒帛久之致仕加銀青光祿大夫以祿歸第卒

李守素者趙州人王世充平召署天策府倉曹參軍通氏姓學世號肉譜虞世南與論人物始言江左山東向相酬對至北地則笑而不答歎曰肉譜定可畏許敬宗曰倉曹此名豈雅目邪宜有以更之世南曰昔任彥昇通經時稱五經笥今以倉曹爲人物志可乎時渭州刺史李淹亦明譜學守素所論惟淹能抗之

姚思廉本名簡以字行陳吏部尚書察之子陳亡察自吳興遷京兆遂爲萬年人思廉少受漢書於察盡傳其業寡嗜欲惟一於學未嘗問家人生貴仕陳會稽王主簿入隋爲漢王府參軍事以父喪免服除補河間郡司法書佐初察在陳嘗修梁陳二史未就死以屬思廉故思廉表父遺言有詔聽續煬帝又詔與起居舍人崔祖濬修區寓圖志遷代王侍讀高祖定京師府僚皆奔亡獨思廉侍王兵將升殿思廉厲聲曰唐公起義本安王室若等不宜無禮於王衆貽却布列階下帝義之聽扶王至順陽閣泣辭去觀者歎

曰仁者有勇謂此人乎俄授秦王府文學王討徐圓朗嘗語隋事慨然嘆曰姚思廉蒙素刃以明大節古所難者時思廉在洛陽遣使遺物三百段致書曰景想節義故有是贈王爲皇太子遷洗馬卽位改著作郎弘文館學士詔與魏徵共撰梁陳書思廉采謝昺顧野王等諸家言推究綜括爲梁陳二家史以卒父業賜雜綵五百段加通直散騎常侍以藩邸恩凡政事得失許密以聞思廉亦展盡無所諱帝幸九成宮思廉以爲離宮游幸是秦皇漢武事非堯舜禹湯所爲帝諭曰朕嘗苦氣疾熱卽頓劇豈爲游賞者乎賜帛五十四拜散騎常侍豐城縣男卒贈太常卿諡曰康陪葬昭陵孫璿

贊曰隋煬帝失德高祖總豪英興北方鼓行入關舉京師轟若震霆思廉以諸生侍屏王奮然陳大義挫虓虎而奪之氣勇夫悍心褻駭自卻不敢加無禮於其君誠使有國家者舉不失義天下其何以抗之哉宜太宗之尊表云

璿字令璋少孤撫昆媚友愛力學才辯授進中舉明經第補太子宮門郎以論撰勞進祕書郎稍遷中書舍人封吳興縣男武后時擢夏官侍郎坐從弟敬節叛貶桂州長史后方以符瑞自神璿取山川草樹名有武字者以爲上應國姓哀類以聞后大悅拜檢校天官侍郎擢文昌左丞同鳳閣鸞臺平章事永徽後左右史唯對仗丞旨仗下謀議不得聞璿以帝王謨訓不可闕紀請仗下所言軍國政要責宰相自

撰號時政記以授史官從之時政有記自璿始坐事降司賓少卿延載初拜納言有司以璿族犯法不可爲侍臣者璿曰王敦犯順導典樞機嵇康被戮紹以忠死是能爲累乎后曰此朕意卿無恤浮言證聖初加秋官尙書明堂火后欲避正殿應天變璿奏此人火非天災也昔宣榭火周世延建章焚漢業昌且彌勒成佛七寶臺須臾散壞聖人之道隨物示化況明堂布政之宮非宗廟不宜避正殿貶常禮左拾遺劉承慶曰明堂所以宗祀爲天所焚當側身思過振除前犯璿挾前語以傾后意后乃更御端門大酺燕羣臣與相娛樂遂造天樞著己功德命璿爲使董督之功費浩廣見金不足乃斂天下農器并鑄以功賜爵一級后封嵩山詔璿摠知儀注爲封禪副使更造明堂又以使護作加銀青光祿大夫大食使者獻師子璿曰是獸非肉不食自碎葉至都所費廣矣陛下鷹犬且不蓄而厚資養猛獸哉有詔大食停獻時九鼎成后欲用黃金塗之璿奏鼎者神器貴質朴不待外飾臣觀其上先有五采雜珣豈待塗金爲符曜耶后乃止契丹李盡忠盜塞副梁王武三思爲榆關道安撫使坐累下遷益州長史始蜀吏貪暴璿隨發之無所容貸后聞降璿詔慰勞因謂左右曰爲二千石清其身者易使吏盡清者難唯璿爲兼之新都丞朱待辟坐贓應死待辟所厚浮屠理中謀殺璿據劍南有密告后者詔璿窮按璿深探其獄跡疑似皆捕逮株黨牽聯數千人獄具后遣洛州長史宋玄爽御史中丞霍獻可覆視無所翻坐沒入五十餘族知反流徙

者什八以上道路冤讞監察御史袁恕己劾奏璫獄不平有詔勿治召拜地官冬官二尚書久之致仕卒年七十四遺令薄葬贈越州都督諡曰成弟班

班篤學有志曜明經歷六州刺史政皆有績數被褒賜累封宣城郡公遷太子詹事兼左庶子時節愍太子稍失道班凡四上書諫其一曰臣聞賈誼稱選天下端士使與太子居處出入故太子見正事聞正言行正道左右前後皆正人也夫習與正人居不能無正習與不正人居不能無不正教得而左右正則太子正太子正天下定矣伏見內置作坊諸工伎得入宮闈之內禁衛之所或言語內出或事狀外通小人無知因為詐僞有點盛德臣望悉出宮內造作付所司其二曰漢文帝身弋緇足革烏齊高帝闡權用銅者皆易以鐵經侯帶玉具劍環佩以過魏太子太子不視經侯曰魏國亦有寶乎太子曰主信臣忠魏之寶也經侯委劍佩去杜門不出夫聖賢以簡素為貴皇王以菲薄為德惟殿下留心恭儉損省玩好以訓天下其三曰前世東宮門閤往來皆有簿籍殿下時有所須唯門司宣令姦僞乘之因緣增損近呂昇之乃代署宣敕賴殿下糾發其姦以後墨令及覆事並請內印書署冀免詐移其四曰聖人不專其德賢智必有所師今司經無學士供奉無侍讀宜視膳時奏請其人俾奉講勸夫經所以立行修身史所以諳識成敗斯急務也太子雖稱善不能用其言及敗索宮中得班諫書中宗嘉歎時宮臣皆得罪獨班擢右

散騎常侍遷祕書監睿宗立拜戶部尚書所歷定州刺史尚書官皆與璫相繼云卒年七十四始曾祖察嘗撰漢書訓纂而後之注漢書者多竊取其義為己說班著紹訓以發明舊義云

令孤德棻宜州華原人父熙隋鴻臚卿其先乃燉煌右姓德棻博覽文史大業末為藥城長屬亂不就官淮安王神通據太平宮起兵立摠管府署德棻府記室高祖入關引直大丞相府記室武德初為起居舍人遷祕書丞帝嘗問丈夫冠婦人髻比高大何邪德棻對曰冠髻在首君之象也晉之將亡君弱臣彊故江左士女衣小而裳大宋武帝受命君德尊嚴衣裳隨亦變改此近事驗也帝然之方是時大亂後經籍亡散祕書湮缺德棻始請帝重購求天下遺書置吏稱錄不數年圖典略備又建言近代無正史梁陳齊文籍猶可據至周隋事多脫損今耳目尚相及史有所馮一易世事皆汨暗無所掇拾陛下受禪于隋隋承周二祖功業多在周今不論次各為一王史則先烈世庸不光明後無傳焉帝謂然於是詔中書令蕭瑀給事中王敬業著作郎殷開禮主魏中書令封德彝舍人顏師古主隋大理卿崔善為中書舍人孔紹安太子洗馬蕭德言主梁太子詹事裴矩吏部郎中祖孝孫祕書丞魏徵主齊祕書監竇璡給事中歐陽詢文學姚思廉主陳侍中陳叔達太史令庾儉及德棻主周整振論譏多歷年不能就罷之貞觀三年復詔撰定議者以魏有魏收魏澹二家書為已詳惟五家史當立德棻更與祕書郎岑文本殿中侍御史崔

仁師次周史中書舍人李百藥次齊史著作郎姚思廉次梁陳二史祕書監魏徵次隋史左僕射房玄齡
總監修撰之原自德棻發之書成賜絹四百匹遷禮部侍郎兼修國史累進爵彭城縣子轉太子右庶子
太子承乾廢坐除名爲民召拜雅州刺史又坐事免會修晉家史房玄齡奏足之預東凡十有八人德棻
爲先進故類例多所詎定除祕書少監永徽初復爲禮部侍郎弘文館學士監修國史遷太常卿高宗嘗
召宰相及弘文學士坐中華殿問何修而王若而霸又當孰先德棻曰王任德霸任刑夏殷周純用德而
王秦專刑而霸至漢雜用之魏晉以降王霸兩失若用之王爲先而莫難焉帝曰今茲何爲而要對曰古
者爲政清心簡事爲本今天下無虞年穀豐衍惟薄賦斂省征役爲要又問禹湯桀紂所以興亡對曰傳
稱禹湯罪己其興也勃焉桀紂罪人其亡也忽焉然二主惑嬖色戮諫者造炮烙之刑此所以亡也帝悅
厚賜以答其言遷國子祭酒崇賢館學士爵爲公以金紫光祿大夫致仕卒年八十四諡曰憲時又有鄧
世隆顧胤李延壽李仁實皆以史學稱當世

鄧世隆者相州人隋大業末王世充兄子太成河陽引爲賓客秦王攻洛陽遣書諭太世隆報書夸慢洛
陽平亡命變姓名號隱玄先生棲白鹿山貞觀初召授國子主簿與崔仁師慕容善行劉顥庾安禮敬播
俱爲修史學士世隆內負罪居不聊太宗遣房玄齡諭曰爾爲人作書各忠其主耳我爲天子尚甘心足

夫邪母有後疑改著作佐郎歷衛尉丞初帝以武功定天下晚始嚮學多屬文賦詩天格曠麗意悟沖邁
十三年世隆上疏請加集錄帝謙不許終著作郎

顧胤蘇州吳人父覽仕隋祕書學士胤承徽中累遷起居郎兼修國史以撰太宗實錄勞加朝散大夫弘
文館學士論次國史加朝請大夫封餘杭縣男終司文郎中

子琮武后時爲天官侍郎同鳳閣鸞臺平章事卒后曰琮不幸令雖不舉哀然朕以股肱特廢視事一日
李延壽者世居相州貞觀中累補太子典膳丞崇賢館學士以修撰勞轉御史臺主簿兼直國史初延壽
父大師多識前世舊事常以宋齊梁陳齊周隋天下參隔南方謂北爲索虜北方指南爲島夷其史於本
國詳佗國略往往訾美失傳思所以改正擬春秋編年刊究南北事未成而歿延壽既數與論議所見益
廣乃追終先志本魏登國元年盡隋義寧二年作本紀十二列傳八十八謂之北史本宋永初元年盡陳
禎明三年作本紀十列傳七十謂之南史凡八代合二書百八十篇上之其書頗有條理刪落釀辭過本
書遠甚時人見年少位下不甚稱其書遷符璽郎兼修國史卒嘗撰太宗政典調露中高宗觀之咨美直
筆賜其家帛五十段藏副秘閣仍別錄以賜皇太子云

李仁實魏州頓丘人官至左史著格論通麻等書行于時

恒德棻五世孫天寶未及進士第遇祿山亂去隱南山豹林谷楊綰微時數從之游而恒博學有口辯綰
爲禮部侍郎修國史薦恒自華原尉拜右拾遺兼史職累遷起居舍人撰玄宗實錄屬起居注亡散恒哀
掇詔策備一朝之遺自開元天寶間名臣事多漏略拙于取舍不稱良史大厯中以刑部員外郎判南曹
遷司封郎中知制誥兼史館修撰德宗立詔元陵制度務極優厚當竭帑藏奉用度恒諫曰臣伏讀漢劉
向論山陵之誠良史咨歎何者聖賢勤儉不作無益昔舜葬蒼梧弗變其肆禹葬會稽不改其列周武葬
畢陌無已壙處漢文葬霸陵不起山墳禹非不忠啟非不順周公非不悌景帝非不孝其奉君親皆以儉
穀爲無窮計宋文公厚葬春秋書華元爲不臣桓魋爲石槨夫子以爲不如速朽由是觀之有德者葬薄
無德者葬厚章章可見陛下仁孝切於聖心然尊親之義貴合于禮先帝遺詔送終之制一用儉約不得
以金銀緣飾陛下奉先志無違物若務優厚是拂顧命整經誼巨竊懼之今赦令甫下諸條未出望速詔
有司從遺制便詔答曰朕頃議山陵荒哀迷謬以違先旨卿引據典禮非唯中朕之失亦使朕不遺君親
于患敢不聞義而從奉以終始雖古遺直何以加焉恒在吏部因尚書劉晏力時楊炎爲侍郎故恒內德
晏至分闕以善闕奉晏惡闕與炎炎心不平建中初恒爲禮部侍郎炎執政不爲憾炎出故宰相杜鴻漸
門下其子封求弘文生以託恒恒謝使者曰得公手署恒得以識炎不疑署送之恒卽日奏言宰相迫臣

以私從之負陛下不從則害臣帝以詰炎炎具道所以然帝怒曰此姦人無可奈何欲殺之炎苦救解乃
貶衡州別駕遷刺史李泌執政召拜太子右庶子復爲修撰性復且介人人與爲怨孔述睿同修史恒忿
細故數侵之述睿長者無所校貞元五年坐守衡州冒前刺史戶口爲己最賢參素惡之貶吉州別駕稍
遷刺史齊映爲江西觀察使按部及州恒輕映後世先至宰相今雖屬刺史自挾所以過映者至迎謁頗
快映以語其妻妻曰君自視何如人以白頭走小生前君不以此見映雖黜死我無憾映至恒入謁從容
步進不祿首屬戎器映以爲恨去至府隨恒舉奏前刺史過失無狀不宜按部貶衡州別駕刺史田敦恒
門生也與恒昧生平至是迎拜分俸半以贖給之在衡十年順宗立以祕書少監召未至卒初受詔撰代
宗實錄未就會貶詔聽在外成書元和中其子太僕丞丕獻之以勞贈工部尚書
贊曰文本才猷世南顛謬百藥之持論亮思廉之邃雅德棻之辭章皆治世華采而灑汨於隋光明於唐
何哉蓋天下未嘗無賢以不用亡不必多賢以見用興夫典章圖史有國者尤急所以考存亡成敗陳諸
前而爲之戒方天下初定德棻首發其議而後唐之文物粲然誠知治之本歟

唐書卷一百一

唐書卷一百二考證

岑文本孫羲乃薦羲為汜水令○沈炳震曰舊書長安中為廣武令考地理志汜水垂拱四年改曰廣武

至神龍元年復故名則長安時有廣武無汜水也當從舊書

褚亮傳曾祖湮父玠皆有名梁陳間○臣德潛按陳書褚玠傳祖湮此作湮而宰相世系表又作漢應誤

李守素傳通氏姓學世號肉譜○舊書當時號為行譜

唐書卷一百三

宋 端 明 殿 學 士 宋 祁 撰

列傳第二十八

蘇韋孫張

蘇世長京兆武功人祖彤仕後魏通直散騎常侍父振周宕州刺史建威縣侯世長十餘歲上書周武帝
 帝異其幼問讀何書對治孝經論語帝曰何言可道答曰為國者不敢侮於鰥寡為政以德帝曰善使卒
 學虎門館父死王事有詔襲爵世長號踊不自勝帝爽然改容入隋為長安令數條上便宜大業末為都
 水少監督漕上江會煬帝被弑發喪慟聞行路更為王世充太子太保行臺右僕射與世充兄子弘烈及
 其將豆盧行襲成襄陽高祖與之舊數遣使者諭降輒殺之洛陽平始與弘烈歸帝誅襲而謂世長頓首
 謝曰古帝王受命以比逐鹿一人得禽萬夫歛手豈有獲鹿後忿同獵者問爭肉罪邪今陛下應天順民
 安可忘管仲雍齒事且武功舊人亂離以來死亡略盡唯臣得見太平若殺之是絕其類帝笑釋之授玉
 山屯監引見玄武門與語平生調之曰卿自謂佞邪直邪對曰愚且直帝曰若直者何為背賊歸我對曰
 洛陽平天下為一臣智窮力屈乃歸陛下使世充不死臣據漢南尚為勅敵帝大笑嘲曰何名長而意之

短口正而心之邪世長曰名長意短誠如聖旨口正心邪不敢奉詔昔竇融以河西降漢十世侯之臣舉山南以歸唯蒙屯監帝悅拜諫議大夫從獵涇陽大獲帝入旌門詔左右曰今日收樂乎世長曰陛下廢萬機事游獵不滿十旬未爲樂也帝色變既而笑曰狂態發邪曰爲臣計則狂爲陛下計忠矣時武功郿新經突厥寇掠鄉聚凋虛帝將遂獵武功世長諫曰突厥向盜劫人陛下救卹之言未出口又獵其地殆百姓不堪所求帝不聽待宴披香殿酒酣進曰此煬帝作邪何雕麗底此帝曰卿好諫似直然詐也豈不知此殿我所營乃詭云煬帝邪對曰臣但見傾宮鹿臺非受命聖人所爲者陛下武功舊第纔蔽風雨時以爲足今天下猷隋之侈以歸有道陛下宜刈奢淫復朴素今乃卽其宮加雕飾焉欲易其亂得乎帝咨重其言歷陝州長史天策府軍諮祭酒引爲學士貞觀初使突厥與頡利爭禮不屈拒卻賂遣朝廷壯之出爲巴州刺史舟敗溺死世長有機辯凌于學嗜酒簡率無威儀初在陝邑里犯法不能禁乃引咎自撻于塵伍伯疾其詭鞭之流血世長不勝痛呼而走人笑其不情

子良嗣高宗時爲周王府司馬王年少不法良嗣數諫王以法繩府官不職者甚見尊憚帝異之遷荊州長史帝遣宦者采怪竹江南將時上苑宦者所過縱暴至荆良嗣囚之上書言狀帝下詔慰獎取竹弃之徙雍州時關內饑人相食良嗣政上嚴每盜發三日內必禽號稱神明垂拱初遷冬官尙書拜納言封温

國公留守西京賞遇尤渥尙方監裴匪躬案諸苑建言鸞果蔬儲利佐公上良嗣曰公儀休一諸侯相拔葵去織未聞天子賣果蔬與人爭利遂止遷文昌左相同鳳閣鸞臺三品遇薛懷義于朝懷義偃蹇良嗣怒叱左右批其頰曳去武后聞之戒曰第出入北門彼南衙宰相往來毋犯之載初元年罷左相加特進仍知政事與韋方質素不平方質坐事誅引逮之后辨其非良嗣悖謝不能興輿還第卒年八十五詔百官往弔贈開府儀同三司益州都督始良嗣爲洛州長史坐僚壻累下徙冀州刺史其人往謝良嗣色泰定曰初不聞有累在荊州時州有河東寺本蕭管爲兄河東王所建良嗣曰江漢間何與河東乎奏易之而當世恨其少學云子踐言官太常丞爲酷吏所陷死嶺南削父爵沒其家神龍元年復贈司空以踐言子務元襲爵終邠王府長史

從孫弁字元容擢進士調奉天主簿德宗出狩而縣令計事在府官屬皆惶恐欲遁走弁曰昔肅宗幸靈武至新平安定二太守坐伏匿斬以徇諸君知之乎衆乃定車駕至儲侍畢給帝嘉之賦大理司直朱泚平進監察御史擢累倉部郎中判度支案裴延齡死帝召弁見延英賜紫衣金魚以度支郎中副知度支事位郎中上知度支有副自弁始弁通學術吏事精明承延齡後平賦緩役略煩苛人賴其寬久之遷戶部侍郎判度支改太子詹事舊制詹事位在太常宗正卿下御史中丞竇參卑之徙班河南太原尹下弁

造朝輒就舊著有司疑詰給曰我已白宰相復舊班殿中侍御史鄒儒立劾奏待罪金吾有詔原罪坐前以腐粟給邊貶汀州司戶叅軍是時兄衰爲贊善大夫冕京兆士曹叅軍以弁故貶衰永州冕信州司戶叅軍衰年老眼不能視帝閱之聽還又有稱冕才者帝悔不用而衰以老先還重追冕更問大臣昆弟可任者左右以王紹之兄紆韓阜之兄羣對帝乃擢紆右補闕羣考功員外郎冕遂不復用數年起弁爲滁州刺史卒弁聚書至二萬卷手自管定當時稱與祕府埒弁之判度支方大旱州縣有漣米斷貞元八年以前凡三百八十萬斛人亡數在弁奏請出以貸貧民至秋而償詔可當時譏其罔君云

韋雲起京兆萬年人隋開皇中以明經補符璽直長嘗奏事文帝前帝曰外事不可言之時兵部侍郎柳述待雲起卽奏述性豪侈未嘗更事特緣主壻私握兵要議者謂陛下官不擇賢此不便者帝顧述曰雲起言而藥石也可師之仁壽初詔百官舉所知述舉雲起通事舍人大業初改謁者建言今朝廷多山東人自作門戶附下罔上爲朋黨不抑其端必亂政因條陳姦狀煬帝屬大理推究於是左丞郎蔚之司隸別駕郎楚之等皆坐死會契丹寇營州詔雲起護突厥兵討之啟民可汗以一萬騎受節度雲起使離爲二十屯屯相聯絡四道並引令曰鼓而行角而止非公使毋走馬三喻五復之旣而紇斤一人犯令卽斬以徇於是突厥酋長入謁者皆膝而進莫敢仰視始契丹事突厥無間且不虞雲起至旣入境使突厥

給云詣柳城與高麗市易敢言有隋使在者斬契丹不疑因引而南過賊營百里夜遣陣以遲明掩擊之獲契丹男女四萬以女子及畜產半賜突厥男子悉殺之以餘衆還帝大喜會百官於廷曰雲起將突厥兵平契丹以奇用師有文武才朕自舉之拜治書御史因劾奏內史侍郎虞世基御史大夫裴蘊怙寵妨命四方有變不以聞聞之以實朝議少賊不多發兵官兵少賊衆數見敗北賊氣日張請付有司案罪大理卿鄭善果奏雲起嘗大臣毀朝政所言不情貶大理司直帝幸江都請告歸高祖入關上謁長樂宮授司農卿陽城縣公武德初進上開府儀同三司判農圃監時議討王世充雲起上言京師初平人未堅附百姓流離仍歲無年蓋屋司竹藍田谷口盜賊羣屯京都椎剽乘夜竊發重以梁師都嫁情北胡陰計內鈔爲腹心患釋此不圖而窺兵函洛姦人乘虛一旦有變禍且不細臣愚以爲不若戢兵務農須關中安士氣餘飽然後議討伐一舉可定從之會突厥入寇詔總幽靈以北九州兵禦之得一切便宜改遂州都督益州行臺兵部尚書時僕射竇軌數奏生獠反冀得集兵以威衆雲起數持掣軌宣言雲起通賊營私由是始隙雲起弟慶儉慶嗣事隱太子太子死詔軌息馳驛報軌疑雲起有變陰設備乃告之雲起不信曰詔安在軌曰公建成黨今不奉詔反明矣遂殺之初雲起師太學博士王頗每歎曰韋生識悟富貴可自致然疾惡甚恐不得死詔如言孫方質光宅初爲鳳閣侍郎同鳳閣鸞臺平章事遷地官尚書嘗屬

疾武承嗣兄弟往候方質據牀自若或曰倨見權貴且楚禍答曰吉凶命也丈夫豈能折節近賊以苟免邪俄爲酷吏所陷流死僧州沒其家神龍初復官爵

孫伏伽貝州武城人仕隋以小史累勞補萬年縣法曹高祖武德初上言三事其一臣聞天子有爭臣雖無道不失其天下隋失天下者何不聞其過也方自謂功德盛五帝邁三王窮侈極欲使天下士肝腦塗地戶口殫耗盜賊日滋當時非無直言之臣卒不聞悟者君不受諫而臣不敢告之也向使開不諱之路官賢授能賞罰時當人人樂業誰能搖亂者乎陛下舉晉陽天下響應計不旋踵大業以成勿以得天下之易而忘隋失之不難也天子勳則左史書之言則右史書之凡蒐狩當順四時不可妄動且陛下卽位之明日有獻鷄者不卻而受此前世弊事奈何行之相國參軍事盧牟子獻琵琶長安丞張安道獻弓矢並被資賞以率土之富何索不致豈少此物哉其二百戲散樂本非正聲隋末始見崇用此謂淫風不得不變近太常假民裙襦五百稱以衣妓工待立武門游戲臣以爲非論子孫之謀傳曰放鄭聲遠佞人今散妓者匪韶匪夏請並廢之以復雅正其三臣聞性相近習相遠今皇太子諸王左右執事不可不擇大抵不義無賴及馳騁射獵歌舞聲色慢游之人止可悅耳目備驅馳至拾遺補闕決不能也汎觀前世子姓不克孝兄弟不克友莫不由左右亂之願選賢才澄僚友之選帝大悅卽詔周隋之晚忠臣結舌是謂

一言喪邦者朕惟寡德不能性與天道然冀弼諧以輔不逮而羣公卿士罕進直言伏伽至誠慷慨據義懇切指朕失無所諱其以伏伽爲治書侍御史賜帛三百匹初帝授禪伏伽最先諫帝欲盡下情故不次見拔以示羣臣是時軍興賦歛重伏伽數請蠲損帝語裴寂曰隋爲無道主驕於上臣諂於下上下蔽蒙至身死匹夫手盪不痛哉我今不然平亂責武臣守成責儒臣程能付事以佐不逮虛心盡下冀聞嘉言若李綱孫伏伽可謂諫臣矣俛首嚙默豈朕所望哉東都平大赦天下又欲責賊支黨悉流徙惡地伏伽諫曰臣聞王者無戲言書稱爾無不信朕不食言言之不可不慎也陛下制詔曰常赦不免皆原之此非直赦有罪是亦與天下更新辭也世充建德所部赦後乃欲流徙書曰殲厥渠魁脅從罔治渠魁尙免脅從何辜且隳狗吠堯吠非其主今與陛下結髮雅故往爲賊臣彼豈忘陛下哉竊隔故也至疏者安得而罪之由古以來何代無君然止稱堯舜者何也直由善名難得也昔天下未平容應機制變今四方已定設法須與人共之法者陛下自作須自守之使天下百姓信而畏也自爲無信欲人之信豈可得哉賞罰之行無貴賤親疏惟義所在臣愚以爲賊黨於赦當免者雖甚無狀宜一切加原則天下幸甚又表置諫官帝皆欽納太宗卽位封樂安縣男遷大理少卿帝數出馳射伏伽諫曰臣聞天子之居禁衛九重出也警入也蹕非直尊其居處爲社稷生人計也比聞陛下走馬射帖娛悅羣臣殆非所以導養聖躬垂憲後

代此直少年諸王務耳安得既爲天子尚行之乎竊爲陛下不取帝悅曰卿能言朕非朕能改之天下庶有瘳乎後坐奏囚失免官起爲刑部郎中累遷大理卿時司農市木檀倍直與民右丞韋悰劾更隱沒事下大理訊鞠伏伽曰緣官市貴故民直賤臣見司農識大體不見其罪帝悟顧悰曰卿不逮伏伽遠矣久之出爲陝州刺史致仕顯慶三年卒始伏伽拜御史時先被內旨而制未出歸臥于家無喜色頃之御史造門子弟驚白伏伽徐起見之時人稱其有量以比顧雍云

張玄素蒲州虞鄉人仕隋爲景城縣戶曹竇建德陷景城執將殺之邑人千餘號泣請代曰此清吏殺之是無天也大王卽定天下無使善人解體建德命釋縛署治書侍御史不拜聞江都已弒始爲建德黃門侍郎賊平授景州錄事參軍太宗卽位問以政對曰自古未有如隋亂者得非君自專法日亂乎且萬乘之尊身決庶務日斷十事五不中中者信善有如不中者何一日萬機積其失不亡何待若上賢右能使百司善職則高居深拱疇敢犯之隋末盜起爭天下者不十數餘皆保城邑以須有道聽命是欲背上怙亂者果鮮特人君不能安之而挺之亂也以陛下聖神跡所以危鑒所以亡日慎一日雖堯舜何以加帝曰善拜侍御史遷給事中貞觀四年詔發卒治洛陽宮乾陽殿且東幸玄素上書曰臣惟秦始皇帝藉周之餘夷六國統壹尊將貽之萬世及子而亡者殫嗜奔欲以逆天害人也天下不可以力勝唯當務儉約

薄賦歛以身先之乃能大安今東都未有幸期前事土木戚王出藩又當營構科調繁仍失疲人望一不可也陛下向平東都會觀廣殿皆撤毀之天下翕然一口頌歌豈有初惡侈靡而後好雕麗哉二不可也陛下每言巡幸者不急之務徒爲虛費今國儲無兼年又興別都之後以產怨讎三不可也百姓承亂離之後財賦殫空雖蒙更生意未定奈何營未幸之都重耗其力四不可也漢祖將都洛陽襄敬一言卽日西駕非不知地土中道里所均但形勝不及關內弗敢康也伏惟陛下化凋弊之俗爲日尙淺詎可東巡以搖人心五不可也臣嘗見隋家造殿伐木於豫章二千人挽一材以鐵爲轂行不數里轂輒壞別數百人齎轂自隨終日行不三十里一材之費已數十萬工揆其餘可知已昔阿房成秦人散章華就楚衆離乾陽畢功隋人解體今民力未及隋日而役殘創之人襲亡國弊臣恐陛下之過甚於煬帝帝曰卿謂我不如煬帝何如桀紂對曰若此殿卒興同歸於亂臣聞東都始平太上皇詔宮室過度者焚之陛下謂瓦木可用請賜貧人事雖不從天下稱爲盛德今復度而宮之是隋役又興不五六年間一捨一取天下謂何帝顧房玄齡曰洛陽朝貢天下中朕營之意欲便四方百姓今玄素言如此使後必往雖露坐庸何苦卽詔罷役賜綵二百匹魏徵名梗挺聞玄素言歎曰張公論事有回天之力可謂仁人之言哉歷太子少詹事遷右庶子時太子承乾事游畋不悅學玄素上書曰天道無親惟德是輔苟違天道人神棄之古

者田三驅非以教殺除民害也今反以獵爲娛行之無常不損盛德哉傳曰事不師古匪說攸聞然則探道在學古學古在師訓孔穎達奉詔講勸宜數速問裨萬分博選賢傑朝夕侍左右與相規摩日知所亡月無忘所能此則善美矣夫在人上者常求爲善也然性不勝情耽惑成亂下有諛言君道乃虧古人有云勿以惡小不去善小不爲禍福之來皆根於初護終若始猶懼其替始不護焉終將安歸太子不納又上書曰周公資聖人而握沐吐飧下白屋況下周公之人哉殿下睿質天就尙須學以表飾之孔穎達趙弘智皆宿德鉅髦識政機望數召見述古今增懿明德雕蟲小技正可間召代博奕不宜屢也騎射畋游褻戲酣歌悅耳目移情靈不可以御夫心爲萬事主動而無節則亂敗德之原實在於此帝知數財正太子頓擢至銀青光祿大夫行左庶子太子久不見賓友玄素曰宮中所見止婦人不知如樊姬等可與益聖德者幾何若無之卽便詖黷何足顧哉上惟東宮之重高署賢才爲寮佐今乃不得進見將何以朝納誨夕補遺哉太子諱其切夜遣戶奴以騎槌狙擊危脫死嘗聞宮中擊鼓叩閣正言太子出鼓對玄素破之既不悛醜德日聞玄素不能已上書曰孔子曰能近取譬可謂仁之方也書傳所載或遠臣請以近事喻之周武帝平山東庫官陋食以安海內而太子贊有穢德烏丸軌以聞帝慈仁不忍廢及踐祚狂暴日熾宗祀以亡隋文帝所代是也文帝因周衰藉女資雖無大功於人然布德行惠上下安賴勇爲太

子驕肆敗度今宮中山池殿下所親見者也當是時自謂有太山之安詎知壬臣敢進其說哉向使動靜有常進止有度親君子疏小人黜浮華守恭儉雖有離間烏能致慈父之隙哉蓋積德弗純令問不著一遭讒遂成其禍今上以殿下親故所費用不爲限節然詔未六旬而用踰七萬驕奢亡藝孰有過此龍樓望苑爲工匠之肆旣闕視膳問安之宜又無悅學好道之實上違君父慈訓之方下有因緣戮辱之罪所施與者不游手雜色則圖畫雕鏤之人外所瞻仰此失已暴內隱密者尙可勝計哉右庶子趙弘智經明行修巨謂宜數進召以廣徽美今反猜嫌謂妄相推引從善若流向恐不逮飾非拒諫禍可既乎書入太子怒遣刺客伺之會宮廢玄素坐除名爲民頃之召授潮州刺史徙鄧州訖不復親近高宗時以老致仕麟德初卒始玄素與孫伏伽在隋皆爲令史太宗嘗問玄素宜立所來深自羞汗褚遂良見帝曰君子不失言於人明主不失言於戲故言則史書之禮成之樂歌之居上能禮其臣乃盡力以奉其上近世宋武帝侮斬朝臣攻其門戶至恥懼狼狽前史以爲非陛下昨問玄素在隋任何官對曰縣尉又問未爲尉時曰流外又問何曹司玄素出不能徒步顏若死灰精爽頓盡見者咸共驚怪唐家創業任官以才卜祝庸保量能並用陛下以玄素擢任三品佐皇儲豈宜復對羣臣使辭窮負恥欲責其伏節死義安可得乎帝曰朕亦悔之伏伽雖廣坐陳說往事無少隱焉

贊曰始唐有天下懲刈隋敝敷內讜言而世長等仇然獻忠時主方褻聽藉以勸天下雖觸禁忌而無忤情及禍亂已平君位尊安後者視前人之爲猶以鯁論期榮故時時遭斥讓爲所厭苦非言有巧拙所遭之時異也夫性有不可移雖堯舜弗能訓承乾之惡根著寸心而歸責玄素其何救哉此士壘辭不能傳太子諒矣

唐書卷一百三

唐書卷一百四

宋 端 明 殿 學 士 宋 祁 撰

列傳第二十九

于高張

于志寧字仲謐京兆高陵人曾祖謹有功於周爲太師燕國公父宣道仕隋至內史舍人大業末志寧調冠氏縣長山東盜起棄官歸高祖入關率羣從迎謁長春宮詔授渭北道行軍元帥府記室與殷開山參謀議薛仁果平讖褚亮於囚虜中遷天策府中郎文學館學士引亮與同列貞觀三年爲中書侍郎太宗嘗宴近臣問志寧安在有司奏敕召三品志寧品第四帝悟特詔預宴因加散騎常侍太子左庶子黎陽縣公是時議立七廟羣臣請以涼武昭王爲始祖志寧以涼非王業所因獨建議違之帝詔功臣世襲刺史志寧奏古今異時慕虛名遺實患非久安計帝皆從之嘗謂志寧曰古者太子旣生士負之卽置輔弼昔成王以周召爲師傅日聞正道習以成性今太子幼卿當輔以正道無使邪僻啟其心勉之官賞可不大得也太子承乾數有過惡志寧欲救止之上諫苑以諷帝見大悅賜黃金十斤絹三百匹俄兼詹事以母喪免有詔起復本官固請終喪帝遣中書侍郎岑文本敦譬曰忠孝不兩立今太子須人教約卿疆起

爲我卒輔道之志寧乃就職時太子以農時造曲室累月不止又好音樂過度志寧諫以爲今東宮乃隋所營當時號爲侈麗豈容復事磨礪彩飾於其間丁匠官奴皆犯法亡命鉗鑿槌杵往來出入監門宿衛直長千牛不得苛問爪牙在外厮役在內其可無憂乎又宮中數聞鼓聲太樂伎兒輒留不出往年口敕丁寧殿下可不思之太子不納而左右多任宦官志寧復諫曰奄宦者體非全氣專柔便佞託親近爲威權假出納爲禍福故伊戾敗宋易牙亂齊趙高亡秦張讓傾漢近高齊任鄧長暉爲侍中陳德信爲開府內預宴私外干朝政齊卒顛覆今殿下左右前後皆用寺人輕忽高班陵轢貴仕品命失序經紀不立行路之人咸以爲怪太子益不悅東宮僕御舊得番休而太子不聽又私引突厥與相狎比志寧懷不能言上疏極言曰竊見僕寺司馭爰及獸醫自春迄夏不得番息或家有慈親以闕溫清或室有幼弱以虧撫養殆非怨愛之意又突厥達哥支等人狀野心不可以禮教期不可以仁信待狎而近之無益令望有損盛德況引內閣中使常親近人皆震駭而殿下獨安此乎太子大怒遣張師政紇干承基往刺之三人者入其第見志寧憔悴在苦塊中不忍殺乃去太子敗帝知狀謂曰聞公數諫承乾不聽公故至此是時宮臣皆罪廢獨志寧蒙勞勉晉王爲皇太子復拜左庶子遷侍中加光祿大夫進封燕國公監修國史永徽二年洛陽人李弘泰誣告太尉長孫无忌反有詔不待時斬之志寧以爲方春少陽用事不宜行刑且誣

謀非本惡逆請依律待秋分乃決從之衡山公主旣公除將下嫁長孫氏志寧以爲禮女十五而笄二十而嫁有故二十三而嫁固知遇喪須終三年春秋魯莊公如齊納幣母喪未再葺而鬪婚二家不譏以其失禮明也今議者云公除從吉此漢文創制爲天下百姓耳公主身服斬衰服可以例除情不可以例改心喪成婚非人情所忍於是詔公主待服除乃婚拜尙書左僕射同中書門下三品頃之兼太子少師四年隕石十八于馮翊高宗問曰此何祥也朕欲悔往修來以自戒若何志寧對春秋隕石于宋五內史過曰是陰陽之事非吉凶所生物固有自然非一繫人事雖然陛下無災而戒不書爲福也俄遷太傅嘗與右僕射張行成中書令高季輔俱賜田志寧奏臣家自周魏來世居關中貲業不墜今行成季輔始營產土願以臣有餘賜不足者帝嘉之分其田以與二人顯慶四年以老乞骸骨詔解僕射更拜太子太師仍同中書門下三品王皇后之廢長孫无忌褚遂良固爭不見從志寧不敢言武后以其不右己銜之後因殺无忌坐免官出爲榮州刺史改華州聽致仕卒年七十八贈幽州都督諡曰定後追復左光祿大夫太子太師志寧愛賓客樂引後進然多嫌畏不能有所薦達也爲士議所少凡格式律令禮典皆與論議賞賜以巨萬初志寧與司空李勣修定本草并圖合五十四篇帝曰本草尙矣今復修之何所異邪對曰昔陶弘景以神農經合雜家別錄註詔之江南偏方不周曉藥石往往紕繆四百餘物今考正之又增後世

所用百餘物此以爲異帝曰本草別錄何爲而二對曰班固唯記黃帝內外經不載本草至齊七錄乃稱
之世謂神農氏嘗藥以拯含氣而黃帝以前文字不傳以識相付至桐雷乃載篇冊然所載郡縣多在漢
時疑張仲景華佗竄記其語別錄者魏晉以來吳普李當之所記其言華葉形色佐使相須附經爲說故
弘景合而錄之帝曰善其書遂大行曾孫休烈

休烈機鑿融敏善文章與會稽賀朝萬齊融延陵包融齊名開元初第進士又擢制科歷祕書省正字吐
蕃金城公主請文籍四種玄宗詔祕書寫賜休烈上疏曰戎狄國之寇經籍國之典也戎之生心不可以
無備昔東平王求史記諸子漢不與之以史記多兵謀諸子雜詭術也東平漢之懿戚尙不示征戰之書
今西戎國之寇讎安可貽以經典且吐蕃之性慄悍果決善學不回若達於書則知戰深於詩則知武夫
有師干之試深於禮則知月令有廢興之兵深於春秋則知用師詭詐之計深於文則知往來書檄之制
此何異假寇兵資盜糧也臣聞魯秉周禮齊不加兵吳獲乘車楚屢奔命喪法危邦可取鑒也公主下嫁
異國當用夷禮而反求良書恐非本意殆有姦人勸導其中若陛下慮失其情示不得已請去春秋夫春
秋當周德旣衰諸侯盛疆征伐競興情僞於是乎生變詐於是乎起有以臣召君取威定霸之事誠與之
國之患也狄固貪婪貴貨易土正可錫以錦綵厚以金玉無足所求以資其智疏入詔中書門下議侍中

裴光庭曰吐蕃不識禮經孤背國恩今求哀稽顙許其降附漸以詩書陶以聲教斯可致也休烈但見情
僞變詐於是乎生不知忠信節義亦於是乎在帝曰善遂與之累遷起居郎直集賢殿學士比部郎中楊
國忠爲宰相斥不附己者出爲中部郡太守肅宗立休烈奔行在擢給事中遷太常少卿知禮儀事兼修
國史帝嘗謂曰良史者君舉必書朕有過失顧卿何如對曰禹湯罪己其興也勃焉有德之君不忘規過
於時經大盜後史籍燔缺休烈奏國史開元實錄起居注及餘書三千八百餘篇藏興慶宮兵興焚燬皆
盡請下御史覈史館所由購府縣有得者許上送官一書進官一資一篇絹十匹凡數月止獲一二篇唯
章述以其家藏國史百三十篇上獻中興文物未完休烈獻五代論討著舊章天子嘉之轉工部侍郎仍
修史宰相李揆矜己護前羞與同史任爲等列奏徙休烈爲國子祭酒權留史館修撰以卑下之休烈安
然無屑意乾元初始詔百官元日冬至於光順門賀皇后休烈奏周禮有命夫朝人君命婦朝女君自顯
慶以來則天皇后甫行此禮而命婦與百官雜處在禮不經帝罷之代宗嗣位甄別名品元載稱其清諒
拜右散騎常侍兼修國史加禮儀使遷太常卿累進工部尙書封東海郡公雖歷清要不治產性恭儉仁
愛無喜愠之容樂賢下善推轂士甚衆年老篤意經書嗜學不厭妻章卒天子嘉休烈父子著儒行詔贈
章國夫人葬給國簿鼓吹歲中休烈亦卒年八十一帝爲歎息贈尙書左僕射諡曰元遺謁者就第宣慰

爲儒者榮二子益肅及休烈時相繼爲翰林學士益天寶初及進士第肅終給事中贈吏部侍郎肅子敷字昭中擢進士爲祕書省校書郎楊憑李鄴呂元膺相繼辟幕府元和初拜監察御史五遷至右司郎中進給事中左拾遺龐嚴爲元稹李紳所厚與蔣防俱薦爲翰林學士李逢吉誣紳罪逐之而出嚴爲信州刺史防汀州刺史敷封還詔書縉紳意申嚴枉及駁奏下乃論貶嚴太輕衆皆嗤譟逢吉乃厚敷三遷至戶部侍郎出爲宣歙觀察使敷修謹家世用文學進初爲時所稱及居官無所建明不逆物以自容名益減卒贈禮部尚書四子球珪環琮皆清顯琮知名龐嚴者字子肅壽州壽春人第進士舉賢良方正策第一拜拾遺辭章峭麗累遷駕部郎中知制誥坐累出復入稍遷太常少卿大和五年權京兆尹疆幹不阿貴勢然貪利瀾聲色卒于官

琮字禮用落魄不事事以門資爲吏久不調駙馬都尉鄭顥獨器之宣宗詔選士人尙公主者顥語琮曰子有美才不飾細行爲衆毀所抑能爲之乎琮許諾中書舍人李藩知貢舉顥以琮託之擢第授左拾遺初尙承福公主主未降食帝前以事折以箸帝知其不可妻士大夫更詔尙廣德公主咸通中以水部郎中爲翰林學士遷中書舍人閏五月轉兵部侍郎判戶部八年同中書門下平章事進中書侍郎兼戶部尚書爲韋保衡所構檢校司空山南東道節度使三貶韶州刺史保衡敗僖宗以太子少傅召未幾復爲

山南節度使入拜尙書右僕射黃巢陷京師以病臥家巢欲起爲相琮辭疾賊迫脅不止乃曰吾死在旦夕位宰相義不受汚賊遂害之

高馮字季輔以字行德州碯人居母喪以孝聞兄元道仕隋爲汲令縣人反城應賊殺元道季輔率其黨與縣人戰禽之斬首以祭賊衆畏伏更歸附之至數千人俄與武陟李厚德將其衆降授陟州總管府戶曹參軍貞觀初拜監察御史彈治不避權要累轉中書舍人列上五事以爲今天下大定而刑未措何哉蓋謀猷之臣臺閣之吏不崇簡易而昧經遠故執憲者以深刻爲奉公當官者以侵下爲益國如尙書八坐人主所責成者也宜擇溫厚修絮者任之敦樸素革浮僞使家識慈孝人知廉恥過行者被嗤於鄉不昵者蒙擯於親自然禮節興矣陛下身帥節儉而營繕未息丁匠不能給驅使又和雇以重勞費人主所欲何求而不得願愛其財毋使殫惜其力毋使弊畿內數州京師之本土狹人庶儲畜少而科役多宜蒙優貸令得休息疆本弱支之義也至江南河北人頗舒閑宜爲差等均量勞逸公侯勳戚之家邑入俸稍足以奉養而貸息出舉爭求什一下民化之競爲錐刀宜加懲革今外官卑品皆未得祿故饑寒之切夷惠不能全其行爲政之道期於易從不恤其匱而須其廉正恐巡察歲出輜軒繼軌而侵漁不息也宜及戶口之繁倉庾且實稍加稟賜使得事父母養妻子然後督責其効則官人畢力矣密王元曉等俱陛下

懿親當正其禮比見帝子拜諸叔答拜爵封既同當明昭穆願垂訓正以爲彝法書奏太宗稱善進授太子右庶子數上書言得失辭誠切至帝賜鍾乳一劑曰而進藥石之言朕以藥石相報後爲吏部侍郎善銓敘人物帝賜金背鏡一況其清鑒焉久之遷中書令兼檢校吏部尚書監修國史進爵菑縣公永徽初加光祿大夫侍中兼太子少保感疾歸第有詔以其兄號州刺史季通爲宗正少卿視疾遣中使日候增損卒年五十八贈開府儀同三司荊州都督諡曰憲官給輜車歸葬於鄉子正業仕至中書舍人坐善上官儀貶嶺表

張行成字德立定州義豐人少師事劉炫炫謂門人曰行成體局方正廊廟才也隋大業末察孝廉爲謁者臺散從員外郎後爲王世充度支尚書世充平以隋資補穀熟尉家貧代計吏集京師擢制舉乙科改陳倉尉高祖謂吏部侍郎張銳曰今選吏豈無才用特達者朕將用之銳言行成調富平主簿有能名召補殿中侍御史糾劾嚴正太宗以爲能謂房玄齡曰古今用人未嘗不因介紹若行成者朕自舉之無先容也嘗侍宴帝語山東及關中人意有同異行成曰天子四海爲家不容以東西爲限是示人以隘矣帝稱善賜名馬一錢十萬衣一稱自是有大政事令與議焉累遷給事中帝嘗謂羣臣朕爲人主兼行將相事豈不是奪公等名舜禹湯武得稷高伊呂而四海安漢高祖有蕭曹韓彭而天下寧茲事朕皆兼之行

成退上疏曰有隋失道天下沸騰陛下撥亂反正拯人塗炭何周漢君臣所能比數雖然盛德含光規模宏遠左右文武誠無將相材奚用大庭廣衆與之量校損萬乘之尊與臣下爭功哉帝嘉納之轉刑部侍郎太子少詹事太子駐定州監國謂曰吾乃送公衣錦過鄉邪今有司祠其先墓行成薦里人魏唐卿崔寶權馬龍駒張君劼等皆以學行聞太子召見以其老不可任以事厚賜遣之太子使行成詣行在帝見悅甚賜勞尤渥還爲河南巡察大使稱旨檢校尚書左丞是歲帝幸靈州詔皇太子從行成諫曰皇太子宜留監國對百寮日決庶務旣爲京師重且示四方盛德帝以爲忠遷侍中兼刑部尚書高宗卽位封北平縣公監修國史時晉州地震不戢帝問之對曰天陽也君象地陰也臣象君宜動臣宜靜今靜者顧動恐女謁用事人臣陰謀又諸王公主參承起居或伺間隙宜明設防閑且晉陛下本封應不虛發伏願深思以杜未萌帝然之詔五品以上極言得失俄拜尚書左僕射太子少傅永徽四年自三月不雨至五月行成懼以老乞身制答曰古者策免乖罪己之義此在朕寡德非宰相咎乃賜宮女黃金器敕勿復辭行成固請帝曰公朕之舊奈何舍朕去邪泣然流涕行成惶恐不得已復視事未幾卒於尚書省舍年六十七詔九品以上就第哭比斂三遣使賜內衣服尚宮宿其家護視贈開府儀同三司并州都督祭以少牢諡曰定弘道元年詔配享高宗廟廷族子易之昌宗

易之幼以門蔭仕累遷尙乘奉御既冠所習美姿製音技多所曉通武后時太平公主薦其弟昌宗得侍昌宗白進易之材用過臣善治鍊藥石卽召見悅之兄弟皆幸出入禁中傅朱粉衣紈錦盛飾自喜卽日拜昌宗雲麾將軍行左千牛中郎將易之司衛少卿賜甲第帛五百段給奴婢窠宅馬牛充入之不數日進拜昌宗銀青光祿大夫賜防閣同京官朝朔望追贈父希臧爲襄州刺史母臧並封太夫人尙宮問省起居詔尙書李迥秀私侍臧昌宗與不旬日貴震天下諸武兄弟及宗楚客等爭造門伺望顏色親執轡筆號易之爲五郎昌宗六郎又加昌宗右散騎常侍聖歷二年始置控鶴府拜易之爲監久之更號奉宸府以易之爲令乃引知名士閭朝隱薛稷員半千爲供奉后每燕集則二張諸武雜侍搏博爭道爲笑樂或嘲詆公卿淫蠱顯行無復羞畏時無檢輕薄者又諂言昌宗乃王子晉後身使被羽裳吹簫乘寓鶴裴回庭中如仙法狀詞臣爭爲賦詩以媚后后知醜聲甚思有以掩覆之乃詔昌宗卽禁中論著引李嶠張說宋之問富嘉謨徐彥伯等二十有六人譏三教珠英加昌宗司僕卿易之麟臺監權勢震赫皇太子相王請封昌宗爲王后不聽遷春官侍郎封鄴國公易之恆國公實封各三百戶后既春秋高易之兄弟顯政邵王重潤與永泰郡主竊議皆得罪縊死御史大夫魏元忠嘗劾奏易之等學易之訴於后反誣元忠與司禮丞高戩約曰天子老當挾太子爲耐久朋后問孰爲證左易之曰鳳閣舍人張說翌日庭

二號第九十一批

辯皆不讎然元忠說猶皆被逐其後易之等益自肆姦賊狼藉御史臺劾奏之乃詔宗晉卿李承嘉桓彥範袁恕己參鞠而司刑正賈敬言窺望后旨奏昌宗疆市罪當贖詔曰可承嘉彥範進昌宗贖四百萬尙當免官昌宗大言曰臣有功於國不應免官后問宰相內史令楊再思曰昌宗主鍊丹劑陛下餌之而驗功最大者也卽詔釋之歸罪其兄昌儀同休皆貶官已而后久疾居長生院宰相不得進見惟昌宗等侍側昌宗恐后不諱禍且及乃引支黨日夜與謀爲不軌事然小人疏險道路皆知之至有榜其事於衢左者左臺御史中丞宋璟亟請按攝后陽許璟俄詔璟外按幽州都督屈突仲翔更敕司刑卿崔神慶問狀神慶妄奏云昌宗應原璟執奏昌宗法當斬后不答左拾遺李邕進曰璟之言社稷計也願可之后終不許神龍元年張柬之崔玄暉等率羽林兵迎皇太子入誅易之昌宗於迎仙院及其兄昌期同休從弟景雄皆梟首天津橋士庶歡踊擲之一夕盡坐流貶者數十人天寶九載昌期女上表自言楊國忠助之詔復易之兄弟官爵賜同休一子官贊曰于志寧諫太子承乾幾遭賊殺然未嘗懼知太宗之明雖匕首堪胸不愧也及武后立不敢出一言知高宗之昧雖死無益也季輔行成數進諫然雍容有禮皆長厚君子哉

唐書卷一百四

唐書卷一百四考證

于志寧傳曾孫休烈○舊書元孫休烈

張行成子易之又加昌宗右散騎常侍○舊書作左散騎常侍

厥或有言無忌權太盛者帝持表示無忌曰我與公君臣間無少疑使各懷所聞不言斯則蔽矣因普示羣臣曰朕子幼無忌於我有大功視之猶子也疏間親新間舊之謂不順朕無取焉無忌亦自懼貴且亢后又數言之遂解僕射授開府儀同三司與房玄齡杜如晦尉遲敬德皆以元勳封一子郡公進册司空知門下尚書省事無忌辭又因高士廉口陳以外戚位三公嫌議者謂天子以私后家帝曰朕任官必以才不者雖親若襄邑王神符不妄授若才雖仇如魏徵不棄也夫緣后兄愛昵厚以子女玉帛豈不得以其兼文武兩器朕故相之公等孰不曰然無忌固讓詔答曰黃帝得力牧爲五帝先夏禹得咎繇爲三王祖齊桓得管仲爲五伯長朕得公遂定天下公其無讓帝又思所與共艱難賴無忌以免作威鳳賦以賜且况其功帝欲功臣並世襲刺史貞觀十一年乃詔有司朕憑明靈之祐賢佐之力克翦多難清寓內蓋時屯共資其力世安專享其利朕所不取刺史古諸侯雖名不同而監統一也無忌等義貫休戚効挺夷險嘉庸懿績簡在朕心其改錫土宇用世及之制乃以無忌爲趙州刺史以趙爲公國房玄齡宋州刺史國於梁杜如晦贈密州刺史國於萊李靖濮州刺史國於衛高士廉申州刺史國於中侯君集陳州刺史國於陳道宗鄂州刺史王江夏孝恭觀州刺史王河間尉遲敬德宣州刺史國於鄂李勣鄆州刺史國於鄆英段志玄金州刺史國於襄程知節普州刺史國於盧劉弘基朗州刺史國於夔張亮澧州刺史國於鄖

凡十有四人餘官食邑尙不在無忌等辭曰羣臣披荆棘事陛下今四海混一誠不願違違左右而使世牧外州與遷徙等帝曰割地封功臣欲公等後嗣長爲藩翰而薄山河之誓反爲怨望朕亦安可疆公土宇邪遂止後帝幸其第自家人姻婭勞賜皆有差久之進位司徒太子承乾廢帝欲立晉王未決坐兩儀殿羣臣已罷獨留無忌玄齡勸言東宮事因曰我三子一弟未知所立吾心亡聊卽投牀取佩刀自向無忌等驚爭抱持奪刀授晉王而請帝所欲立帝曰我欲立晉王無忌曰謹奉詔異議者斬帝顧王曰舅許汝矣宜卽謝王乃拜帝復曰公等與我意合天下其謂何答曰王以仁孝聞天下久矣固無異辭有如不同臣負陛下百死於是遂定以無忌爲太子太師同中書門下三品同五品自此始帝又欲立吳王恪無忌密爭止之帝征高麗詔攝侍中還辭師傅官聽罷太子太師遙領揚州都督帝嘗從容問曰朕聞君聖臣直人常苦不自知公宜面攻朕得失無忌曰陛下神武聖文冠卓千古性與天道非臣等愚所及誠不見有所失帝曰朕冀聞過公等乃相諛悅朕嘗評公等可否以相規謂高士廉心術警悟臨難不易節所乏者骨鯁耳唐儉有辭善和解人酒杯流行發言可意事朕二十年未嘗一言國家事楊師道性謹審自能無過而懦不更事緩急非可倚岑文本敦厚文章論議其所長也謀常經遠自當不負於物劉洎堅正其言有益不輕然諾於人能自補闕馬周敏銳而正評裁人物直道而行所任皆稱朕意褚遂良曠亮有

學術竭誠親於朕若飛鳥依人自加憐愛無忌應對機敏善避嫌求於古人未有其比總兵攻戰非所善也二十三年帝疾甚召入臥內帝引手捫無忌頤無忌哭帝感塞不得有所言翌日與遂良入受詔顧遂良曰我有天下無忌力也爾輔政勿令讒毀者害之有頃崩方在離宮皇太子悲慟無忌曰大行以宗廟社稷屬殿下宜速即位因祕不發喪請還宮太子即位是爲高宗進無忌太尉檢校中書令猶知門下尚書二省固辭尚書省許之帝欲立武昭儀爲后無忌固言不可帝密以寶器錦帛十餘車賜之又幸其第擢三子皆朝散大夫昭儀母復詣其家申請許敬宗數勸之無忌厲色折拒帝後召無忌遂良及于志寧言后無忌昭儀有子必欲立之者無忌已數諫曰先帝付託遂良願陛下訪之遂良極道不可帝不聽后既立以無忌受賜而不助已銜之敬宗揣后指陰使洛陽人李奉節上無忌變事與侍中辛茂將臨按傅致反狀帝驚曰將妄人構間殆不其然敬宗具言反跡已露陛下不忍非社稷之福帝泣曰我家不幸高陽公主與我同氣往謀反今舅復爾使我重愧天下奈何對曰房遺愛口乳臭與女子反安能就事無忌姦雄天下所畏伏一旦竊發陛下誰使禦之今卽急恐壞袂一呼以嘯同惡且爲宗廟憂陛下不見隋室乎字文化及父宰相弟尚主而身掌禁兵煬帝處之不疑然而起爲戎首遂亡隋願陛下決之帝猶疑更詔審覈明日敬宗言無忌反明甚請逮捕帝泣曰舅果爾我決不忍殺後世其謂我何敬宗曰漢文帝

舅薄昭從代來有功後坐殺人帝惜撓法令朝臣喪服就哭之昭自殺良史不以爲失今無忌忘先帝之德捨陛下至親乃欲移社稷敗宗廟豈特昭比邪在法夷五族臣聞當斷不斷反受其亂乘機亟行緩必生變無忌與先帝謀取天下天下伏其智王莽司馬懿之流今逆徒自承何疑而不決帝終不質問遂下詔削官爵封戶以揚州都督一品俸置于黔州所在發兵護送流其子秘書監沖等於嶺外從弟渝州刺史知仁貶翼州司馬後數月又詔司空勣中書令敬宗侍中茂將等覆按反獄敬宗令大理正袁公瑜御史宋之順等卽黔州暴訊無忌投繯卒沖免死殺族子祥流族弟思于檀口大抵期親皆謫徙初無忌與遂良悉心奉國以天下安危自任故永徽之政有貞觀風帝亦賓禮老臣拱己以聽綱紀設張此兩人維持之也既二后廢立計不合姦臣陰圖帝暗於聽受卒以屠覆自是政歸武氏幾至亡國上元元年追復官爵以孫元翼襲封初無忌自作墓昭陵塋中至是許還葬文宗開成三年詔曰每覽國史至太尉無忌事未嘗不廢卷而歎其裔孫均爲綺氏令

無忌從父敞字休明隋煬帝爲晉王敞以庫直從敗驪山王凌危逐鹿諫曰大王冒垂堂淫原獸可乎王遂止卽位頗見識擢及幸江都留守禁鑿高祖入關率子弟謁新豐授將作少監出爲杞州刺史貞觀初坐受賊免太宗以后屬歲私給粟償其費累封平原郡公卒贈幽州都督諡曰良陪葬昭陵

從父弟操字元節父覽爲周大司徒薛國公操有學術初高祖辟署相國府金曹參軍未幾檢校虞州刺史從秦王征討嘗侍旁與聞祕謀徙陝州城中無井人勤于汲操爲醜河溜入城百姓利安以母喪解長老守闕頌遺愛服除封樂壽縣男爲齊揚益三州刺史課皆最下詔褒揚永徽初以陝州刺史卒贈吏部尚書諡曰安葬給鼓吹至虞羅

子諲尙新城公主諲女兄爲韓瑗妻無忌得罪詮流嵩州有司希旨殺之諲有甥趙持滿者工書善騎射力搏虎走逐馬而仁厚下士京師無貴賤愛慕之爲涼州長史嘗逐野馬射之矢洞于前邊人畏伏諲之貶許敬宗懼持滿才能仇已追至京屬吏訊榜色不變曰身可殺辭不可枉吏代爲占死獄中無忌族叔順德

順德仕隋爲右勳衛征遼當行亡命太原素爲高祖親厚太宗將起兵令與劉弘基募士於外聲備賊至數萬人乃結隊按屯大將軍府建授統軍從平霍邑臨汾絳郡有功與劉文靜擊屈突通於潼關通將奔洛陽順德跳追桃林執通以獻遂定陝縣以多進左驍衛大將軍封薛國公討建成餘黨食千二百戶賜宮女詔宿內省俄以受賕爲有司劾發帝曰順德元勳外戚爵隆位厚至矣若令觀古今自鑒有以益國家者朕當與共府庫何至以貪冒聞乎因賜帛數十媿切之大理少卿胡演曰順德以賂破法不可赦奈

何又賜之帝曰使有恥者得賜甚於戮如不能乃禽獸也殺之何益李孝常謀反坐與交削籍爲民歲餘帝聞功臣圖見其像憐之遣宇文士及視順德順德方頽然醉遂召爲澤州刺史復爵邑順德素少檢修放自如至是折節爲政以嚴明稱先時守長多通餉問順德繩愆無所容遂爲良吏前刺史張長貴趙士達占部中腴田數十頃奪之以給貧單尋坐累還第喪息女感疾甚帝薄之謂房玄齡曰順德無剛氣以兒女牽愛至大病胡足卹未幾卒遣使弔之贈荊州都督諡曰襄貞觀十三年封邳國公永徽中加贈開府儀同三司

褚遂良字登善通直散騎常侍亮子隋大業末爲薛舉通事舍人仁杲平授秦王府鏡曹參軍貞觀中累遷起居郎博涉文史工隸楷太宗嘗歎曰虞世南死無與論書者魏徵白見遂良帝令侍書帝方博購王羲之故帖天下爭獻然莫能質真僞遂良獨論所出無舛冒者十五年帝將有事太山至洛陽星孛太微犯郎位遂良諫曰陛下撥亂反正功超古初方告成岱宗而彗輒見此天意有所未合昔漢武帝行岱禮優柔者數年臣愚願加詳慮帝寤詔罷封禪遷諫議大夫兼知起居事帝曰卿記起居大抵人君得觀之否對曰今之起居古左右史也善惡必記戒人主不爲非法未聞天子自觀史也帝曰朕有不善卿必記邪對曰守道不如守官臣職載筆君舉必書劉洎曰使遂良不配天下之人亦記之矣帝曰朕行有三一

監前代成敗以爲元龜二進善人共成政道三斥違羣小不受讒言朕能守而勿失亦欲史氏不能書吾惡也是時魏王泰禮秩如嫡羣臣未敢諫帝從容訪左右曰方今何事尤急岑文本汎言禮義爲急帝以不切未領可遂良曰今四方仰德誰弗率者唯太子諸王宜有定分帝曰有是哉朕年五十日以衰怠雖長子守器而弟支子尙五十人心常念焉自古宗姓無良則傾敗相仍公等爲我簡賢者保傅之夫事人久情媚熟則非意自生其令王府官不得過四考著爲令帝嘗怪舜造漆器禹雕其俎諫者十餘不止小物何必爾邪遂良曰雕琢害力農纂繡傷女工奢靡之始危亡之漸也漆器不止必金爲之金又不止必玉爲之故諫者救其源不使得開及夫橫流則無復事矣帝咨美之于時皇子雖幼皆外任都督刺史遂良諫曰昔二漢以郡國參治雜用周制今州縣率倣秦法而皇子孺年並任刺史陛下誠以至親扞四方雖然刺史民之師帥也得人則下安措失人則家勞劫故漢宣帝曰與我共治惟良二千石乎臣謂皇子未冠者可且留京師教以經學畏仰天威不敢犯禁養成德器審堪臨州然後敷遣昔東漢明章諸帝友愛子弟雖各有國幼者率留京師訓飭以禮訖其世諸王數十百惟二人以惡敗自餘殮和染教皆爲善良此前事已驗惟陛下省察帝嘉納太子承乾廢魏王泰間侍帝許立爲嗣因謂大臣曰泰昨自投我懷中云臣今日始得爲陛下子更生之日也臣惟有一子百年後當殺之傳國晉王朕甚憐之遂良曰陛下

號九三批

失言安有爲天下主而殺其愛子授國晉王乎陛下昔以承乾爲嗣復寵愛泰嫡庶不明紛紛至今若必立泰非別置晉王不可帝泣曰我不能卽詔長孫无忌房玄齡李勣與遂良等定策立晉王爲皇太子時飛雉數集宮中帝問是何祥也遂良曰昔秦文公時有侏子化爲雉雌鳴陳倉雄鳴南陽侏子曰得雄者王得雌者霸文公遂雉諸侯始爲寶鷄祠漢光武得其雄起南陽有四海陛下本封秦故雄雌並見以告明德帝悅曰人之立身不可以無學遂良所謂多識君子哉俄授太子賓客薛延陀請婚帝已納其聘復絕之遂良曰信爲萬事本百姓所歸故文王許枯骨而不違仲尼去食存信貴之也延陀曩一俟斤耳因天兵北討蕩平沙塞威加諸外而恩結於內以爲餘寇不可無會長故盟書鼓纛立爲可汗負抱之恩與天無極數遣使請婚於朝陛下既開許爲御北門受獻食今一朝自爲進退所惜少所失多虧信夷狄方生嫌恨殆不可以訓戎兵勵軍事也且龍沙以北部落牛毛中國擊之不能盡亦猶可北敗芮芮興突厥亡延陀盛是以古人虛外實內懷之以德使爲惡在夷不在華失信在彼不在此也惟陛下裁幸不納帝欲自討遼東遂良固勸無行一不勝師必再興再興爲忿兵兵忿者勝負不可必帝然可會李勣謀其計帝意遂決東遂良懼上言臣請誓諸身兩京腹心也四境手足也殊裔絕域殆非支體所屬高麗王陛下所立莫離支殺之討其逆夷其地固不可失但遣一二頓將付銳兵十萬翔旂雲輦唾手可取昔侯君集

李靖皆庸人爾猶能擢高昌纓突厥陛下止發蹤指示得歸功聖明前日從陛下平天下虜士爪臣氣力未衰可驅策惟陛下所使臣聞涉遼而左或水潦平地淖三尺帶方玄菟海壤荒漫決非萬乘六師所宜行是時帝銳意蕩平不見省進黃門侍郎參綜朝政莫離支遣使貢金遂良曰古者討殺君之罪不受其賂魯納郿鼎太廟春秋譏之今莫離支所貢不臣之篚不容受詔可以其使屬吏帝既平高昌歲調兵千人往屯遂良誦諍不可帝志取西域實其言不用西突厥寇西州帝曰往魏徵褚遂良勸我立鞠文泰子弟不用其計乃今悔之帝於寢宮側別置院居太子遂良諫以爲朋友深交者易怨父子滯愛者多愆宜許太子間還東宮近師傅專學藝以廣懿德帝從其言會父喪免起復拜中書令帝寢疾召遂良長孫無忌曰漢武帝寄霍光劉備託諸葛亮朕今委卿矣太子仁孝其盡誠輔之謂太子曰无忌遂良在而毋憂因命遂良草詔高宗卽位封河南縣公進郡公坐事出爲同州刺史再歲召拜吏部尚書同中書門下三品監修國史兼太子賓客進拜尚書右僕射帝將立武昭儀召長孫無忌李勣于志寧及遂良入或謂無忌當先諫遂良曰太尉國元舅有不如意使上有棄親之譏又謂勣上所重當進曰不可司空國元勳有不如意使上有斥功臣之嫌曰吾奉遺詔若不盡愚無以下見先帝既入帝曰罪莫大於絕嗣皇后無子今欲立昭儀謂何遂良曰皇后本名家奉事先帝先帝疾執陛下手語臣曰我兒與婦今付卿且德音在

陛下耳可遽忘之皇后無他過不可廢帝不悅翌日復言對曰陛下必欲改立后者請更擇貴姓昭儀昔事先帝身接帷第今立之奈天下耳目何帝羞默遂良因致笏殿階叩頭流血曰還陛下此笏歸田里帝大怒命引出武氏從幄後呼曰何不撲殺此獠無忌曰遂良受顧命有罪不加刑會李勣議與武氏立乃左遷遂良潭州都督顯慶二年徙桂州未幾貶愛州刺史遂良內憂禍恐死不能自明乃上表曰往者承乾廢岑文本劉洎奏東宮不可少曠宜遣濮王居之臣引義固爭明日仗入先帝留無忌立勣勣及臣定策立陛下當受遺詔獨臣與無忌二人在陛下方草土號慟臣卽奏請卽位大行柩前當時陛下手抱臣頸臣及無忌請卽還京發哀大告內外靈謚臣力小任重動貽伊戚螻蝻餘齒乞陛下哀憐帝昏懦牽於武后訖不省歲餘卒年六十三後二歲許敬宗李義府奏長孫無忌逆謀皆遂良驅煽乃削官爵二子彥甫彥冲流愛州殺之帝遺詔聽其家北還神龍中復官爵德宗追贈太尉文宗時詔以遂良五世孫處遂良曾孫璆字伯玉擢進士第累拜監察御史裏行先天中突厥圍北廷詔璆持節監總督諸將破之遷侍御史拜禮部員外郎而氣象凝挺不減在臺時

韓琬字伯玉京兆三原人父仲良武德初與定律令建言周律其屬三千秦漢後約爲五百依古則繁請

崇寬簡以示惟新於是採開皇律宜於時者定之終刑部尚書秦州都督府長史穎川縣公瑗少貞節行博學曉吏事貞觀中以兵部侍郎襲爵永徽三年遷黃門侍郎俄同中書門下三品監修國史進侍中兼太子賓客王后之廢瑗雪泣言曰皇后乃陛下在藩時先帝所娶今無罪輒廢非社稷計不納明日復諫曰王者立后配天帝象日月匹夫匹婦尚知相擇況天子乎詩云赫赫宗周褒姒威之臣讀至此常輟卷太息不圖本朝親見此禍宗廟其不血食乎帝大怒詔引出褚遂良貶潭州都督明年瑗上言遂良受先帝顧託一德無二向日論事至誠懇切詎肯令陛下後堯舜而塵史冊哉遭厚謗醜言損陛下之明折志士之銳况被遷以來再離寒暑其責塞矣願寬無辜以順衆心帝曰遂良之情朕知之矣其李戾好犯上朕責之詎有過邪瑗曰遂良社稷臣蒼蠅點白傅致有罪昔微子既去殷以亡張華不死晉不及亂陛下富有四海安於清泰忽驅逐舊臣遂不省察乎帝愈不聽瑗憂憤自表歸田里不報顯慶二年許敬宗李義府奏瑗以桂州授遂良桂用武地倚之謀不軌於是貶振州刺史踰年卒年五十四長孫無忌死義府等復奏瑗與通謀遣使即殺之既至瑗已死發棺驗視及還追削官爵籍其家子孫謫廣州官奴神龍初武后遣詔復官爵自瑗與遂良相繼死內外以言爲諱將二十年帝造奉天宮御史李善感始上疏極言時人喜之謂爲鳳鳴朝陽

來濟揚州江都人父護兒隋左翊衛大將軍宇文化及難闔門死之濟幼得免轉側流離而篤志爲文章善議論曉暢時務擢進士貞觀中累遷通事舍人太子承乾敗太宗問侍臣何以處之莫敢對濟曰陛下上不失爲慈父太子得盡天年則善帝納之除考功員外郎十八年初置太子司議郎高其選而以濟爲之兼崇賢館直學士遷中書舍人永徽二年拜中書侍郎兼弘文館學士監修國史俄同中書門下三品封南陽縣男遷中書令檢校吏部尚書帝將以武氏爲后濟諫曰王者立后以承宗廟母天下宜擇禮義名家幽閑令淑者副四海之望稱神祇之意故文王興妣昭之化蒙被百姓其福如彼成帝縱欲以婢爲后皇統中微其禍如此惟陛下詳察初武氏被寵帝特號宸妃濟與韓瑗諫妃有常員今別立號不可武氏已立不自安后更謾言濟等忠鯁恐前經執奏輒懷反仄請加賞慰而實銜之帝示濟及瑗濟等益懼顯慶初兼太子賓客進爵爲侯帝嘗從容問取天下所宜濟曰昔齊桓公出遊見老人命之食曰請遺天下食遺之衣曰請遺天下衣公曰吾府庫有限安得而給老人曰春不奪農時卽有食夏不奪蠶工卽有衣由是言之管徭役取天下之宜也於時山東役丁歲別數萬人又議取庸以賞履紛然煩擾故濟對及之二年兼詹事尋坐褚遂良事貶台州刺史久之徙庭州龍朔二年突厥入寇濟總兵拒之謂其衆曰吾嘗絀刑罔蒙赦死今當以身塞責遂不介冑而馳賊沒焉年五十三贈楚州刺史給靈輜還鄉初濟與高智

周郝處俊孫處約客宣城石仲覽家仲覽衍於財有器識待四人甚厚私相與言志處俊曰願宰天下濟及智周亦然處約曰宰相或不可冀願爲通事舍人足矣後濟領吏部處約始以瀛州書佐入調濠遵注曰如志遂以處約爲通事舍人後皆至公輔云濟異母兄恆上元中爲黃門侍郎同中書門下三品父本曠將而恆濟俱以學行稱相次知政事時虞世南子昶無才術歷將作少匠工部侍郎主工作許敬宗曰曠兒兒作相世南男作匠文武豈有種耶

李義琰魏州昌樂人其先出隴西望姓及進士第補太原尉李勣爲都督僚吏憚其威義琰獨敢廷辨曲直勣甚禮之徙白水令有能名擢司刑員外郎義琰姿體魁秀博學有智識累遷中書侍郎上元中進同中書門下三品兼太子右庶子高宗欲使武后攝國政義琰與郝處俊固爭事得寢章懷太子之廢盡赦宮臣罪庶子薛元超等皆蹈舞義琰獨引咎涕泣搢紳義之帝每顧問必懇切不回宅無正寢弟義璣爲市堂材送之義琰曰以吾爲國相且自愧尙營美宇是速吾禍豈愛我者邪義璣曰凡仕爲丞尉且崇第舍兄位高安可偏下哉答曰不然事難全遂物不兩興旣處貴仕又廣居宇非有令德必受其殃卒不許後其本久腐乃棄之義琰改葬其先使舅家移塋而兆其所帝聞怒曰是人不可使秉政義琰懼以疾乞骸骨遷銀青光祿大夫聽致仕乃歸田里公卿以下悉祖餞通化門外時人比漢疏廣垂拱初起爲懷州

刺史自以失武后意辭不拜卒子榮幼豪俊善騎射而不治細行義琰嘗拘之絕其交游後亡走闕下獻書陳利害拜監察御史與李義府同按柳爽韓瑗獄遷殿中上書忤旨貶龍編主簿義琰從祖弟義琛義琛擢進士第歷監察御史貞觀中文武公主貢金遇盜於岐州主名不立太宗召羣御史至目義琛曰是人神情爽拔可使推捕義琛往數日獲賊帝喜爲加七階初義琰使高麗其王據楊召見義琰不拜曰吾天子使可當小國之君奈何倨見我王詞屈爲加禮及義琛再使亦坐召之義琛匍匐拜伏時人由是見兄弟優劣累遷刑部侍郎爲雍州長史時關輔大饑詔貧人就食商鄧義琛恐流徙不還上疏固爭左遷黎州都督終岐州刺史子綰爲柏人令有仁政縣爲立祠

上官儀字游韶陝州陝人父弘爲隋江都宮副監大業末爲陳稜所殺時儀幼左右匿免冒爲沙門服邊工文詞涉貫墳典貞觀初擢進士第召授弘文館直學士遷祕書郎太宗每屬文遣儀視橐宴私未嘗不預轉起居郎高宗卽位爲祕書少監進西臺侍郎同東西臺三品時以雍州司士參軍韋絢爲殿中侍御史或疑非遷儀曰此野人語耳御史供奉赤墀下接武夔龍遶羽鶴鷺豈雍州判佐比乎時以爲清言儀工詩其詞綺錯婉媚及貴顯人多效之謂爲上官體麟德元年坐梁王忠事下獄死籍其家初武后得志遂牽制帝尊威福帝不能堪又引道士行狀勝中人王伏勝發之帝因大怒將廢爲庶人召儀與議儀曰

皇后專恣海內失望宜廢之以順人心帝使草詔左右奔告皇后自申訴帝乃悔又恐后怨恚乃曰上官儀教我后由是深惡儀始忠爲陳王時儀爲諮議與王伏勝同府至是許敬宗構儀與忠謀大逆后志也自褚遂良等元老大臣相次屠覆公卿莫敢正議獨儀納忠禍又不旋踵由是天下之政歸於后而帝拱手矣子庭芝歷周王府屬亦被殺庭芝女中宗時爲昭容追贈儀爲中書令秦州都督楚國公庭芝黃門侍郎岐州刺史天水郡公以禮改葬

贊曰高宗之不君可與爲治邪內牽嬖陰外劫讒言以无忌之親遂良之忠皆顧命大臣一日誅斥忍而不省反天之剛撓陽之明卒使牝咩鳴晨旆移后家可不哀哉天以女戎間唐而興雖義士仁人抗之以死法不可支然琰濟義琰儀四子可謂知所守矣噫使長孫不逐江夏害吳王褚不譖死劉洎其盛德可少嘗乎

唐書卷一百五

唐書卷一百五考證

長孫無忌傳鄭仁恭○舊書作鄭仁泰

唐書卷一百六

宋 端 明 殿 學 士 宋 祁 撰

列傳第三十一

杜二崔高郭趙楊盧二劉李孫邢

杜正倫相州洹水人隋世重舉秀才天下不十人而正倫一門三秀才皆高第為世歆美調武騎尉太宗素知名表直秦王府文學館貞觀元年魏徵薦其才擢兵部員外郎帝勞曰朕舉賢者非朕獨私以能益百姓也我於宗姬故人苟無能終不得任卿宜思有以稱吾舉者俄遷給事中知起居注帝嘗曰朕坐朝不敢多言必待有利于民乃出諸口正倫曰臣職左史陛下一言失非止損百姓且筆之書千載累帝悅賜綵緞二百進累中書侍郎與韋挺虞世南姚思廉論事稱旨帝為設宴具召四人者謂曰我聞神龍可擾以馴然領有逆鱗嬰者死人君亦有之卿屬遂犯吾鱗禕闕失朕其慮危亡哉思卿至意故舉酒以相樂也各賜帛有差太子監國詔正倫行左庶子兼崇賢館學士帝謂正倫吾兒幼未有就德我常物物戒之今當監國不得朝夕見故輟卿於朝以佐太子慎之曷之宅日又言朕年十八猶在人間情偽無不嘗及即位處置有失必待諫乃釋然悟況太子生深宮不及知邪且人主不可自驕今若詔天下敢諫者

死將無復發言矣故朕孜孜延進直言卿其以是曉太子冀裨益之擢中書侍郎封南陽縣侯仍兼太子左庶子出入兩宮典機密以辦治稱後太子稍失道帝語正倫太子數私小人卿可審喻之教而不徙其語我來故正倫顯諫無所避太子不從輒道帝語督切太子即表聞帝責曰何漏洩我語對曰開示不入故以陛下語怖之冀當反善帝怒出爲穀州刺史再貶交州都督太子廢坐受金帶流驩州久之授郢石二州刺史顯慶元年擢黃門侍郎兼崇賢館學士進同中書門下三品又兼度支尚書仍知政事遷中書令封襄陽縣公初正倫已通貴李義府官尚微及同執政不能下中書侍郎李友益義府族也晚附正倫同據義府譽缺義府使人告正倫友益交通罔上有異計高宗惡之出正倫爲橫州刺史流友益峯州正倫卒于貶正倫與城南諸杜昭穆素遠求同譜不許衡之諸杜所居號杜固世傳其地有壯氣故世衣冠正倫既執政建言鑿杜固通水以利人既鑿川流如血閏十日止自是南杜稍不振正倫工屬文嘗與中書舍人董思恭夜直論文章思恭歸謂人曰與杜公評文今日覺吾文頓進無子以兄子志靜爲嗣從子求仁從孫咸皆顯名

求仁有雅才永淳中授監察御史坐事爲勸令與徐敬業舉兵爲興復府長史死于難

咸擢進士第累遷右臺監察御史牂柯反咸監軍出討賊保壘自固道荒漫師不能進咸乃息士示不欲

戰陰伺之時早暑風熾咸縱火譟而前賊眩怖相失自騰踐死擒其酋遂平之遷侍御史出爲汾州長史開元中爲河北按察使坐用法深貶睦州司馬

崔知溫字禮仁許州鄆陵人仕爲左千牛稍遷靈州司馬境有渾斛薩萬帳數擾齊民農皆釋耒習騎射以扞賊知溫表徙河北虜不樂遷將軍契苾何力爲言乃止知溫固請疏十五報卒徙河北自是人得就耕渾斛薩至徙地顧善水草亦忘遷後入朝過州謝曰初徙且怨公今地膏腴衆孽夥更荷公恩皆再拜四遷蘭州刺史党項羌三萬入寇州兵寡衆懼莫知所出知溫披閱不設備羌怪之不敢進俄會將軍權善才率兵至大破其衆善才欲遂窮追取之知溫曰古善戰弗逆奔且谿谷復深草木荒延萬分一有變不可悔善才曰善分降口五百贈知溫辭曰我議公事圖私利邪累遷尚書左丞轉黃門侍郎脩國史永隆初以秩卑特詔同門下三品兼脩國史遷中書令卒年五十七贈幽州大都督諡曰忠子泰之開元時爲工部尚書諤之爲將作少匠與誅二張功封博陵縣侯實封戶二百終少府監兄知悌亦至中書侍郎與戴至德郝處俊李敬玄等同賜飛白書贊而知悌敬玄以忠勤見表遷尚書左丞裴行儉之破突厥斬泥孰訶殘落保狼山詔知悌馳往定襄慰將士佐行儉平夷寇有功終戶部尚書

高智周常州晉陵人第進士補越王府參軍遷費令與丞尉均取俸民安其化刻石頌美入擢祕書郎引

文館直學士嘗覆弄誦碑無謬者三遷蘭臺大夫孝敬在東宮與司文郎中賀啟司經大夫王真儒並爲侍讀得告還鄉里嘆曰進不知退取禍之道也卽移病去俄拜壽州刺史其治尙文雅行部先見諸生質經義及政得失既乃錄獄訟考耕餉勤墮以爲常遷正諫大夫黃門侍郎儀鳳初進同中書門下三品遷太子左庶子是時崔知溫劉景先修國史故智周與郝處俊監蒞久之罷爲御史大夫與薛元超裴炎同治章懷太子獄無所同異因表去位高宗美其槩授右散騎常侍請致仕聽之卒年八十二贈越州都督諡曰定智周始與郝處俊來濟孫處約共依江都石仲覽仲覽傾產結四人驩因請各語所期處俊曰丈夫惟無仕至宰相乃可智周濟如之處約曰得爲舍人在殿中周旋吐納可也仲覽使相工視之工語仲覽曰高之貴君不及見之來早顯而未躡高晚顯而壽吾聞速登者易顛徐進者少患天道也後濟居吏部處約以瀛州參軍入調濟曰如志擬通事舍人畢降階勞問平生既仲覽卒而濟等益顯智周所善義興蔣子慎有客嘗視兩人曰高公位極人臣而嗣少弱蔣侯宦不達後且興子慎終達安尉其子繪往見智周智周方貴以女妻之生子挺歷湖延二州刺史生子洌洌皆擢進士洌爲尙書左丞渙承泰初歷鴻臚卿日本使嘗遺金帛不納唯取棧一番爲書以貽其副云挺之卒洌兄弟廬墓側植松栢千餘渙終禮部尙書封汝南公洌子鍊渙子銖又有清白名而高氏後無聞

郭正一定州鼓城人貞觀時由進士署第歷中書舍人弘文館學士永隆中遷祕書少監檢校中書侍郎詔與郭待舉岑長倩魏玄同並同中書門下承受進止平章事平章事自正一等始永淳中眞遷中書侍郎執政久明習故事文辭詔敕多出其手劉審禮與吐蕃戰青海大敗高宗召羣臣問所以制戎正一曰吐蕃曠年梗寇師數出坐費糧貲近計則喪威深入則不能得其巢穴今上策莫如少募兵且明烽候勿事侵擾須數年之遲力有餘人思戰一舉可破矣劉齊賢皇甫文亮等議亦與正一合帝納之武后專國罷爲國子祭酒出檢校陝州刺史與張楚金元萬頃皆爲周興所誣構殺之籍入其家妻息流放文章無存者

趙弘智河南新安人元魏車騎大將軍肅之孫蚤喪母事父篤孝通書傳仕隋爲司隸從事武德初大理卿郎楚之白爲詹事府主簿太宗時預論譏錄勤繇太子舍人進黃門侍郎兼弘文館學士移病出爲萊州刺史稍遷太子右庶子父事兄弘安俸祿歸之不敢私弘安卒哀慟過期奉嫂謹甚撫兄子慈均所生會太子廢免官俄拜光州刺史永徽初入爲陳王師講孝經百福殿於是宰相弘文館學士太學生皆在弘智舉五孝諸儒更詰辨隨問酬悉舌無留語高宗喜曰試爲我陳經之要以輔不逮對曰天子有爭臣七人雖無道不失天下願以此獻帝悅賜絹二百名馬一四年進國子祭酒仍爲學士卒年八十二諡曰

宣安亦終國子祭酒曾孫矜舉明經調舞陽主簿吳少誠反以縣歸徙襄城主簿賜牙緋歷襄陽丞客死柳州官爲斂葬後十七年子來章始壯自襄陽往求其喪不得野哭再閱旬卜人秦詡爲筮曰金食其墨而火以貴其墓直丑在道之右南有貴神冢土是守宜遇西人深目而髻乃得其實明日有老人過其所問之得矜墓直社北遂歸葬弘安墓次時人哀來章孝皆爲出涕云

崔敦禮字安上祖仲方在隋爲禮部尙書其先博陵著姓魏末徙爲雍州咸陽人敦禮涉書傳以節義自將武德中官通事舍人善辭令進止觀者皆竦嘗持節幽州召盧江王瑗瑗已舉兵執之脅問朝廷事敦禮不爲言太宗壯之還除左衛郎將賜金幣良馬擢中書舍人四遷兵部侍郎出爲靈州都督召還拜兵部尙書詔撫輯回紇鐵勒部姓會薛延陀寇邊與李勣合兵破之置祁連州處其餘衆瀚海都督回紇吐迷度爲下所殺詔往綏定立其嗣而還敦禮通知四夷情僞其少慕蘇武爲人故屢使突厥前後建明允會事機永徽四年拜侍中監脩國史累封固安縣公進中書令兼檢校太子詹事以久疾自言不任事奉兩宮更拜太子少師同中書門下三品弟餘慶時爲定襄都督府司馬召使侍疾卒年六十一高宗爲舉哀東雲龍門賻布祕器尤厚贈開府儀同三司并州大都督諡曰昭陪葬昭陵餘慶位亦至兵部尙書楊弘禮字履莊隋尙書令素弟之子雅與玄感不協嘗表其必亂玄感誅父岳繫長安獄煬帝使赦之比

至岳已死高祖卽位以素有功于隋詔弘禮襲清河郡公除太子通事舍人貞觀中累遷中書舍人太宗征遼東拜兵部侍郎駐蹕之役領步騎二十四軍跳出賊背所向摧靡帝自山下望其衆袍仗精整人人盡力壯之謂許敬宗曰越公兒郎故有家風時宰相悉留定州輔皇太子唯褚遂良敬宗弘禮掌行在機務還拜中書侍郎還司農卿爲崑丘道副大總管破處密殺焉耆王降馭支部獲龜茲于闐王凱旋會帝崩大臣疾之下遷涇州刺史永徽初追論其功遷勝州都督改太府卿卒贈蘭州都督諡曰質弟弘武弘武少脩謹永徽中累爲吏部郎中太子中舍人高宗東封泰山自荊州司馬擢司戎少常伯從帝還詔補授吏部五品官遷西臺侍郎帝嘗讓曰余在戎司授官多非其才何邪弘武曰臣妻剛悍此其所屬不敢違以諷帝用后言也帝笑不罪乾封二年同東西臺三品弘武無他才特謙慎自守然居職以清簡稱卒贈汴州刺史諡曰恭三子元亨元禮元禕

元禮爲尙舍奉御善醫武后所信愛嘗忤張易之易之奏素在隋有逆節子孫不可供奉后乃詔素及兄弟有子若孫不得任京官及侍衛貶元亨睦州刺史元禮資州刺史元禕梓州司馬易之誅復任京官並至刺史

纂字續卿弘禮族父大業時第進士爲朔方郡司法書佐坐玄感近屬廢居蒲城高祖度河上謁長春宮

遷累侍御史數上書言事稱旨除考功郎中貞觀初爲長安令賜爵長安縣男有告女子袁妖逆者纂按之情不得衰敗太宗惡其不忠將殺之中書令溫彥博以過誤當宥乃免後爲吏部侍郎有俗才抑文雅進黜吏度時舞數以自進終戶部尚書贈幽州都督諡曰恭纂從子昉武后時爲肅機字文化及子訴治先蔭昉方食未卽判遽曰肅機而未食庸知天下有寃而求食乎昉怒取牒署曰父弑隋主子訴隋資可乎人服其敏終工部尚書

盧承慶字子餘幽州涿人隋散騎侍郎思道之孫父赤松爲河東令與高祖雅故聞兵興迎見霍邑拜行臺兵部郎中終率更令范陽郡公承慶美儀矩博學而才少襲爵貞觀初爲秦州參軍入奏軍事太宗偉其辯擢考功員外郎累遷民部侍郎帝問歷代戶版承慶敘夏商至周隋增損曲折引據詳帝嗟賞俄兼檢校兵部侍郎知五品選辭曰選事在尚書臣掌之爲出位帝不許曰朕信卿卿何不自信歷雍州別駕尚書左丞高宗永徽時坐事貶簡州司馬閔歲改洪州長史帝將幸汝湯泉故拜汝州刺史顯慶四年以度支尚書同中書門下三品坐調非法免俄拜潤州刺史拜刑部尚書以金紫光祿大夫致仕卒臨終誠其子曰死生至理猶朝有暮吾死斂以常服悔朔無薦牲葬勿卜日器用陶漆棺而木椁墳高可識碑志著官號年月無用虛文贈幽州都督諡曰定初承慶典選校百官考有坐潛舟溺者承慶以失所載考

中下以示其人無愠也更曰非力所及考中中亦不喜承慶嘉之曰寵辱不驚考中上其能著人善類此弟承業承泰承業繼爲雍州長史尚書左丞有能名

承泰字齊卿長安初爲雍州參軍武后詔長史薛季昶擇僚吏堪御史者季昶訪於齊卿齊卿曰長安尉盧懷慎李休光萬年尉李乂崔湜咸陽丞倪若水蓋屋尉田崇璧新豐尉崔日用季昶用其言後皆爲通顯巨人及拜幽州刺史而張守珪隸果毅齊卿厚遇曰君十年至節度使已而果然喜飲酒踰斗不亂寬厚樂易士友以此親之終太子詹事廣陽縣公承慶從孫藏用別有傳

劉祥道字同壽魏州觀城人父林甫武德時爲內史舍人典機密以才稱與蕭瑀等撰定律令著律議萬餘言歷中書吏部二侍郎賜爵樂平縣男唐泐隋制十一月選集至春停日薄事叢有司不及研諦林甫建請四時聽選隨到輒擬於是官無滯人始天下初定州府及詔使以赤牒授官至是罷悉集吏部調至萬員林甫隨才銓錄咸以爲宜論者方隋高孝基祥道少襲爵歷御史中丞顯慶中遷吏部黃門侍郎知選事既世職乃釐補敝闕上疏陳六事一曰今取士多且濫入流歲千四百多也雜色入流未始銓汰濫也故共務者善人少惡人多臣謂應雜色進者切責有司試判爲四等第一付吏部二付兵部三付主爵四付司勳若坐負當責雖經赦仍配三司不者還本貫則官不雜矣二曰內外官一品至九品萬三千四

百六十五員大抵三十而仕六十而退取其中數不三十年存者略盡若歲入流五百人則三十年自相充補況三十年外在官猶多不慮其少今入流歲千四百其倍兩之又停選六七千人復年別新加其類寔廣殆非經久之制古者爲官擇人不聞取人多而官少也三曰永徽以來在官者或以善政擢論事者或以單言進而庠序諸生未聞甄異是獎勵之道未周也四曰唐有天下四十年未有舉秀才者請自六品以下至草野審加按訪無令赫赫之辰斯學遂絕五曰唐虞三載考績黜陟幽明二漢用人亦久其職今任官率四考罷官知秩滿則懷去就民知遷徙則苟且以去就之官臨苟且之民欲移風振俗烏可得乎請四考進階八考聽選以息迎新送故之弊六曰三省都事主事主書比選補皆取流外有刀筆者雖欲參用士流率以儻類爲恥前後相沿遂成故事且掖省崇峻王言祕密尙書政本人物所歸專責曹史理有未盡宜稍革之以清其選會中書令杜正倫亦言入流者衆爲官人傲乃詔與祥道參議而執政憚改作又以勳戚子進取無他門遂格稍選司刑太常伯每覆大獄必獻欬累嘆奏決日爲再不食詔巡察關內道多振冤滯兼沛王府長史麟德元年拜右相祥道性審謹居宰相憂畏不自堪數陳老病丐解坐與上官儀善罷爲司禮太常伯高宗封泰山有司請太常卿亞獻光祿卿終獻祥道建言三代六卿重故得佐祠漢魏以來權歸臺省九卿爲常伯屬官今封岱大禮不以八坐用九卿無乃徇古名忘實事乎帝

可其議以司徒徐王元禮亞獻祥道終獻禮成進爵廣平郡公乾封元年以金紫光祿大夫致仕卒年七十一贈幽州都督諡曰宣

子齊賢襲爵繇侍御史出爲晉州司馬帝以其方直尊憚之時將軍史興宗從獵苑中言晉州出佳鷄可捕取帝曰齊賢豈捕鷄人邪卿安得以此待之累遷黃門侍郎脩國史永淳元年進同中書門下平章事武后時代裴炎爲侍中辨炎不反后怒左遷晉州刺史道貶吉州長史永昌中爲酷吏所陷繫州獄自經死沒其家建中三年贈太子太保齊賢三世至兩省侍郎典選從父應道吏部郎中從父弟令植禮部侍郎凡八人前後歷吏部郎中員外世以爲罕

令植孫從一擢進士宏詞第調渭南尉雅爲常袞盧杞所厚薦授監察御史普王討李希烈表爲元帥判官德宗居奉天超拜刑部侍郎同中書門下平章事從幸梁州改中書侍郎帝遇之善然無它才能容身達罪而已貞元初以疾自乞罷爲戶部尙書卒贈太子太傅

李敬玄亳州譙人該覽羣籍尤善於禮高宗在東宮馬周薦其材召入崇賢館侍讀假中祕書讀之爲人峻整然造請不懼寒暑許敬宗頗薦延之歷西臺舍人弘文館學士遷古肅機檢校太子右中護拜西臺侍郎同東西臺三品兼檢校司列少常伯時員外郎張仁禕有敏才敬玄委以曹事仁禕爲造姓歷狀式

銓簿鉗鍵周密病心太勞死敬玄因其法衡綜有序自永徽後選員浸多惟敬玄居職有能稱性彊記雖官萬員過諸道未嘗忘姓氏有來訴者口諭書判參舛及殿累本末無少繆天下伏其明杭州參軍徐太玄哀其偉張惠以贓抵罪而惠母老乃詣獄自言與惠偕受薄其罪惠得不死太玄坐免官十年敬玄廉知之擢爲鄆州司功參軍後至祕書少監申王師以德行聞其鑒拔率若此咸亨二年轉中書侍郎又改吏部兼太子右庶子同中書門下三品監脩國史進吏部尚書居選部久人多附嚮凡三娶皆山東舊族又與趙李氏合譜故臺省要職多族屬姻家高宗知之不能善也儀鳳元年拜中書令封趙國公劉仁軌西討吐蕃有所建請敬玄數持異由是有隙因奏河西鎮守非敬玄不可敬玄辭以非將帥才且仁軌逞憾故疆臣以不能帝厭之因曰仁軌若須朕朕且行卿安得辭乃拜洮河道大總管兼鎮撫大使檢校鄴州都督統兵十八萬代仁軌與吐蕃將論欽陵戰青海使劉審禮爲先鋒麤虜敬玄按軍自如審禮戰歿尙首鼠不進乃頓承風嶺又阻溝淖莫能前賊屯高壓其營偏將黑齒常之率死士夜擊賊敬玄始得至鄆州又戰涅川遂大敗數稱疾求罷歸許之既入見不引謝卽還府視事帝察實不病貶衡州刺史久之遷揚州長史卒官贈兗州都督諡曰文憲撰次禮論及它書數十百篇二子思沖守一思沖神龍初歷工部侍郎左羽林軍將軍從節愍太子誅武三思見殺籍其家守一郛令孫紳別傳

敬玄弟元素爲武德令刺史李文暕橫調民黃金造常滿尊以獻官屬無敢諫元素固爭文暕爲少損更以私財助之延載初繇文昌左丞遷鳳閣侍郎同鳳閣鸞臺平章事爲武懿宗所構與慕容暉等同誅神龍中追洗其辜

劉德威徐州彭城人姿貌魁秀有幹略隋大業末從裴仁基討淮賊手劍賊酋傳行在後歸李密密分麾下兵使守懷州密降俱入朝授左武侯將軍封滕縣公詔將兵擊劉武周因判并州總管府司馬裴寂失律齊王元吉棄州遁德威總留府事賊薄城民皆叛附賊遂爲武周所獲使率本部徇池浩州得自拔歸盡上賊中虛實高祖嘉納改彭城縣公未幾檢校大理少卿從平洛陽有功轉刑部侍郎加散騎常侍妻以平壽縣主貞觀初歷大理卿綿州刺史政號廉平百姓立石頌德尋檢校益州大都督府長史入爲大理卿太宗問曰比刑網浸密咎安在德威曰在君不在臣下之寬猛視主之好律失入者減三失出者減五今坐入者無辜坐出者有罪所以吏務深文爲自營計非有教使然也帝然其言後遷刑部尚書檢校雍州別駕詔至齊州按齊王祐獄還半道聞祐反入據濟州詔德威就發河南兵經略之會母喪免既除爲同州刺史永徽三年卒官年七十一贈禮部尚書幽州都督諡曰襄陪葬獻陵德威於閨門友睦爲人寬平生所得奉祿以分宗親無留藏

子審禮審禮少喪母爲祖母元所養隋末大亂道不通審禮尙少自鄉里負祖母度江轉側避地及天下平西入長安元每疾病必親煮藥嘗而進元曰兒孝通幽顯吾一顧念疾輒問貞觀中歷左驍衛郎將父喪免比葬徒跣血流行路咨嘆服除當襲爵讓其弟不聽見父執必感泗滂沱事繼母尤謹與弟延璟爲聞友得祿多資之而妻子執寒苦晏如也再從皆同居合二百口內外無間言遷工部尙書檢校左衛大將軍儀鳳三年吐蕃寇涼州副中書令李敬玄討之遇虜青海上與戰敬玄逗撓不前審禮敗爲虜執其子尙乘直長殆庶及延景詣闕待罪請入賊以贖有詔審禮徇忠以沒非有罪宜各還職特詔殆庶弟易從省之既至而審禮卒易從晝夜哭不止吐蕃哀其志乃還父尸徒跣萬里扶護以歸見者流涕審禮贈工部尙書諡曰僖

延景字冬日終陝州刺史睿宗初以后父追贈尙書右僕射陪葬乾陵易從累遷彭城長史任城縣男永昌中爲酷吏周興誣構坐死將刑百姓奔走爭解衣投地曰爲長史祈福有司平直乃十餘萬當時號孝義劉家及易從以非禍死天下寃之

子昇年十餘歲流嶺表六道使誅流人昇以信愛爲首領所庇免後易姓溫北歸洛景雲中特授右武衛騎曹參軍開元中累遷中書舍人太子右庶子昇能文善草隸

審禮從弟延嗣爲潤州司馬徐敬業攻潤州延嗣與刺史固守俄而城陷敬業邀以降延嗣曰吾世蒙恩今城不守所負多矣詎能苟生爲宗族羞敬業怒將斬之其黨魏思溫救止繫江都獄敬業敗錄忠當敘以裴炎近親裁遷梓州長史轉汾州刺史宗族至刺史者二十餘人

孫處約始名道茂汝州郟城人貞觀中爲齊王祐記室祐多過失數上書切諫王誅帝得其書咨嘆之擢中書舍人高宗卽位中書令杜正倫請增舍人員帝曰處約一人足辦我事止不除以論譏勞數賜段物再遷司禮少常伯麟德元年以西臺侍郎同東西臺三品爲少司成以老致仕卒子佺延和初爲羽林將軍幽州都督率兵十二萬討奚李大酺分三屯以副將李楷洛周以悌領之次冷硯楷洛與大酺戰不勝壯校多沒佺氣褻乃給言天子詔我招慰奚楷洛違詔妄戰當斬遣人謝大酺大酺曰審爾願出天子賜明不欺佺擊衆軍中幣萬餘疋悉褫帶并與之大酺知佺詐好語勸引還而佺部伍離沮奚逼之大敗死者數萬佺以悌同見獲送默啜所殺之

邢文偉滁州全椒人與歷陽高子貢壽春裴懷貴俱以博學聞咸亨中歷太子典膳丞時孝敬罕見宮臣文偉卽減膳上書曰古者太子旣冠則有司過之史虧膳之宰史不書過死之宰不徹膳死之皇帝簡料英俊自庶子至司議舍人學士侍讀使佐殿下成就聖德比者不甚廷議謁對稀簡三朝之後與內人獨

居何繇發揮天資使溶哲文明哉今史既闕官宰得奉職謹守禮經以聞太子答曰幼嗜墳典欲研精極意而未閑將衛耽誦致勞比苦風虛奉旨下恩旨不許彊勉加以趨侍朝夕無自專之道屢闕坐朝乖廢學緒觀尋求賈符宿志自非義均弼諧渠能進此藥石文偉由是益知名後右史缺高宗謂侍臣曰文偉切諫吾兒此直臣也遂授之武后時累遷鳳閣侍郎兼弘文館學士載初元年爲內史后御明堂詔文偉發孝經后問天與帝異稱云何文偉曰天帝一也制曰郊后稷以配天祀文王于明堂以配上帝奈何而一對曰先儒執論不同昊天及五方總六天帝后曰帝有六則天不同稱固矣文偉不得對后曰移風易俗莫善於樂伯牙鼓琴鍾期聽之知意在山水是人能移風易俗矣何取樂邪文偉曰聖人作樂平人心變風俗末世樂壞則爲人所移后喜賜帛宗秦客以姦賊抵罪文偉坐所善貶珍州刺史會宅使者至文偉內悸自經死

高子貢善太史書與朱敬則善擢明經歷秘書省正字弘文館直學士不得志因棄官去徐敬業起兵弟敬猷統兵五千逼和州子貢率鄉人數百拒之賊引去以功擢朝散大夫爲成均助教東莞公融嘗爲和州刺史從子貢受業及融謀舉兵令黃公譔見子貢推爲謀主書疏往返因結諸主內應謀泄坐死

唐書卷一百六

二號第九十一批

唐書卷一百六考證

崔知溫傳贈幽州大都督○舊書贈荊州大都督

高知周傳子繪往見智周智周方貴以女妻之生子挺○舊書繪子捷

唐書卷一百六考證

